

بقلبك حلم

لإيلاف الطاهر



الحياة لعبة .. إذا أردت أن تلعبها ، عليك فقط
أن تلعب بقوانينها ، وبالطريقة التي ترضاها هي ،
لآ التي تُحبّها أنت !! ..

إهداء

إلى كُلِّ حبة لُؤلؤٍ مرّت على حروفي ..
وإلى كُلِّ إنطباقَةٍ رمّشٍ حدّثت بين جنّاتِ روآيتي ، ،
سلمتِ !

المقدمة

تُجبرنا الحياة أحياناً على عيش أدوارٍ لم نُخلق لأجلها ، أدوارٌ لا تشبه أرواحنا ..

هي بعيدةٌ كل البُعد عن شخصياتنا ..

حينها فقط ؛ ستعرفُ معنى أن تكون شخصاً غير الذي تُريد ..

لكن ثِقْ بأنَّ هذه الأدوار ما هي إلا صقلٌ لشخصياتنا ، لتتكيف على الحياة ..

نعم ؛ خائنةٌ هي الحياة ، تُعطينا أشخاصاً كأرواحنا أنقياء ، ما نلبث أن نتكيف عليهم ، ونعتادُ قربهم حتى

تقتلعهم بنفسِ القوَّة التي تعودنا بهم عليها ،

وليس بيدك شيء ، سوى أن ترضخ للواقع ، ذلك الواقع الأليم ،

أنت رهنُ الحياة ، وأنت عبدٌ لها ، وهي سيِّدةٌ لك .. !!

فالحياة لعبة .. إذا أردت أن تلعبها ، عليك فقط أن تلعب بقوانينها ، وبالطريقة التي ترضأها هي

، لا التي تُحبها أنت!! ..

{ بِلِقَاكَ حِلْمٌ .. }

(.الحلقة الأولى.)

" وَتُجْبِرُنَا الْحَيَاةَ عَلَى عَيْشِ أَدْوَارٍ لَمْ نُخَلِّقْ لَهَا "

(♥).....*.....•••.....*.....(♥)

ماشي بخطوات بطيئة متثاقلة .. بجررجلينو جر .. مهموم وكل هموم الدنيا فوق راسو ..

مدّ يدو لجيب بنطلونو وطلّع منها قروش عاين فيها بهم وحسرة ..

قال بأسى : باقي معاي ٢٠٠ بس !

واتنهد تنهيدة حازة : إن شاء الله تكفي لغاية نهاية الشهر ..

ابتسم ابتسامة جانبية هادئة وساخرة : هو كويس لو كفتني لغاية بكرة ..

ومشى على الدكان .. دخل الدكان المعروف في الحارة دكان " عم سعيد " .. الراجل الطيب

الكل الحلة بتتعشّم فيهو .. الراجل الما برّد محتاج .. دخل الدكان وحاول قدر ما يقدر

يرسم إبتسامة على وشو .. إلا إنو شفايفو خانتو .. ما بتقدر ترسم الفرحة عليها وهي ما

حاسة بيها ..

قال بصوت متألّم فيهو بحّة : السّلام عليكم عم سعيد .

عم سعيد الكان مشغول وقاعد يحسب رفع راسو وعاين فيهو ، ابتسم لما شافو ، قال

بكل طيبة : أهلا أهلا عماد .. كيفك ؟

عماد بتنهيدة : الحمد لله ماشي الحال ، كيفك إنت يّ عم سعيد ؟

عم سعيد وحسّ في عماد : والله في نعمة نحمدو ..

عماد : الحمد لله ، الحساب عندك كم يّ عم سعيد ؟

عم سعيد وفتح الدفاتر وبقى يقَلِّب في صفحاته .. وقف أخيراً في صفحة مكتوب فيها عماد ..
رفع راسو وعاین في عماد : أمم حسابك ٨٠٠ يا ولدي ..

عماد طَلَع القروش من جيبو ومدَّها لعم سعيد : دي ٢٠٠ ي عم .. كل العندي والله ..
يبقى باقي ليك ٦٠٠ برجِّعها ليك أول ما أستلم الراتب ..

عم سعيد طلع من الدكان ووقف جنب عماد ورجَّع ليه قروشو : عماد يا ولدي ..
أمسك قروشك عندك .. ولغاية ما ربنا يفرجها عليك أنا بعدين بحاسبك .. وبعدين أنا ما
محتاج ليها حالياً ..

عماد : لكن ..

عم سعيد قاطعو : أسمع كلامي يا ولدي ..

عماد نزل عيونو في الأرض وقال بحرَّج : ما عارف أرد جمالك معاي كيف ي عم سعيد

..

عم سعيد يحاول يغيّر الموضوع : أهال ي ولدي لقيت ليك شغل ؟

عماد رفع راسو واتنهد : لقيت بس لسه باقي لي المقابلة ..

عم سعيد وشو اتهلل : الحمد لله .. الوظيفة شنو ؟

عماد : ما عارف والله .. بس كان عاملين إعلان إنو في واحد إسمو سيف خليل بابكر وداير

لهو موظفين بأي شهادة

عم سعيد بفرحة : سيف خليل بابكر ؟ إنت جادّي !

عماد باستغراب : آآي .. ليه ؟ بتعرفو ؟

عم سعيد ضحك : ههههههههه .. يا ولدي ما أنا براي البعرفو ..

عماد مُندهش وما فاهم حاجة ..

عم سعيد مسك عماد وقعدو في العنقريب الكان قدام الدكان وقعد جنبو: يي ولدي ..
سيف خليل دا رجل أعمال معروف في السودان .. ماشاء الله هو وأخوه المرحوم عادل
الإثنين رجال أعمال معروفين وخيرهم مالي الدنيا .. دقيقة بس ..

وقام على حيلو دخل الدكان جوا .. وطلع بعد دقيقة وفي يدو جريدة باين عليها جديدة ..
قعد جنب عماد وفتح الجريدة ومداهها لعماد وهو بيشير ليهو على صورة راجل : هذا ليهو
.. الأستاذ سيف خليل بابكر .. أكثر رجل أعمال معروف بعد المرحوم أخوه عادل ..

عماد ابتسم : الحمد لله .. إن شاء الله اتقبل في الوظيفة دي ..

عم سعيد خت يدو في ظهر عماد : ما تشيل هم يا ولدي .. بصدقك وأمانتك دي إن شاء
الله ح تتقبل .. شمبات دي كلها تشهد ليك بالحنّة دي .. بس إتكل على الله .. اهاا
والمقابلة متين ؟

عماد: إن شاء الله يوم الأربعاء ..

عم سعيد : يعني بعد بكرة ..

عماد : بالظبط .. " وقام على حيلو " أستأذنك يا عم ..

عم سعيد : في أمان الله ..

ومشى عماد راجع البيت وهو متفائل .. أخيراً ح يشتغل بعد سنة كالأملة عطالة .. أخيراً
ح يقدر يأكل أخوانو حلال .. أخيراً بالوح يرتاح ..

" عماد : شاب محترم ، عمرو ٢٤ سنة .. اتخرج السنة القبل الفاتت من جامعة
السودان .. درس إدارة أعمال .. هادئ وعقلاني .. جمع بين لون أمو ولون أبوهو عشان
تكون بشرتو حنطية .. شعرو أسود .. عيونو عسليّة فاتحة ومريوشة على عيون أمو .. "
" عم سعيد : راجل محترم وطيب .. عمرو ٥٧ سنة .. عندو دكان والحارة كلها بتحترموا "

(♫)-----*-----•♫•-----*----- (♫)

في الخرطوم شرق - حي الرّياض :

في واحد من البيوت القريبة من فيلا الأستاذ سيف خليل .. رجل الأعمال المعروف ..
بيت حاج وداعة .. كان في لمة نسوان على جبنة .. نسوان أصغرهم عمرها ٤٥ سنة
وأكبرهم عمرها ٦٤ سنة ..

حاجة سعاد "مرة كبيرة مشلخة عمرها ٦٤" قالت وهي بترشف أول رشفة من كباية
الجبنة : مالها كبايتك صغيرة كدا يا زينب ؟

زينب " زوجة الحاج وداعة عمرها ٤٥ " : والله يختي قدر ما أكون دايرة أمشي أشترى لي
كبابي .. الحاج يقول لي بعد تنزل الماهية ..

حاجة سعاد : كُرعليك آآ بت أمي .. " وإلتفتت على حاجة آمنة " آمنة .. سرحانة مالك
يختي ؟

حاجة آمنة " عمرها ٥٥ سنة " زحّت يدها من خدها وقالت بأسى : والله شاغلاني بت
المرحوم عادل ..

حاجة سعاد : مني دي ؟

زينب : دي العمياء مُش ؟

حاجة آمنة : أجي يا سعاد ؟ المرحوم عادل بنيتو وحييدة .. أي يا زينب ياها زاتها ..
مسكينة البنية لا أم لا أب لا أخ لا أخت .. براهاا .. عاد كان شفتها مسكينة كيف !

حاجة سعاد ورشفت رشفة تانية : دي بت منطلقة ساكت ..

حاجة آمنة بإستغراب : بتقولي كدي مالك يا سعاد ؟

زينب بسرعه ما أدت حاجة سعاد فرصة عشان ترد : ما سمعتي بالخبر يختي ؟

حاجة آمنة بإستغراب أكثر : خبر شنو ؟

زينب : صحي والله .. أستغفر الله ..

حاجة آمنة لملت توبها وعدلتو وقامت على حيلها : اهاا يا بنات أمي .. ودعتكن الله
والرسول ..

زينب وحاجة سعاد : ودعناك الله ..

دا كان حال الجلة ديك .. ما عندهم شغلة غير يتكلموا في ريم .. بت المرحوم عادل المات
قبل ٥ شهور .. بذبحه صدرية .. مخلي وراهو بت وحيدة .. ومجموعة عقارات وشركات
ومصانع .. زوجتو نادية إتوفت في اللحظة الولدت فيها ريم ..

{ بَلَقَاكِ حِلْمٌ .. }

(.الحلقة الثانية.)

"مَا أَكْثَرَ الظَّالِمِينَ ، وَالْمَظْلُومِينَ كَذَلِكَ !"

(♥).....*.....•••.....*.....(♥)

في بحري - شمبات :

عماد قاعد في الحوش مع أختو بيان .. بيان كانت قاعدة في السير المقابل لمهوجنيها
أخوه مازن .. السّاعة ٦ المغرب ..

عماد: إن شاء الله لغاية يوم الخميس كدا بكون استلمت الشغل ..

بيان : إن شاء الله .

عماد : بس ما عارف لغاية المرتب الجاي أتصرف كيف ! باقي معاي ٢٠٠ بس ..

بيان : عم سعيد .. بتاع الدكان .. أكيد حيديتك لغاية ما تستلم راتبك ..

عماد : وتفتكري دا حل ؟ نقعد نشحد في الخلق يعني ؟

بيان : لا يا عماد ، دي ما شحدة .. دا دين بعدين إن شاء الله بترجعوا

عماد بأسى : ربنا بيفرجها ..

بيان : بمناسبة القروش ، عماد دايرين لينا سكر .

عماد باستياء : نعم ؟ سكر ؟ مش جبتهو أول أمس دي ؟ متين لحق يكمل ! بتسفو هو إنتو

!

بيان : مالك يا عماد ؟ السكر الجبتو شوية .. يادوب يجي ١٥ ملعقة :/

عماد : ما لازم سكر ..

سلطان : تفضّل يا الغالي ..

عماد دخل البيت جوًّا على بيان لقاها قاعدة في الصلاة .. مشى عليها وقال لها : معلّش

يا بيان

بيان :

عماد مشى عليها وباس لها راسها : خلاص يا بيان ما توجّعي لي ضميري زيادة عليك الله ..

بيان قامت على حيلها : ماشة أعمل ليك شاي إنت وصحبتك .. يمكن ما شرب شاي

سوداني !!

عماد بحيرة حكّ راسو: والسُّكر؟

بيان بمرح : ست البيت الشّاطرة بتعرف تتصرف .

عماد بابتسامة : أوكي منتظرك يا شاطرة ..

دخلت بيان المطبخ .. وعماد طلع على سلطان .. قعدوا يتونّسوا لغاية ما بيان جات طالعة

ليهم بالشّاي .. كانت خاتّه طرحة على راسها أي كلام .. ختّت الشاي قدّامهم وقالت

لعماد : أممم ، عملت ليك لسكر ملعقة ونص زي ما بتحب .

عماد ابتسم : تمام ..

والتفتت على سلطان : وانت ختيت ليك السُّكر في السكرية .. لأنني ما عارفة بتحب كم

ملعقة ، معلّش

سلطان الكانت عيونو على بيان من أول ما طلعت : لا ما عليك عادي ..

ابتسمت بيان ابتسامة بانة منها أسنانها المرصوصة وقالت بأدب : عن إذنكم ..

سلطان : تفضّلي ..

دخلت بيان البيت وبقي سلطان متابعها بعيونو لغاية ما دخلت وما عامل حساب لعماد
الكان سرحان

التفت على عماد : هذي أختك ؟

عماد بسرحان : أيوا ..

سلطان ونسى انها أختو : ما شاء الله تبارك الله .. أول مرة أدري إنك عندك خوات ،
عماد بعدم اهتمام : لا بس هي عاشت مع أمي فترة طويلة ! في حين أنا إنحرمت منها ..

سلطان بعدم استعياب : وش بها أمك ؟

عماد رفع كباية الشاي وشرب منها: لما أمي وأبوي انفصلوا هي مشت معاها ..

سلطان : انفصلوا ؟ شلون ؟ مو قلت أمك ميتة ؟

عماد إلتفت على سلطان : يعني ما عارف أي حاجة ؟

سلطان : والله مادري عن إيش تتكلم ؟

عماد ختّ كباية الشاي والتفت على سلطان وقال ليهو : حكاية طويلة !

سلطان بحماس : قول وأنا أسمعك !

عماد : أوكي .. لما منصور كان في الجامعه ..

سلطان قاطعو : من منصور ؟

عماد : راجل أمي .. المفروض يكون أبوي بس أنا ما بتشرف بيهو !

سلطان باستغراب : كيف يعني ؟

عماد : هو أبوي أنا وبيان بس انا ما قاعد أقول ليهو أبوي ..

سلطان باستغراب : مين بيان ؟

سلطان بإندماج :وبعدين ؟

دمعت عيون عماد مسحها بسرعه قبل ماتنزل وتعلن إنهبيارو وقال بصوت متهدج : ندى .. أمي .. نور عيني جاها سرطان في الكبد ..

سلطان بأسى : لا حول ولا قوة إلا بالله ..

عماد كمّل ودموعو نزلت .. وعيونو بقت حمرا .. قال بعصبية : لكن الإسمو منصور دا البخجل أقول لهو أبوي .. طلقها .. عارف ليه ؟ قال ما قادر على مصاريف علاجها .. ومشت بيت أهلها ومن هناك سافرت سوريا عشان تتعالج ومعها بيان أختي ..

سلطان : وأنت ؟

عماد : بقيت أنا معاهو .. قال أنا عماد بكبر وبشتغل وبجيب لهو قروش يعني بنفعو .. لكن بيان الصغيرة ما بتفيدو في حاجة بس ح تكون عالية عليهو .. على حد قولو ..

سلطان : إيواا ؟

عماد : المهم يا طويل العمر أمي سافرت سوريا ومعها بيان .. إنحرمت من أمي ومن أختي .. بعد الطلاق بشهر .. إتزوج منصور وحدة سودانية صغيرة .. ومشى معاهها مدينة تانية ما عارفينها وين .. المهم صحيت صباح يوم كدا عشان ألقى ظرف فيهو ٣٠٠ جنيه بس ! هه! قال لي صرّف بيها نفسك .. وكتب لي ورقة قال فيها إنو سافر .. بس وين ؟ ما معروف !

سلطان : طيب !

عماد : الوقت داك يادوبي دخلت الجامعة .. كمّلت الجامعة براي .. كنت شغّال في السوق سبّاك عشان أقدر أكل وأصرف على نفسي ..

سلطان : من يومك رجّال ..

عماد بحزن وصوتورجّع كئيب : بعد الطلاق والعدّة .. أمي هناك في سوريا قابلت لها
واحد من أقاربها كان انسان محترم جدا ،، اتزوجها

سلطان : سوداني ؟

عماد : أيوا سوداني .. وبعد سنة جابت منو مازن .. وبعد سنة تانية ماتت بالسرطان

سلطان : لا حول ولا قوة إلا بالله .. اللهم إرحمها وإجعلها من أهل الجنة ..

عماد سكت مسافة خمسة دقائق ودموعو على خدودو .. كان بيكي بصمت ..

مسح دموعو وكمل : أمي ماتت بعد الطلاق بسنتين .. وأبوي لما عرف إنها ماتت ما جا
البيت عشان يعزّي بس رسلّ لينا قروش .. هه ! قايل كل حاجة بالقروش .. بعد شهرين
بس ! أختي بيان وأخوي من أمي مازن جا السودان هنا .. وعاشوا معاي .. بعدها بكم
سنة كملت الجامعة .. وبقيت أفتّش لي على شغل .. عشان آآكل أخواني بالحلال .. عشان
ما يمدّو يدينهم للناس ..

سلطان : أيوا ، وبعدين

عماد : بس كدآ ، حالياً ما عندنا إلا البيت كآن حق أمي الله يرحمها ، ساكن أنا في نص
ووليد في النص التاني منو

سلطان مسح دموع عماد : عمدة يالغالي .. ما تشين إلا عشان تزين .. توكل على الله ..
والله ما راح يضيّعك إنت وأخوانك الله يحفظكم ..

عماد : الله يرضيك يا سلطان ..

سلطان : ويرضيك يالغالي .. وأي شي تحتاجه لا تخاف أنا أخوك !

عماد عصّب وعيونو بقت حمرا وقف على حيلو وقال لسلطان : ما محتاج للناس أنا ..

ودخل البيت بعصبية مخلي سلطان محتار، ..

سلطان بحيرة : يا ربي وش سويت انا ! كل ما تكلمت جبت العيد !

مشى سلطان محتار ما عارف الزعل عماد كدا شنو .. عرف الحل عند وليد هو الوحيد

الحي عرف عماد زعل ليه أما بيان لمت العده والفرشة ودخلت البيت ..

" بيان : أخت عماد .. صف ثاني ثانوي .. عمرها ١٧ سنة .. مرحة ودمها خفيف وخجولة

أحياناً .. جمالها خلاب .. ما طبيعي .. عيونها عسلية زي عيون عماد .. شعرها بني بيوصل

لها نص ظهرها "

" سلطان : شاب سعودي صاحب عماد .. يدرس جامعة الخرطوم طب في السنة

الخامسة .. جا السودان مع أبوهو عشان يدرس .. ملامحه عربيّة حادّة .. أنيق ودمو

خفيف .. عمره ٢٣ سنة "

{ بِلِقَاكَ حِلْمٌ .. }

(.الحلقة الثالثة.)

" اليتيم الحقيقي هو ، أن تكون غريباً بين معارفك ! "

(♥).....*.....•••.....*.....(♥)

الخرطوم شرق - حيّ الرياض :

في فيلا الأستاذ سيف .. في واحدة من العُرف ..

حاضنة بت عمها بقوة .. دايرة ترتاح وتحس بالأمان .. دموعها غرقت صدرت عمها ..
كانت بتبكي بصمت ودموعها ما وقفت .. مفترض الليلة تكون فرحانة وقمة في البسطة ..
أما بنت عمها خلّتها تأخذ راحتها .. ودسّتها في حضنها .. كان نفسها تبعد كل حاجة
بتوجعها عنها .. الشافتو ما قليل .. صحيح قلبها كبير .. بس ما بشيل دا كلوو .. قطع
لحظات الصمت دي أختها غيداء .. جات داخله بمرح .. فتحت الباب بقوة وزغرذت
وقالت بشقاوة : وأخيراً الأنسة الأولى ح تنخبط ..

ورجعت تزغرد مرّة ثانية .. إنتهت للكآبة الموشحة الغرفة .. إلتفتت على أختها هيفاء
وبنت عمها ريم .. شافت ريم بتبكي بصمت أليم .. شهقاتها الما قدرت تكتمها فضحتها ..
مشت عليها بقلق .. جرّتها من حضن أختها وعاينت في عيونها الما بتقدر تشوف .. كان
الكحل الأسود سايل على خدودها البيضاء الصافية قالت بإستفسار: ريوم ! حبيبتي
مالك ؟ الليلة يومك ! اتخطبتي يا بت !

على كلمتها الأخيرة إنهاارت ريم ودفنتها وشّها في حضنها .. غيداء الكانت ما فاهمة
حاجة إلتفتت على هيفاء وقالت بإستغراب : مالها ؟

هيفاء إنتهدت وهي متوجّعه على بنت عمها .. قعدت على السرير وقالت بأسى : أبوي !

غيداء عقدت حواجبها : مالو أبوي ؟

هيفاء على نفس حالها : جابرهاا على سعد .. :

غيداء رفعت وش ريم وعانيت في عيونها الما بتشوفها : ريم حبيبتي .. سعد إنسان مهذب
ومحترم .. ووجيه .. ومثقف ..

ريم بألم .. وبتحاول تكتم شهقاتها : لكن .. أنا دايراهو يتقدم لي وهو عارف أنا منو .. ما
دايرة يتقدم لي عشان أبوي ولا عشان حائي علي .. دايراهو يتقدم لي وهو بحبني .. دايرة
يكون عندي رأي في خطبتي .. دايرة أقرا طيب .. ليه عمو يحرمني من القرابة ويجبرني على
الزواج وأنا في الحالة دي

غيداء : لكن يا ريم .. الحب بيجي بعد الخطبة ..

ريم : ولو .. الناس ح يقولوا شنو الآن .. ما كفاية القاعدين يقولوهو فيني .. !

غيداء : هولو ما فاهم ما كان اتقدم ليك .. ما أظن زول يسمع الحلة بتتكلم فيك الكلام
دا كلو ويحي يتقدم ليك .. بس هو عارف إنو إنتي مظلومة .. عشان كدا اتقدم ليك ..
"والتفتت على هيفاء" مش يا هيفاء ؟

هيفاء قامت على حيلها ومشيت عليهم : فعلاً يا ريم .. هو شكلو بيعرف أبوك وتريتوليكي ..
وعارف إنوريم البريئة ما بتعمل كدا

غيداء التفتت على ريم وابتسمت لهما : خلاص حبيبتي .. أمسحي دموعك .. وأجهزي
عشان خطيبك .. سعد ما بيستاها يشوفك كدا ..

ريم بهدوء : أوكي ..

ساقتها غيداء من يدها ومشيت على الحمام -وانتو بكرامة- غسلت لهما وشها وطلعت ..
مسكتها هيفاء من يدها وقعدتها قدام المراية .. عملت لهما روج أحمر خفيف وكحل
أسود .. وشوية بلاشر وردي .. كان مكياج بسيط وهادئ لكن كان تحفه عليها .. أبرز
جمالها الطبيعي .. ريم مضرب مثل في الجمال .. شعرهاا بيوصل لهما تحت أكتافها..

شفايفها وردية صغيرة .. أنفها واقف سلّة سيف .. عيونها وسيعة ورموشها كثيرة
وطويلة .. جسمها ممشوق ومتناسق ..

إنتهت هيفاء من المكياج .. إلتفتت على غيداء بإبتسامة : رأيك شنو ؟

غيداء الكانت بتعين لهما في المرآة : أقول شنو وأخلي شنو ؟ جمال ما شاء الله ..

وقفت ريم على حيلها وبقت تتحس بيديها طريقها عشان تمشي للسريير .. قالت بهدوء :
غيداء ، أديني طرحة ..

غيداء مشت عليها : لالا لا ريوم .. ما تلبسي طرحة .. خلي سعد يشوف جمالك .. ويشوف
روعة شعرك ..

ريم بهدوء شديد : بس يا غيداء ..

هيفاء قاطعتها: لالا يا ريم .. دي النظرة الشرعية ومن حقو يشوف شعرك ..

ريم : أوكي ..

" ريم : بت أخ أستاذ سيف .. خجولة وطيبة وعلى نيّاتها .. عيونها ناعسة ورموشها كثيفة
لكن للأسف ما بتشوف ، عمرها ١٩ سنة .. وقفت الدراسة وما كملت الجامعة لأنو عمرها
سيف منعها نسبة للفضيحة الجابتها وخوف من كلام الناس .. كانت بتدرس معمار
جامعة السودان "

" هيفاء : بت الأستاذ سيف عم ريم .. خجولة ومحترمة ومثقفة .. عمرها ٢٠ سنة ..
بتدرس فنون تطبيقية في جامعة السودان في السنة الثانية لهما "

" غيداء : أخت هيفاء .. بت عم ريم .. عكس أختها هيفاء .. مرحة وشقيّة ومجنونة
ومزعجة زي الأطفال .. عمرها ١٨ .. في ثالث ثانوي أدبي .. "

(.....•○•.....)

في الجانب التالي من الفيلا :

قاعد الأستاذ سيف في كُرسِي منفرد .. وقدَّامو سعد وجنيو ياسر ولد الأستاذ سيف

قاعدِين في كنبَة فخمَة تصمِيمها ملكي ..

سيف : بتدرِّس شنو يا أستاذ سعد ؟

سعد بإبتسامَة : كيمياء ..

سيف : ماشاء الله .. وكنت شغَّال في السعودية ؟

سعد : أيواا .. قعدت هناك تقريبا ٥ سنوات درَّست في أنحاء المملكة كلها ،

سيف بفرحة : خمسة سنوات ؟ يعني ما سمعت بالجوطة دي كلها ؟

سعد وظهَّرت على ملامحو الإستغراب : جوطة شنو ؟

سيف في نفسو "كويس .. الحمدلله ما سمع بعمال البيت الشُّوم دي " : قصدي ما

سمعت أي كلام كدا ولا كدا في ريم ؟

سعد على نفس استغرابو : ريم ؟ مالها ريم ؟

سيف يحاول يغطِّي على ريم : لآ قصدي جمالها وأخلاقها .. عارف إنها بت عادل أخوي

؟

سعد وإرتاح : أي أي ..

سيف : أيواا .. " وإلتفت على ياسر ولدو " أمشي نادي ريم يا ياسر ..

ياسر قام على حيلو : طيب ..

" سعد : شاب هادئ ورضين ومتفهم .. تخرَّج من الجامعة وتخصص أستاذ كيمياء عمره

٢٩ سنة .. "

(.....•○•.....)

هيفاء بتوتُّر: آآآ .. والله عندها شغلات كدا ..

ريم إتخنقت أكثر .. لانها عارفة إنها بتكرهها : ما يحتاج يا هيفاء .. انا عارفة إنو خالتو
مها أمكم بتكرهني ..

غيداء : ما تقولي كدا يا بت .. هو في زول يعرف ريم عادل خليل ويكرها ؟

ريم ما ردَّت عليها ..

هيفاء بتحاول تغيّر الموضوع : دقيقة أجيب المبخرعشان تطلعي لسعد .. وطلعت جابت
المبخروجات راجعه .. قعدت تبخّر فيها

غيداء : هيفاء خلاص كتمتي البت ..

هيفاء وختت المبخربعيد : اوكي اوكي .. يلا نطلع ..

وطلعت ريم وعلى يمينها هيفاء وعلى يسارها غيداء .. وبقوا يمشوا بين أرجاء الفيلا
الفخمة .. مشوا في الممرات الواسعه المليانة بالشبابيك الفرنسية ونقشة الحيط
الإيطاليّة والصور المعلّقة في كل مكان والتحف الأثرية الفخمة في كل زاوية من زوايا
الفيلا .. وصلوا المجلس .. وضحكات ياسر وسعد وسيف واصلاهم من برّا .. وريحة البخور
والعطور مالمية كل ركن من أركان الفيلا ..

استقبلتهم نظرات سعد المعجبة ونظرات سيف المهدّدة .. هيفاء وغيداء مشوا بعد ما
أشّر لهم أبوهم سيف إنو يرجعوا .. أما ريم بقت واقفة مكانها من الخوف .. اتسمّرت
مكانها وكانت مستعدة تقيف للأبد .. إلا إنو صوت سيف الثقيل جاها : تعالي يا ريم ..

قام ياسر من مكانه ومسك ريم من يدها .. ارتبكت من لمساتو .. أما هو كان قمة في
الفرحة .. وبكل هدوء ساقها .. اتقدّمت ريم بخطوات مترددة .. كان نفسها تجري .. لكن ما
عارفة تجري من وين ولا وين .. بخطوات بطيئة وثقيلة وصلت عند سيف .. أشّر لياسر
يقعدّها جنب سعد .. قعدت في نفس الكنبه بس بعيد منوشوية ..

سيف بضحكة : ههههه .. خجولة شويتين هي ..

سعد الكان بعين لريم بطرف عينو عشان ما تلاحظ ليهو مع إنو عارف إنها ما بتقدر
تشوفو.. التفت على سيف وابتسم في هدوء

سيف بوقاحة : عجبك ؟

سعد بابتسامة : ما شاء الله تبارك الله ..

سيف قام على حيلو : أخليكم تاخدو راحتكم ..

{ بَلَقَاكِ حِلْمٌ .. }

(.الحلقة الرابعة.)

" الجروح التي نتصنع نسيانها ، تُؤلم "

(♥).....*.....••.....*.....(♥)

سيف قام على حيلو : أخليكم تاخدو راحتكم ..

وطلع برا .. أما سعد قرَّب من ريم الكانت أفكارها سرحانه في عمها سيف وتعاملو معاها
كيف بنهرهاا ويقلِّل من شأنها .. اتذكرت أبوهاا .. عمرو ما رفع صوتو عليها .. كان مدلِّعها
.. ورغم شغلو وشركاتو الماخدة من وقتو كتير .. كان مدي ريم كل اهتمامو وما مخلِّبها
تحس بوفاة أمها وحنانها الما ضاقتو .. اتذكرت إنو أبوها اتوفِّي وهو ما عارف الحقيقة ..
اتوفِّي وهو مصدوم منها .. مات وظنُّو خايب .. مات وراسو نازل من الفضيحة ..

بس هي ما لقت فرصة تحكي لأبوها وتشرح ليهو .. كل حاجة حصلت بسرعة .. الألم
الجاها .. الدكتور .. الذبحة الصدرية .. المستشفى .. بيت العزاا .. العمى الجاها فجأة
بدون سبب .. حتى كبار الأطباء ما عرفوا لعمهاها سبب علي !

كل حاجة حصلت قبل ما هي تستوعبها ..

نزلت دمة حارة من عينها ونزل معاها شوية كحل .. انسابت بسلاسة على خدها البارد
ومرّت بشفايفها نازلة على رقبتها .. إلا إنويد سعد مسحها قبل ما تنزل من وشها الملائكي

..

مسح دمعها وهو مستغرب من بكاها .. وحدة يوم خطبتها المفترض تكون مبسوطه ..

قال بصوت هادئ أقرب للهمس : ريم ..

ريم سكتت وحاولت تخفي تقاسيم الحزن المرسومة على وشها ..

سعد بابتسامه مطمئنة وكانو عرف سبب دموعها : أدعي لهم بالمغفرة .. *ريم ساكتة* ..

كَمَل سعد : وربنا يقدرني أسعدك وأعوضك عن كل لحظة فقدت في حنان أمك
وعطف أبوك ..

ريم مع كميّة الحُزن الفها ابتسمت ابتسامه سارحة مطمئنة .. اطمأنت لكلام سعد ..

سعد ابتسم لما شاف جمال إبتسامتها وسألها : بتدرسي ؟

ريم نزلت راسها وبقت تلعب في أصابعها .. قالت بحسرة : لا !

سعد باستغراب عقد حواجبو وقال بتساؤل : لا ؟

ريم وفي صوتها بحّة موجهة : ما بدرّس ..

سعد على نفس حالو : طيب ليه ؟

ريم حاولت تغطّي على عمها : مالي نفس .. بعدين ناس زي مفترض ما يدرسوا

سعد ما اقتنع بالسبب دا .. لكن حاول يجارها : ريم .. عمرو العمي ما كان سبب عشان
الانسان يعطلّ حياتو .. عارفة إنو أنا أستاذ كيمياء يا ريم ؟ ممكن ترجعي تكملي دراستك
.. وأي حاجة بتغلبك أنا موجود ..

ريم على نفس حالها : أوكي ..

سعد : قريتي لحدّي كم ؟ ووقفتي الدراسة متين ؟

ريم : أممم .. لغاية أولى جامعة ..

سعد بإندهاش : إنت جادة ! زول قدر يوصل الجامعة .. بعد دا كلو ما يكمل ! لازم ترجعي

تكملي دراستك .. طيب وقفتمها متين ؟

ريم بغصّة : وقفتمها قبل ٤ شهور ..

سعد بتفكير : أيوا .. يعني بعد وفاة أبوك بشهر .. "والتفت عليها" أظن انودي حالة نكران

وعدم تصديق ..

ريم في نفسها * ياليت لو تعرف إنو عمو هو المانعني أكمل دراستي * وردت : ممكن ..

سكت سعد .. حسّ إنو في حاجة مضايقاها أو انها خجولة ما أكثر .. قرر إنو يسكت
ويسمع منها بدل ما يكثر أسئلة .. وسألها : ما دايرة تقولي لي حاجة يا ريم ؟ تسأليني عن
عمري مكان شغلي أو أي شي ؟

ريم سكتت مسافة وهي منزلة راسها .. من الحصل وهي متعودّة راسها يكون نازل .. حاسة
إنو كل الناس مكذبهاها .. رفعت راسها بنظرات متشّتة وعيونها بتلمع من الدموع
الجبسها خجلها وكبرياءها .. قالت بصوت مبحوح : دايرة أسألك .. اتقدّمت لي أنا ولا لأبوي
؟

سعد باستغراب من كلامها : كيف يعني ؟

ريم وخجلها زاد وهي حاسة بقرب سعد منها .. رجعت نزلت راسها وتلعب بأصابعها في
خجل وبراءة : قصدي .. إنت اتقدمت لي أنا ريم شخصياً .. ولا عشان مكانة أبوي وورثتو
الخلاها .. وعشان الناس يقولوا انك متزوج بنت عادل !

سعد : عندك تلفون يا ريم ؟

ريم باختصار شديد : لا ..

سعد مع انو مستغرب بس ما حبّ يسألها وقف على حيلو : طيب إن شاء الله بتصل عليك في تلفون البيت .

ريم ما اهتمت بكلامو .. اختصرتو : حاضر .

سعد سلّم عليها واستأذنها وطلع .. لاقاهو سيف في الصّالة عبّر ليهو عن اعجابو الشّديد بريم وإنو مُصرّ على قرارو بخطبتها .. أما سيف انبسط لأنو أخيراً ح يتخلّص من ريم أو "الشوم" زي ما يقول ليهما .. قدّم سعد لغاية باب الفيلا .. ورجع على المجلس الفهوري ، لقاها على نفس حالها قاعدة في الكنبّة وموطّية راسه ودموعها على خدّها .. وقف قدّامها بشموخ وقال بنبرة تكبّر وتسلّط : إن شاء الله بس ما تكوني قلتي حاجة كدا ولا كدا ؟

ريم رفعت راسها ودموعها على خدودها ، قلبها الصغير حجماً والكبير حناناً بشكي وفاة أبوها وظلم الدنيا ليهما وموت أمها الإنحرمت منها وما عرفت حنانها ، قالت بهدوء : لا يا عمو ..

دموعها وانكسارها ما هزّ فيهو شعرة .. قال بشرّ : تمام .. وأعرني إنو سعد دا خطيبك وح يكون راجلك .. ما تفضحيني قدّامو .. هو لسه ما عارف بعمايلك و بلاويك .. وحدة عميا ومعاها فضيحة هزّت الدنيا ح تعمل لي شنو ؟ ح أرميك فيهو وبعد دالك يتصرّف فيك براحتو .. وكان طلقك تشوفي ليك خور ولا شارع تعشّشي فيهو .. فاهمة ؟ أمشي طيري بيتك !

ونادى ياسر عشان يعي يسوق ريم ..

قامت بهدوء مُستندة على يد ياسر رفيق طفولتها .. وهي بتجرّ وراها أذيال الألم والحسرة .. ما قادرة تتصدّي لضربات الظلم البتجها من كل مكان ..

مشيت على غرفتها أو الأصح بيتها المكون من طابقين صغيرين .. من بعد وفاة أبوها ، عمها سيف قرر إنها تسكن معاهم لكن ما في نفس الفيلا .. بجزء قلييل من ميراثها عمل لها بيت منفصل عن الفيلا بحيطه بس فيها باب ! .. مكون من طابقين الأول صالة استقبال ومطبخ وحمامين -الله يكرمكم- وصالون ، والطابق الثاني فيهو غرفتين .. غرفة نوم وغرفة ضيوف .. رغم صغرو إلا إنو كان بيليق بريم وأناقتهها .. أثاثو جميل وفخم لأنو هييفا وغيداا هم الإختارو الأثاث .. وحول البيت أو الملحق الصغيردا في حوش مزروع بنجيلة وبعض الزهور البتحتها ريم .. بيت وحيد وموحش بتعيش فيهو براها .. وأحيانا هيفاء وغيداء وياسر بجوا يأنسو عليها وحشتها .. معاها خدامة وقراها لها عمها عشان تطبخ لها بس .. وقدام البيت في حارس بمنع أي زول يدخل عليها إلا بإذن عمها ..

عمها سيف ما لحو أو عطفو أو طيبتو أو جمال أخلاقو عمل لها البيت ووقر لها الخدامة والحارس ! لا طبعاً .. عشان كل الناس تعرف إنو سيف رجل الأعمال الطيب معيش بنت أخوهو اليتيمة أحسن عيشة !!

(.....•○•.....)

كانت ليلة هادئة كئيبة ، فتحت في ريم جروح قديمة ، منسيّة .. أو مُتناسيّة !
أما بالنسبة لعماد .. فهي ليلة ما كانت أقل كئابة من ليلة ريم .. سلطان ذكّرو بالأم
كتييرة ! فراق أمو .. وهجر أبوهو ، ووحدتو !!
نام بدون عشا .. لأنو وقر نصيبو من العشا لمازن و بيان أخوانو عشان يفطروا بيهو بؤكرا !!

مازن باستغراب : مصطفى ؟ انت اسمك عماد منصور.. يعني بابا إسمو منصور مصطفى
ابو منو ؟

عماد : لالا منصور ما أبوك ، أبوك اسمو مصطفى ..

مازن باستغراب : كيف يعني ؟

عماد ما عرف يرد : انت أسألتك كتيرة كدا ليه ؟

مازن وختّ يدو على خشمو وضحك ضحكة خبيثة : هههههه ، انا قلت لأصحابي ابوي
اسمو عماد ..

عماد بعصبية باردة ونظرات حادة : انا كم مرة قلت ليك انا أخوك ؟ ما بتفهم إنت ؟
مازن و اتقوس فمو لتحت و عيونو اتملت بالدموع : لكن لما أقول ليهم ابوي اسمو منصور
بقولوا لي ما عندك أبو .. هو بابا دا من زمان مسافر ليه ؟

عماد الما قدر يفهم مازن الأسئلو بتكثريومياً عن أبوهو ، ضمّاهو لصدرو ومسح على
شعرو : بابا ح يرجع إن شاء الله ، ولو داير خلاص أنا بابا ..!

وزحّ منو ومسح دموعو النزلت على خدو ، وطبع بوسة على خدو وقال بابتسامة : أمشي
ألبس شنطتك عشان ما تتأخر على الروضة ..

(♩)-----*-----•••-----*----- (♩)

الخرطوم شرق - حيّ الرياض :

في بيت ريم :

اتقلّبت في فراشها بملل .. ما عارفة هي صاحبة من متين ، لكن العارفاهو إنها طوّلت وهي
في السرير .. نادت للحبشية أكثر من مرّة لكن ما سمعت رد ، إتوقعت إنها لسه نائمة ،
اتحسّست فراشها بلمسات مبعثرة .. قعدت على طرف السرير .. نزلت رجلينها وبكل
هدوء وحذر قامت من مكانها ، بخطوات مترددة ومشتتة مشت بتفتّش على الباب .. إلا

إنها بدون احساس مّمّا انزلت على السيراميك النَّاعم و ضربت راسها بالحيطه ووقعت
.. اتكّت على يدها وقعدت مكانها .. جاها ألم فظيع في راسها بسبب الضربة وحست
بحاجة سايلة على جبهتها ، انتهت لصوت الباب بينفتح ، افكرتها الحبشية " سميرة "

قالت وهي بتسأل : سميرة ؟

إلا إنو توقّعها خاب لما جاها صوت ياسر قال وهو بفتّش عنها في العُرفة : دا أنا يا ريم ،
كُنت داير أقول لي.....

اتخلع لمّا شاف ريم في الأرض وفي دم في جبهتها ، صرخ بأعلى صوتو : ريم !!

التفت يمينو لقي كرتونة مناديل ، شالها ومشى عليها بسرعة ، شال كمية من المناديل
وبقى يمسح في الدم

ريم باستفسار : في شنو يا ياسر ؟

ياسر وهو مستمر يمسح في الدّم : الدّم الفى راسك دا جا من وين ؟

ريم ورجع لهما ألم راسها مرة ثانية : شكلو لما ضربت راسي بالحيطه .. آآي راسي !

ياسر مسكها من يدها وقومها في السرير : تعالي أقعدي هنا ، كُنت ماشة وين ؟

ريم : كنت طالعة على الحّمّام ، ناديت سميرة لكن ما سمعتني ..

ياسر وهو مخلوع من كمّيّة الدم النَّزفتها : أيوة أنا كُنت جايبك بخصوص سميرة ..

ريم : مالها سميرة ؟

ياسر : أبوي خلاص مشّاها ..

ريم باندهاش : مشّاها ؟ متين ؟ وليه ؟

ياسر : عشان كُدا كُنت جاي أناديك أبوي قال دايرك في الخصوص دا ..

ريم : طيب دقيقة بس أغيّر ملابسي ..

ياسر وقام من مكانو عشان يرمي المناديل المُستعملة في الزبالة : لالا أبوي قال ليك
دايرك سريع ، قبل ما يطلع على دوامو ..

ريم بحرج : بَ .. بس أنا لابسة بجامة ..

* كانت لابسة بجامة وردية البنطلون برمودا تحت الركبة بشوية وعلهو بودي برقع كُم

*

ياسر ابتسم : مالو ؟ مُش عمك ؟

ريم سكتت ..

ياسر : على العموم أبوي رسلني أجيبك ليهو الآن .. تجي معاي ؟ ولا أعتذر ليهو ؟

ريم بخوف : لالا خلاص بس أديني حاجة ألبسها في رجلي ..

ياسر قام على حيلو : أوكي يا ست الكل ، تأمري

كانت متعوّدة على كلام ياسر ومغازلتولها ، لأنو من الطفولة كدا .. كان بينهم حُب أخوي
غريب جامعهم .. البشوفهم بفتكرهم أخوان ..

" ياسر : أخ هيفاء وغيداء ، وابن العم سيف ، بدرس هندسة معمار في السنة الرابعة
عمره ٢٢ سنة ، مشاكس وشقي وظريف ، لكن طيب ويهتم بالناس ، بشرتو قمحية ،
شعرو أسود ناعم بيوصل لبداية رقبتو .. عيونو ضاحكة وفيها لمعة طيبة "

(.....•○•.....)

سيف : والله دي ما مُشكّلتني أنا ، المهم أنا خدم ما بجيب ليك ، لأنو مشروع الاستثمار الجديد بتاع الفندق الحنعملو دا ، بستنزف من ميزانيتنا كثير ، عشان كدا بدينا نقلل من الخدم .. لغاية ما يكتمل المشروع بعد كدا أشوف أجيب ليك خدم ولا لا ..

ريم : بس لكن ..

سيف : لا لكن ولا شي ، كلامي أنا قلتو ليك ..

قاطعو ياسر : خلاص يا أبوي ما مشكلة .. أنا بساعد ريم لغاية ما يخلص المشروع ..

سيف بدهشة : لكن المشروع لسه باقي علموزي سنتين ..

ياسر باستغراب : وين المشكلة طيب ؟

سيف على نفس حالو : يا ولد قرابتك !!

ياسر إلتفت على ريم : ما مُشكلة يا أبوي ، لو اضطريت ممكن أوقف الدراسة ، ما

مُستعجل على شيء أنا ..

سيف وقف على حيلو بسرعة وبدا يغلي من العصبية : توقف الدراسة عشان البت التّافهة دي ؟ لما قلت ليك وقّفها عشان تمسك العقارات رفضت ، تقول لي حسي داير توقّفها عشانها ؟

ياسر ووقف مع أبوه وقال بعصبية باردة : أبوي ، مهما كان دي في النهاية بت عمي ، وما

تنسى إنها يتيمة وعميا كمان !!

ريم حسّت بتأنيب الضّمير وإنها سبب المشاكل والعلاقة المتوتّرة بين ياسر وأبوهو ، وقفت على حيلها ودموعها ما وقفت ، قالت بصوت هادئ : ياسر ، خليك في دراستك ، أنا بتعود أمشي براي ، ما بحتاج ..

وعاينت في اللا مكان بنظرات ضايعة واتقدّمت بخطوات بطيئة في محاولة منها إنها ترجع

بيتها ، مشت خطوتين لكن فقدت توازنها ووقعت وقعة خفيفة ، على أثرها رجع ألم

الناس كانوا متوقّعين ليها مُستقبل جميل ، وفعلاً مُستقبلها بدا يجمّل ليها ، بس كبرت !
وكل شي إتغيّر ..

صحى من سرحانو على صوت الدّكتور وهو بقول ليهو : لآزم يكون معاها زول عشان
يرشدها

ياسر الكان خاتّي يدو تحت دقنو بتفكير ، هزّ رأسو بنعم في سكوت .. في حين إستأذن
الدكتور منهم وطلع من الباب ..

أما هو قعد على طرف السّيرير بعيد من ريم وقال ليها بهدوء وابتسامة خفيفة : ريم ..
ريم بهدوء : أهلين ..

ياسر وهو بلعب بالمُفتاح بين يديّينو : بالنسبة لموضوع قبيل .. *وسكت مُنتظر ردّة فعلها*

ريم بسرعة : خلاص يا ياسر ، أنا بتعوّد ما مُشكلة ، أصلاً أنا ماشة وين ؟ بس يعني
أعرف طريق المطبخ وبقية الغُرف في البيت .. عادي عادي بتعوّد مع الأيام ..

ياسر بابتسامة : إذا كان إنتِ ماشة على الباب كسرتي راسك .. لما تجي ماشة على المطبخ
ح عملي شنو يعني ؟

ريم بقلّة حيلة : ما مشكلة بتعوّد ..

ياسر : أنا وأبوي خلاص اتّفقنا إنو يجيب ليك زول يساعدك في المشي ..

ريم : مُش قال ما ح يجيب ناس يساعدوني ؟

ياسر : هو كان قصدو زول يقعد معاك في البيت طوالي ، دا طبعا بكونو تكلفو أكبر ، لكن

خلاص قال ح يجيب ليك زول بدوام يومي ، يعني مثلاً من الصّباح لغاية السّاعة ١٢

بالمسا كدا أو السّاعة ١٠ وبعدين دوامو ينتهي .. وهو بس العلمو يودّيك مكان ما دايرة

تمثني ،

ريم : جد ؟

ياسر: جد ، اقتنع بالفكرة ، بس على شرط إنو مرتّب الزول الجاييك دا يكون من
المطعم حق أبوك -الله يرحمه- المُسجّل بإسمك ، وهو طبعاً بُكرا عندو مقابلة عمل
للمتقدّمين لوظائف ، المهم لما أزعجتو بالموضوع دا حلف لي أول زول يجيهو بُكرا يشغلو
عندك ..

ريم نزلت راسها وقال بهدوء : كتر خيرو عمو ..

ياسر قام على حيلو : ويلا يا عمو إنتِ تعالي معانا برّا أنا وهيفاء وغيداء .. قاعدين في
الحوش برّا وبتوتّس ..

ريم الكانت قاعدة في نُص السّرير ، مشت على أطراف السّرير ونزلت رجلها وقالت بصوت
هادئ مبحوح : أوكي ، يلا جاية ..

ياسر مشى عليها بسرعة : خليني أساعدك يا جميلة ..

ريم بخجل : تسلم ..

ياسر الكانت عيونو على مكان خطواتها رفع راسو عليها وقال بابتسامة ساحرة : جد يا ريم
، إنتِ جميلة ..

أما ريم اكتفت بابتسامة خجولة ارتاح لهما ياسر ..

(♪)-----*-----•♪•-----*----- (♪)

وليد وقف على حيلو : يلا ..

عماد التفت على العم سعيد : أشوف وشك على خير يا عم !

العم سعيد : الله يخليك يا ولدي ..

ومشوا على الظلّط وبعد نص ساعة لقوا لهم مواصلات ، ركبوا الحافلة وسط زحمة
النّاس ..

(♫)-----*-----•♫•-----*----- (♫)

الخرطوم شرق - حيّ الرياض :

ياسر والعم سيف واقفين قدّام باب الشّارع ..

ياسر : يا أبوي ما تنسى تجيب زول يشتغل لريم ..

العم سيف بزهبج : حاضر ياخي ! أزعجتني بريم دي ، مالك ياخ ؟

ياسر : خت في بالك إنها يتيمة يا أبوي .. والبتعملوا فيها دا ما صاح ..

العم سيف طنّش كلامو : يلا يلا ، أقفل الباب دا وأمشي على جامعتك ..

ياسر عاين في أبوهو مسافة : حاضر يا أبوي * وقفل الباب ودخل يجهز للجامعة*

عم سيف بزهبج وقرف : دا شنو المرض دا؟ أنا ما عارف الولد دا جا من وين !!

وركب عربيتو و بسرعة اتحرّك على شركتو ..

(.....•○•.....)

في مبنى شركة العم سيف :

دخل مبنى الشّركة الفخم من البوّابة الإلكترونيّة وسط الأربعة حُرّاس الواقفين عند

مدخل الشّركة ومشي على إمتداد السّجاد المفروش على الأرضية الرّخامية باللون

الفضي ، وصل عند المصعد المآ بقل فخامة عن بقية أجزاء الشركة .. في غضون ثواني
كان وصل الدور الخامس والآخر من المبنى .. طلع من المصعد .. كل الموظفين في مكاتهم
المفتوحة على بعض ، وقفوا على حيلهم إحتراماً وخوفاً منو .. دخل مكتبو الواسع بديكور
ملكي .. قعد على الكرسي ونادى بصوت عالي على السكرتيرة : يا تهاني ، تهاني ..

جات داخله المكتب بسرعة : أيوة نعم يا أستاذ

قال وهو مشغول بالورق القدامو : في زول جا لمقابلة العمل ؟

تهاني : لالا يا أستاذ ..

سيف : طيب أول زول يجي للمقابلة رسلي على مكنتي طوالي ..

تهاني : ليه ؟

سيف بعصبية : شغلتك شنو إنت ؟ أول زول يجي للمقابلة خليه يجيني هنا على المكتب

، كلامي مفهوم ولا لا .. ؟

تهاني بخوف : ح.. حاضر

سيف ورجع ضهرو على الكرسي : كلبي بقية الموظفين ، والباقيين خليه يمشوا لمكان

مقابلات العمل الإعتيادي

تهاني : إن شاء الله .. تأمر بحاجة حضرتك ؟

سيف : لالا ، بس خلي عبد العظيم يجيب لي كباية شاي ..

تهاني هزت رأسها بنعم : حاضر ..

(.....•○•.....)

قدّام مبنى الشركة :

عماد : طيب طيب ..

(ل)-----*-----•••-----*----- (ل)

الخرطوم شرق - حيّ الرياض :

في واحد من المطاعم الفآخرة ..

قاعد في المطعم وبتكلم بال تلفون مع صحبو البيجمع بينهم شغل السُّوق والتَّجارة زي أبواتهم ، قفل الخط في جو كُّلو ضحك و ونسة إلتفت على يمينو ، على صحبو وقال و لسة على وشو تقاسيم الفرح مرسومة : آها يا أستاذ عملت شنو بعد ما خطبتها ؟

سعد بهدوء : ولا شي ..

قام على حيلو بسرعة وزعل : نعم ؟ شابكني بجيب ليك رأسها و بخليها تجن فيني

وبعدين أسلمك ليها ! وينو كلامك دا !!

سعد بهدوء : طيب يا خالد هديّ نفسك وبعدين بنتفاهم ..

خالد الالفتت حولينو قعد ولسه العصبية في عيونو : ممكن تقول لي عملت شنو بدون

لعب بالأعصاب ؟

سعد : جآدي معاك والله ، من يوم الخطبة داك ما شفتها ولا سألت عنها ..

خالد عاين فيهو مسافة وطلع تلفونو وقال بزهج : طيب طيب جيب رقمها ..

سعد على نفس حالو : آآ بالنسبة للرقم ..

خالد رفع عيونو من التلفون وقال بغيظ : ما تقول لي ما جبتو كمان ؟

سعد : أيوا

خالد : ياخ دا شنو ياخ ؟ مش كان بيننا اتفاق ؟ مش قلت ح تجيب لي رقمها ؟ طلبت منك حاجة كبيرة انا ؟ شابكني بجيب ليك راسها بجيب راسها ، انت رقمها ما قادر تجيبو !

سعد اتمهد : أيو .. بس الكلام دا لو كان ...

خالد بقلّة صبر : لو كان شنو ؟ شوف أنا ما داير أعددار كتيرة ، نحن بيننا اتفاق ..

سعد : ايوا ما قلنا شي ، بس هي ... هي عميانه !

خالد فتح عيونو بدهشة على آخر اتساع : ع..ع.. عمي...أنة ؟

سعد هز رأسو بنعم..

خالد بقلق : ك..كيف الك..كلام دا ؟ ومتين ؟

سعد : ما عارف ، ما سألتها ..

خالد و عيونو لمعت من الدموع الاتجمعت فيها : ريم ؟ معقولة ! لالا أصلو ما بصديق !

سعد ختّ يدو على كتف خالد وقال بمواساة : هدي بالك ، الموضوع ما يستاهل .. هي

اتعمت و خلاص ..

أما خالد الما كان منتبه لكلام سعد وقف على حيلو وقال بصوت عالي : كيف الكلام دا ! كيف يعني

تعني ؟ قول لي بس تعني كيف يعني ؟

سعد بحكمة : يا ولد دا قدر ، الأقدار بتعمل كدا ..

خالد بعصية أكثر وحابس دموعو بشدة : الأقدار ! مُش كفاية الأقدار دي فرقتنا ، لما تيجي تعممها !! أنا كرهت الدنيا دي بسبب الأقدار ، بتتحكم بحياتنا وعلاقاتنا وصلاتنا .. وبكل برود بنقول دي الأقدار

.. أقدار ؟

سعد : خالد صلي على النبي .. ماف داعي للكلام دا ..

خالد التفت على سعد بسرعة : سعد ! أنا داير أشوف حبيبتي !!

{ بِلِقَاكَ حِلْمٌ .. }

(.الحلقة الثامنة.)

" و الكرامة التي تُغتصب ! عن الدُّلِّ أَحَدِيَّتِكُمْ "

(♥).....*.....•.....*.....(♥)

الخرطوم شرق - حيِّ الرياض :

في مبنى شركة العم سيف :

دخلوا مبنى الشركة ومشوا على موظف الاستقبال ، الكآن بشرب في كباية شاي ..

عماد اتحنح : السّلام عليكم ..

موظف الاستقبال : أهلا وسهلا .. أهلا أهلا ..

عماد : لو سمحت ، أنا جآي الليلة عشان مقابلة العمل ، أمشي وين ؟

موظف الاستقبال ختّ كباية الشّاي : عشان مقابلة العمل ؟

عماد : أيوا ..

موظف الاستقبال : طيب عن إذذك شوية بس ،

عماد : أوكي ..

أما الموظف مسك سماعة التّلفون واتصل على السكرتيرة : ألو ، أهلين تهاني .. أيوا أيوا

الفتاح معاك .. عايني في زول جا للمقابلة ؟ لسه ؟ طيب أوكي .. لالا بس في زول جا

للمقابلة كنت دآير أتأكد في زول جا قبلولا لا .. آي آي برسوليك .. جدّا جدّا .. يلا مع

السّلامة ..

قفل السّماعَة والتفت على عماد وأشار على المصعد : تمشي يا أستاذ على المصعد داك وتمشي للدور الخامس ، ح تلقى مكتب في وشك مكتوب عليه " مدير الشركة " واتفّضل هناك للسكرتيرة ، تمام ؟

عماد : جدّا ..

الموظف : تحب أجي معاك ؟

عماد : لالا شكرا خليك إنت ..

الموظف : أوكي ..

مشوا على المصعد وطلعوا الدور الخامس ، انفتح باب المصعد وانهرّوا بالتّصميم الفخم للدور الخامس الكآن بيختلف عن بقية أدوار الشركة ، وفعلا كآن مقابلهم غرفة مكتوب على بابها " مدير الشركة " بخطوات هادئة وأثقة مشوا ناحيتها وعيون الموظفين وراهم ، دخلو المكتب ، كآنت السكرتيرة قاعدة في مكتب وعلى يمينها بمسافة باب .. بنفس الخطوات الهادئة الواثقة مشوا على مكتب السكرتيرة الكآنت مُنشغلة في اللآبتوب ، انتهت لصوت خطوتهم ، رسمت على وشها ابتسامة عمل مُزيّفة ، وقفت على حيلها ، وقآلت بترحيب :

أهلا أهلا ، نورتوا المكتب

وليد : منور بي نأسو

السكرتيرة : اتفضلوا اتفضلوا * وأشّرت لهم على الكرآسي الكآنت قدآم مكتها * ..

قعدوا وكلهم رأسمين ابتسامة على وشهم ،

السكرتيرة : انتو الجآيين لمقابلة العمل ، صح ؟

عماد : أيوا نحن ..

السكرتيرة : الأستاذ سيف مشغول حآليآ ، خمسة دقائق كدا ويفضى ليكم ،

عماد : اتفضّلي ..

دخلت المكتب وبعد ثواني جات راجعة لهم

السكرتيرة : أوكي ، الأستاذ سيف فاضي، تقدرُوا تدخلُوا لهُو..

عماد شأل ملفو من المكتب وقَام على حيلو مع وليد ،.. دخلو المكتب الكآن بختلف في

تصميمو عن بقية المكاتب في المبنى ، بابتسامة مُزيّفة قَابلهم الأستاذ سيف ؛ رجل

الأعمال الأول في السودان ..

قعدوا على الكراسي قدّام مكتب الأستاذ سيف ، بعد ما تهأني السكرتيرة أشّرت لهم إنو

يقعدوا ..

السكرتيرة بتتكلّم مع الأستاذ سيف : حضرتك ديل هم الجآيين عشآن مقابلة العمل ، دآ

عماد خريج جامعة السودان إدارة أعمال ، وهو الجآي للوظيفة ، ودا وليد صاحب

عماد جآي معَاهو مُرافق بس ..

سيف باحتقار: أيوااا ..

السكرتيرة : تطلب حاجة سعادتك ؟

سيف : لآلا ، بس أقفلي الباب دآ وراك .. خلّيني أشوف حكاية الأستاذ دا و صحبو ..

السكرتيرة : أوكي عن إذنكم ..

وطلعت وقفلت الباب وراها ..

أما الأستاذ سيف ختّ يدينو على المكتب وشبك أصابعو ببعض وقال بنبرة إستحقار:

منوّر الشركة يآ أستاذ ، قلت لي إسمك منو ؟

عماد و متجاهل كمية الإحتقار البوجهها لهُو سيف : إسمي عماد ..

سيف : أيوآ عماد .. منور الشركة

عماد المتوتّر: الشركة منوّرة بنأسها يا أستاذ ..

سيف : جآي من وين يا عماد ؟

عماد : من بحري شمبآت حضرتك ..

سيف باستغراب : شمبآت ؟ لآلآ أكيد معآك شهادات وبكالوريوس ودكتوراة ودرجة

الأستاذية كمان عشان تحي المسافة دي كلها من شمبات ، ولا شنو ؟

عماد اتنحج وقال : لآلآ حضرتك ، أنا جاي بشهادة تخرج من جامعة السودان إدارة أعمال و عندي شهادة دورة إنجليزي من معهد كامبريدج البريطاني ، وماخذ دورة حاسب

..

سيف : أيواا ، وطيب جاي من شمبات ليه ؟ من عدم الشغل في شمبات يعني ؟

عماد : يا أستاذ أنا من ما اتخرّجت بفتّش لي في شغل ، سواء في شمبات أو غيره .. ما

لقيت غير شغل السوق سبّاك أو طلبة أو عتّالي أو مكنيكي أو بتاع كهربا ..

سيف الكان بزید في استفزاز عماد : طيب وما تشتغل في الشغلانيات دي ، الشغل عيب

؟

عماد : لا حضرتك ما عيب ، بس أنا ما شغال لنفسي ؛ شغال عشان عندي أخوان أيتام

برّي فهم والأنا بجيبوا في اليوم ياأدوب يكفّي حق الأكل والشراب .. وبعدين أنا طالب

جامعي خريج ما درست خمسة ولا أربعة سنوات عشان أشتغل في السوق ..

سيف باستهزاء : وقالوا ليك الشركة دي فاتحة الباب لأي هامل عشان تجيني بورقك دا

وكأنك ضامن إنك ح تشتغل عندي ؟

عماد الطّعنوتو كلمات سيف قبض يدّو من الغضب وقال بنبرة جادّة : مش حضرتكم

قلتوا في الاعلان إنكم طالبين خريجين بجميع الشهادات ؟

سيف بتريقة : هه ! ما اتوقعت بجوني ناس زي أشكالك دي !!

عماد الختّ الورق بعصبية على المكتب : يا أستاذ ! عندك لي شغلانية ولا لا ؟

اتدخّل وليد عشان ينقذ الموقف قبل ما يشتد : آآ معليش يا أستاذ ، بس هو كدا أصلاً بعصّب بسرعة الله يهديهو ، ممكن نعرف إذا في شغل ليهو ولا لا عشان نحن لسه ورانا مشوار تاني ..

سيف العجبتو طريقة وليد في الكلام : كل الحكاية إنو شهادتك دي يا محترم ما تحتاجها في الشغل الحاديك ليهو دا ..

عماد : كيف يعني ما بحتاج شهاداتي ؟

سيف : الشغلانية الأنا دايرك ليهو بسيطة شديد وراتبها عالي جدّا مقارنة مع كمية الجهد البتبدلو فيها ، بديك ٥ مليون في الشهر عليها .

عماد : أنا يهمني أعرف طبيعة الشغل أكثر من كمّية الراتب ..

سيف : ممتاز ، يمكن أكيد إنت بتعرف المرحوم أخوي عادل خليل ..

عماد : الصّراحة لآ ..

وليد : أيوا أيوا بعرفو أنا ، خير مالو ؟

سيف : طبعا هو عندو بت مسكينة يتيمة أمها ماتت من يوم ما ولدتها وأبوها الله يرحمو اللي هو أخوي مات قبل أربعة شهور تقريباً ..

عماد : طيب ؟

سيف : البت طبعاً وحيدة اتعمت بعد ما أبوها الله يرحمو إتوفّي ..

عماد الكآن مندمج مع سيف : أوكي ..

سيف : طبعاً أنا ما فاضي وأولادي كلهم بيقرأوا وما في أي زول فاضي ، وهي ما بتعرف الدّرب عشان كدا داير لي زول يكون معاها يوجّها ويسوقها مكان ما تحب تمشي

عماد المآ فاهم طبيعة شغلو بالحكاية دي كلها : اهاا ..

سيف : طبعاً دوام جزئي من ٧ صباحاً لغاية ١٢ مساءً وبعد كدا تمشي أهلك ،

عماد باستغراب : أنا ؟ أنا مالي ؟

سيف : مش انت المتقديم للوظيفة ؟

عماد : أيوا بس حضرتك أنا جيتك بشهاداتي وما أظن في وحدة من الشهادات دي

مكتوب فيها إنو أنا مُرشد للعُمي أو خادم ..

سيف : يا ابني قلت ليك شهاداتك دي ما ح تحتاج لهما ..

عماد بعصبية : يا سيدي أنا طالب خريج محترم درست أربعة سنوات عشان أشتغل شغلانية تتعلق بالتخصّص الأنا درستو وتعبت فيهو وكملت فيهو قروشي كلها ، ما جيتك هنا عشان تشغلني خادم لبت أخوك العميا ..

سيف ببرود : ح تعمل شنو يعني ؟

عماد القام بكل عصبية ورّمى الأوراق في وش سيف : بطلع من المكتب دأ بشوف لي أي

شغلانية تانية ، برجع لشغل السوق ، أنا أشتغل حرامي وشخّاد ولا أمد يدي ليك ..

سيف باحتقار : هه ! انت لولاقي شغلانية من البداية جيتني ليه ؟ اعترف بالحقيقة يا

ابني انتو عشان تعيشوا محتاجين قروشنا نحن و عرقنا البنتعب فيهو ، انتو على فكرة

بدوننا نحن ما بتساووا أي شي ..

عماد : يا سيدي الدنيا أرزاق والأرزاق بيد ربنا .. أنا ما مستعد أشتغل عندك عشان كم

قرش !

وطلع من المكتب بسرعة وقفل الباب وراهو ..

وليد التفت على سيف : معليش يا أستاذ أصلاً هو كدا دمو حارو عفيف جداً الشغلانية

دي ما بتنفع معاهو ..

سيف ورجع ضهرو على الكرسي : شوف ! دي الشغلانية الوحيدة ليهو هنا وصراحة هو مناسب ليها جداً ، دايـر، أهلاً وسهلاً .. ما دايـر، يمـشي يشوف ليهو كوشة يترزق منها ..

وليد : طيب حضرتك أنا بقنعوا ليك

سيف : البريـحك .. أنا كرامتو العاجبا هو دي بمسح بيها الأرض

طلع وليد من المكتب بسرعة لقي السكرتيرة واقفة على حيلها ومستغربة سألت وليد : في

شـنو؟

وليد : بعدين بعدين ، عماد وين ؟

أشـرت ليهو على جهة المصعد ، جرى عليهمو بسرعة قبضو من كم قميصو وطلّـعوا برا المصعد ..

عماد بعصبية : شوف الواطي الحيوان دا ، فاكريعني بالقروش ح أبيع كرامتي ؟

وليد : معليش عماد أهدي أهدي ..

عماد : أهدي كيف ؟ إنت ما شايف الحقيـر دا بقول في شـنو ؟

وليد : صلّ على النبي يا عماد ، صلّ عليه ..

عماد : صلى الله عليه وسلّم ..

وليد : عماد ما تبقى أناني ،

عماد باستغراب : أناني ؟ أنا ؟

وليد وختّ يدينو على أكتاف عماد : عماد إنت عارف كويس إنت جيت هنا عشان شـنو ،

مش عشان أخوانك المنتظرينك في البيت بفرحة عشان أخيراً لقيت شغل زي الناس ؟

شغل ح تقدر توفّر بيهو بقية احتياجاتهم بدل الأكل والشراب بس ؟

عماد بصوت مخنوق : أيوا يا وليد ، بس أنا اتربيت طول عمري عزيز ، ما بذل نفسي
عشان كم قرش !

وليد : مش قلت ليك ما تبقى أناني ، إنت الآن كل البتفكر فيهو كرامتك بس ! نسيت
أخوانك يا عماد ؟ نسيت مازن وطلبو لعربية ؟ ولا نسيت بيان والحاجات النفسها فيها
بس بتسكت ؟

عماد : طيب وكرامتي ؟

وليد و ضغط على أكتاف عماد بقوة : الدنيا كدا يا عماد ، أحياناً بتجبرك تدوس على
كرامتك عشان تقدر تعيش ، دنيا حقارة و جبانة ، بتحقر بالناس الضعيفين الما عندهم
حيلة ، أما الناس الشبعانين يعيشوا فيها مُرتاحين ، مافي عدل في الدنيا دي يا عماد ،
إنت لآزم تدوس على كرامتك عارف ليه ؟ عشان مازن بعدين لما يكبر ما يضطر كمان
يدوس على كرامتو لآزم تأمن ليه حياة كريمة يقدر منها يعيش عزيز مكرم ..

عماد رفع عينو في عيون وليد بإنكسار ..

وليد : عشان بتحيمهم يا عماد لآزم تضحّي عشانهم ..

عماد بصوت مخنوق غلب علمو الظلم والقهر والإنكسار والإحساس بالمهانة : عارف يا
وليد ؟ أنا عمري ما ألقى لي صاحب زيك ..

وليد بابتسامة : طيب يلا عشان نمشي نقدّم للوظيفة دي ، ..

(♫)-----*-----•♫•-----*----- (♫)

{ بَلَقَاكَ حِلْمٌ .. }

(.الحلقة التاسعة.)

" وَحَتَّى مَا يُوْجَعْنَا ، سَنَعْتَادُ عَلَيْهِ ! "

(♥)*.....•••.....*.....(♥)

في بحري - شمبات :

قاعد قدام البيت في عزّ الحرب بعد ما رجع من الشّرْكة .. وليد في البيت نايم أما سلطان في الجامعة على غير العادة ، والعم سعيد قافل الدكان .. حسّ بالوحدة .. مرّ عليه طيف أمو وذكرياتها .. ومرّ عليه طيف أبوه .. رُغم كل العملو فيهو ؛ إلا إنو اشتاق لأيامهم سوا ، الأيام الكانت جامعاهم مع بعض كأسرة وحدة .. حاجات بسيطة ما كانت بتعني ليه شي لما كانت موجودة .. حُضن أمو ، إحساسو بالأمان و أبوه موجود ، الشاي من يد أمو ، صوت غوايش أمو وهي بتصحهمو ، عمّة أبوهو وهو بيوزن فيها .. حاجات ما كانت بتعني ليهو حاجة لما كانت موجودة ، بس لما غابت خلّت مساحة فاضية في حياة عماد ، مساحة مستحيل تتملي .. إلتفت على البيت اتذكّر بيان ؛ هو عارف نفسها في حاجات كثيرة بس ما بتتكلم ، مسكينة اتحرمت من شبابها عشان تكون أم لطفل صغير يتيم ما شاف من الدنيا شي غير موت أمو ، اتذكر مازن و طلباتو وأسئلتهو لما بتنتهي و احساسو بالنقص عن بقية الأطفال في شمبات ، اتذكّر كلام وليد ، ابتسم ابتسامة جانبية صفراء وقال : عشان بحيم لازم أضيّ عشانهم ..

قام على حيلو دخل الصالة الهادية من كل شي إلا من صوت المروحة ، لقي بيان قاعدة في السرير وبتذاكر ووراها مازن نايم رفعت رأسها على عماد وابتسمت : أها ، نقول مبروك على الوظيفة ؟

عماد وقعد على السرير المقابل ليهما قال ببرود : أي باركي ساي ..

بيان وحسّت بعماد ما طبيعي : مالك يا عماد في شنو ؟

عماد : مالي ؟

بيان : ما إنت عماد الطلع قبيل من هنا وهو مبسوط .. في شنو ؟ المرتب شوية ؟

عماد : لالا ..

بيان : أها في شنو..؟

عماد عدلّ قعدتو وحكى ليها طبيعة الشغل و وقاحة سيف معاهو ..

بيان باشمئزاز: دا شنو القرف دا ؟ زول في منصبو المفترض يكون محترم ، شنو البياخة و

تقالة الدم دي ، ما تكون وافقت على الشغل بس ؟

عماد بأسى : أعمل شنو يعني ؟ مجبور ..

بيان : الجابرك شنو يا عماد ؟

عماد : إنت عاجبك النحن فهو دا ؟ أنا القروش البجيها بكمّلها في الديون ..

بيان : طيب ح تبدأ تشتغل من متين .؟

عماد : ماشي بعدين بعد العشاء للشركة تاني عشان نطلع أنا وسيف على بيتو وأعرف

دربو وأشوف البت وأعرف نظام البيت ومكان غرف البيت ونتفق على مواعيد الشغل

ونشوفها هي زاتها كان بتوافق ولا لا ..

بيان بتهميدة ورجعت تذاكر: ربنا يعينك يا عماد ويساعدك ..

عماد : أميين يا رب ..

(♫)-----*-----•♫•-----*----- (♫)

الخرطوم شرق - حيّ الرياض :

قدّام مبنى شركة العم سيف كأن واقف عماد مع الأستاذ سيف ومنتظرين سواق سيف

سيف : طبعاً البت دي كُل شغلك ح يكون معاًها دأخل البيت يعني بس تمشي المطبخ
الصّالة الحوش وكدا

عماد بپرود : يا أستاذ لو الشغل في البيت بس ، ليه ما جبت ليهأ مرة تشتغل عندها ؟
سيف بزهبج : شوف يا ابني ما عاجباك الشغلانية أمشي شوف ليك شغلة غيرها
أقضاهاا ..

عماد : أنا كنت فاكرا إنو مثلاً تمشي الجامعة أو السوق يعني أماكن لازم يكون معاها
راجل ..

سيف : لآ يا ابني ، أنا لو جبت ليهأ مرة تشتغل عندها ح تقول دايراها تببت معاها ، بس
إنك رآجل مستحيل يعني تطلب إنك تببت معاها ، ودا طبعاً تكلفتو أقل
عماد : يعني الموضوع أولاً وأخيراً التكلفة كم ..

سيف الكآن بعآين للسواق الجاي بالعربية من بعيد : بالظبط .. يلا يلا أركب ما عندي
وقت أنا

وصل السواق بالعربية عندهم وركب الأستاذ سيف قدام ، وعماد ركب ورا السواق ..
(.....•○•.....)

في فيلا الأستاذ سيف :

نزل سيف من العربية وجنبو عماد ، دخل البيت وعماد يتلّفت في فخامة الفيلا
وضخامة الحديقة اللي افكرها في البداية منتزه .. كأن ياسرومها وهيفاء وغيداء قآعدين
وبيشربوا الشاي في واحد من الطرآيز الحديدية الذهبية ، دخل سيف بابتسامة وسلّم
عليهم ، قعد على واحد من الكرآسي و متجاهل عماد الكآن وأقف زي الصنم ..

عماد في نفسو وكان بعآين لهيفاء وغيداء : وينها العمياً فيهم ؟ ماشاء الله الاتنين نظرهم
أقوى من نظري !

اتدخّلت غيداء بسرعة : وآو ، إسمك عماد ؟ يجننن إسمك

هيفاء لكزتها بكوعها : بس يا بت *ورفعت راسها على عماد* معليش أصلاً هي كدا

مجنونة

غيداء : مجنونة براك يا بت ..

أما عماد إكتفى بإبتسامة باهتة ..

إلتفتوا كلهم على صوت الباب الفاصل بين حوش ريم وحوش سيف ، كأن يأسر داخل
وساند ريم على يدّو وبعاين للأرض في خطواتها ، وصلوا عندهم .. قعدت ريم مكان يأسر
، أما ياسر وقف جنب عماد ..

سيف إلتفت على عماد : دي هي بت المرحوم أخوي عادل ، إسمها ريم

والتفت على ريم : ريم ، الواقف قدّامك دا اسمو عماد جبتوا ليك عشان يكون مرافق
ليك

ريم بصوت خافت : كتر خيرك يا عمو ..

سيف التفت على عماد وقال بنبرة حادّة : زي ما قلنا برّة البيت لا !

عماد هزّ رأسو بالموافقة : تمام

ياسر : تعي تبدأ دوامك من بكر السّاعة ٧ صباحا ،

عماد : طيب يا أستاذ ، أنا داير يوم إجازة ..

سيف بزهج : عندك الجمعة بس ،

ورجع ضهرو على الكرسي وولّع ليه سجارة وقال لياسر : قوم سوقو خلمو يتعرّف على
البيت ..

ياسر التفت على عماد بإبتسامة : تعال يا أستاذ خليني أوريك البيت ..

مشى عماد معاهو وعرفو على أجزاء بيت سيف وطلعوا من الباب الفاصل بين الحوشين
وعرفو على أجزاء بيت ريم وطلعوا قعدوا في حوش ريم ،

ياسر: بس يا سيدي ، دي الفيلا كلها كدأ

عماد باستغراب : والبت العميآ دي

ياسر بابتسامة : ريم قول لها ..

عماد : أوكي ، ريم بتعيش هنا براها ؟

ياسر بأسى : أيوا ،

عماد : مش هي أمها ميتة وأبوها ميت ؟ يعني هي أصلاً وحيدة ، تزيدوا عليها وحدتها ؟

ياسر : تقول شنوبس ، أبوي الله يهديه ..

ياسر وكانو إتدكر حاجة : طبعاً هي مخطوبة لأستاذ إسمو سعد ، وهي طبعاً ما عندها

تلفون ، يعني إتوقعو يجيها في أي لحظة

عماد : أوكي ..

ياسر : الله يعينك يا ريم ، من يومك والدنياً تلعب بيك يمين وشمال ..

عماد عاين لساعتو كانت الساعة ١١:٣٠ قام على حيلو وقال لياسر : أستاذنك يا أستاذ

ياسر قام على حيلو : قول لي ياسر ،

عماد : أوكي يا ياسر ، أستاذنك أنا لازم أطلع الآن عشان ألحق الموصلات و ما أتأخر على

أخواني ..

ياسر باستغراب : موصلات ؟ وتركب الموصلات ليه يا عماد ؟ خليني اوصلك بعريبيتي .

عماد : لآلا كتر خيرك ، بمشي بالموصلات ..

يأسر: علي بالطلاق ما تمرق من هنا إلا بعربيتي ..

عماد بابتسامة : ما تطلق سآي يا ياسر.. بالمواصلات بمشي ما مشكلة .

يأسر: حرّم أطلّقها هي المآ جات ، تمشي الليلة بعربيتي يعني تمشي بعربيتي ،

تحت ضغط ياسر على عماد ، وأفق عماد إنو يمشي بعربية ياسر..

(♫)-----*-----•♫•-----*----- (♫)

مرّ أسبوع وعماد شغال مع ريم ، مكان ما تمشي هو معاها

بوصّلها أي مكان ، وكان لسه ما عارف عنها أي شي ، غير إنو إسمها ريم

ومخطوبة وأمها وأبوها ميتين .. وإنها جميلة ، جميلة شديد !

أما ريم ما كانت مُرتاحة لحكاية إنو معاها رآجل غريب في نفس البيت ، بس عارفة إنو
عمّها ما ح يدّيهما أكثر من كدا فقررت إنها تسكّت على الحاصل ، ما كانت عارفة عنو غير
إنو اسمو عماد و إنو محترم ، ما حصل مرّة اتكلم معاها في حاجة غير شغلو ، وبس !

(♫)-----*-----•♫•-----*----- (♫)

{ بَلَقَاكَ حِلْمٌ .. }

(.الحلقة العاشرة.)

" الأُمُّ إن رحلت ! فعلى الدُّنيا السَّلَام "

(♥).....*.....•••.....*.....(♥)

في بحري - شمبات :

بعد أسبوع من شغل عماد عند الأستاذ سيف ومزاجو المقلوب من أسبوع ، الليلة الجمعة ، إجازتو الوحيدة ، كأن قاعد في دكان العم سعيد مع سلطان ووليد وبتونس ، عاين لساعتو كانت الساعة ٥ عصر ، قام على حيلو واستأذن منهم ، ومشى على البيت في طريقو للبيت شآف ركشة بتقيف قدام البيت استغرب وأسرع بخطواتو عليها ، وصل عند البيت شآف عمّو بتنزل من الرّكشة ، كشر وشولكن ملامح الإستغراب كانت أكبر لأنودي أول مرة وأحد من أهل أبوه يحي يزورهم ، مشى على عمّو الكانت بتدفع الحساب لسيد الرّكشة إلتفتت على عماد الكآن واقف بعيد مّنها شوية ، بشوق مصطنع مشت عليه وضمّتو

زحّ منها عماد باستغراب : أهلين عمّتي !

عمّتو : شنو الجفا دا يا ولدي ؟

عماد باستغراب أكثر وبرود فتح الباب : إتفضّلي يا عمّتي ..

دخلت البيت كآن الحوش مكنوس ومرشوش بالموية وفي سريرين في نصّ الحوش مفروشة ، و الجو جميل .. قعدت عمّتو على واحد من السراير ، أما عماد قعد على السرير المقابل ليها

عماد : تشربي حاجة يا عمّتي ؟

عمتو بفرحة : آآي والله عريس الهنآ ، سمح ومن نآس معروفين ومحترمين ومرطب
وقآآري ، جاني قآل دآيرها ، بس قلت آشوف رآيك

عمآد : أول شي أرفضهو ، بعدين هو عرف كيف إنك عمتهآ وإنتي آخر مرة شفتيها قبل
خمسة سنوات ؟

عمتو : أرفضو ؟ أرفضولييه ؟ إنت مآك نصيح ؟

عمآد : عمتي ! بيآن السنة الجآية ممتحنة ' دآيرها تكمل قرآيتها بعدين العرس ملحوق
عليه

عمتو : وهو مآ بيمنعا القرآيه ، أصلاً هم نآس متحضرين

عمآد : هو صح مآ بيمنعها ، بس تقدري تقولي لي ح توقق كيف بين بيتها وقرآيتها ومازن ؟

عمتو بحدّة : مازن دا منو ؟ هوي يآ عمآد الجني دآ مآ ولدنآ ، يمشي يشوف أموين ،

عمآد بنهرة : آي مآ ولدكم ! دآ أخوي أنا وبيان ح نريمو لغآية ما يكبر ، الولد دآ امانة في
رقتنا نحن الاتنين

عمتو بعصبية : وهي شغلتهآ شنو تضيع نفسها وتطفش العرسان عشآن الشآفع دا ؟

عمآد بنفس العصبية : عمتي ! الشآفع دا يتيم وما شاف من الدنيا غير موت أمو ،
دآيراهو يمشي وين لو بيان عرست ؟

عمتو : وهي ذنبا شنو تبقى لهو أم ؟

عمآد وبدآ يغلي من العصبية : ذنبا شنو ؟ طيب أنا ذنبي شنو أبقى لهم أب ؟ ذنبي شنو

أبقى لهم أخوهم الكبير ؟ ذنبي شنو إنهم يبقوا مسؤوليتي ؟ نحن مآ عندنا أي ذنب في

العملوا منصور فينا !!

عمتو بنهرة : منصور ؟ منصور دآ يبقى أبوك يآ قليل الأدب يآ عديم التربية

عماد واخفت عصبيتو: فعلاً أنا عديم تربية ، هه ! والحيريني منو أنا ؟ ما هو دا أبوي هارب وأمي ميتة وأهل أبوي ما جايين لينا خبر ، ح أعرف التربية من وين ؟

عمتو بهدوء : البت دي أنا ح أعرسها للزول المتقدم لها دا ،

عماد بسخرية : لا كتر خيرك مهتمة لها شديد ، مش دا كلو عشان تلهطوا مهرها ؟

عمتو : ولد ! أنا في النهاية عمّتك إحترمني !!

عماد شدّ على أسنانو وقال بعصبية بأردة : بيان دي ح تتزوج على جُنتي ،

عمتو عارفة إنو عماد رأسوقوي ومأ بيحي بالقوة حاولت تهدي فهو : كدي دقيقة يا عماد يا ولدي الولد من ما شافها طالعة من خشم بيتنا جاني طواالي وقال لي تعقدولي عليها حسسي دي ، قلت لهو نشوف رأي أخوها أولا

عماد باستغراب : طالعة من بيتكم ؟ بيان ؟

عمتو : آاي

عماد بنفس الدهشة والاستغراب : متين الكلام دا ؟

عمتو : أول أمس ولا قبلو ما عارفة

عماد : وجأتك لشنو ؟

عمتو : عاد دا كلام ؟ كيفن يعني جاتي لشنو ما عمّتها !

عماد وقف على حيلو وقال بعصبية : البت دي أنا مانعها إنها تجيكم ، جأتك ليه ؟

عمتو بتردد : آآآ ، جاتي .. ق قالت دايرة لها قروش تشتري بيها ملابس لعرس صحبتها ..

عماد : متأكدة من الكلام دا يا عمتي ؟

عمتو : ح أكذب عليك يعني ؟

عماد بصوت عالي : يا بيان ، بيان ، يا بت !!

جأت بيان طالعة من الصلاة بسرعة بعد ما سمعت عماد ، اتسمرت لما شافت عمّتها

وقفت مكانها وقالت بخوف : ف..في شنوياً عماد ؟

عماد يهدوء أشّر لها : تعالي يا بيان ..

بيان جأتو بخوف وهي مترددة

عماد مسكها من يدها وأشّر لها على عمّتها : بتعرفي دي منوياً بيان ؟

بيان هزت رأسها وهي خائفة : أيوا ، عمّتي

عماد : قالت إنو جاك عريس محترم وود ناس ،

بيان بتردد بلعت ريقها وقالت لهو : البتشوفو إنت يا عماد

عماد : عمّتي قالت إنك مشيتي لها يا بيان

بيان عاينت في عمّتها وعيونها مليانة خوف ..

فكّ يدها وعاين في عيونها : أنا مش منعتك يا بيان تمشي لهم ؟

بيان سكتت وعاينت في الأرض ،

عماد : إستغلّيتي حكاية إنو شغلي بخليني أكون برا طول اليوم و مشيتي من وراي ؟

بيان ساكتة ..

عماد بعصبية : مشيتي تشحدي عمّتك الما جأبة ليك خبرياً بيان ؟

بيان على نفس حالها أما عمّتها ساكتة مكانها ،

بدون مقدمات رفع يدو وأداها كف : اتكلّمي يا بيان ،

عماد بعصبية : أنا شغّال عشّان منو ؟ عشّان أجيب لي جلكسي ولا ألبس كباية ؟ مش
شغّال عشّانك إنتي ومازن ؟ حوّجتك لحاجة يا بيان ؟

بيان ودموعها نزلت : أيوا أيوا حوّجتني كثير يا عماد !

عماد بدهشة : حوجتك ! حوّجتك لشنو يا بيان ؟ مش قاعد أجيب ليكم أحسن حاجة
في السوق ؟ أنا بشقى في عزّ الحر وبتحمّل النذل والمهانة عشّان أجيب ليكم لقمة حلال !!

مش كان أمشي أي طريق بالحرام ؟

بيان ودموعها على خدودها وبتشهق : إنت فاكركل حاجة أكل بس ؟ أنا دايرة حاجات
زي زي باقي البنات ، هم أحسن مني في شنو ؟

عماد بسخرية : هه ! هم أبوهم ما هرب ولا أهمم مآت !

بيان بشهقات مقطوعة : وأنا ذني شنو طيب ؟

عماد : لآلا أبدأ ما عندك ذنب ، زي ما أنا برضو ما عندي ذنب في الحكاية دي

قربّ منها ومسكها من يدها بقوة : هدي عمّتك دي جآت عشّان تسوقك وتعرّسك لوأحد
قالوا مرطّب ، يعني ما ح يحوّجك لأي شي ، مبروك يا بيان ..

وفكّ يدها ومشى على عمتو : سوقيهأ ودربك عديل !!

طلع من الباب بعصبية وهو بيحلف إنو ما ح يرجع تاني ..

مشت عمّتها على بيان وقالت بفرحة : ها الهيلة دي ؟ بتبكي عشّان المتخلف دا ؟ بركة
ياخ الله حلانا منو ، أرحكي شيلي شنطة لبيّ فيها ملابسك ويلاكي معاي ، الجنى الصغير
دا شو في ليك مكان ختّيو في ، أنا برجاي هنا ..

(♫)-----*-----•••-----*----- (♫)

في مقابر شمبات :

دخل من باب المقبرة وقال بخشوع : السلام عليكم دار قوم مؤمنون ، أنتم السابقون
ونحن اللاحقون

دار بعيونو في المقابر لغاية ما وقعت عينو على قبر مكتوب عليهو : هُنَا تَرَقَد المرحومة "
ندى الخير"

مشى بسرعة على القبر وقعد على رُكبو وانحنى على القبر يبوس في كل ذرّة من ترآبو و
دموعو تسقي في القبر رفع رأسو ودموعو سآيلة على خدودو قال بهدوء :

إزيك يمة ! مرتآحة ؟ اشتقت ليك يمة !

يمة تتذكري لما كنت بقول ليك نفسي أتخرج من الجامعة وكنتي بتضحكي وتقول لي
خِص المدرسة أول ؟ أبشرك يمة اتخرجت من الجامعة ، شفتي ! مُش قلت ليك أنا
قدرها !!

تتذكري يمة لما قُلت لي دايراك تدخل تدرس انجليزي ، وأنا كنت رافض ، قلت ليك ما
بضيع عُمرِي في لغة ، بس أنا الآن أخذت دورة في أحسن معهد لتعليم اللغة الانجليزية
وظلعت بشهادة يمة ،

تتذكري النيمة الزرعناها سوا يا يمة ؟ كبرت وبقوا شفح الحلة بيقعدوا تحتها وقت الحر
، تتذكري يمة لما كنتي بتقول لي : يا عماد الناس انخلقوا نوعين ، نوع سعداء ونوع
بيحاول يسعد غيرو ؟ عآرفة إني فشلت أكون من النوع الأول ؟ بس يمة أنا بحاول أكون
من النوع التآني .. !! زيك كدآ ،

يمة ما تشيلي هم بيان ، بيان ح تزوج قريب وأحد مرطب وفاهم وما حيحوجها لحاجة
زي ما كنت أنا بعمل ، ومازن الله يقدرني أسعدو ..

أمي أنا اشتغلت مرآفق لوحدة عميا ما عاجبني الشغل ، بس بحاول أحتسب الأجر ،
أمي الدُنيا دي ظالمة !! ظالمة شديد والله ، نآس بتآكل في نآس ونآس بتعيش على أكتاف
نآس ، نآس غشآشة و غدآرة بتآكل في لحوم بعض ، نآس بتحقرو بالغلآبة المسآكين

عشان ما عندهم صوت ، دُنيا حَقارة بتلعب بينا يمين وشمال وتمشينا زي ما تحب ، ما
زي ما نحن بنحب !

يُمة اشتقت ليك ، والله من يوم رحلتي والدُنيا سودا في عيوني !

راضية علي يُمة ؟ أنا ما داير شي من الدُنيا غير إنك تكوني رحلتي عني راضيه علي

دموعو بتروي في قبر أمو ، وذكرياتها رجعت ليهو ، قعد مكانو و غتّى :

سببيني يُمة مشيتي وين ؟

في الدُنيا ليه مُرة السنين؟

سآقك قدر قآسي وحزين ،

فآيتاني ماشة معاهو وين ؟

يا يُمة كُنتي بتحكلي لي .. أكبر و تمشي تخطبي لي

وتحنيني تغني لي .. عديل وزين وتباركي لي

الدُنيا يمة ملانة خوف .. لآ فيه ريد لآ زول عطوف

وأنا كان مُنאי لولا الظُروف .. أحج معاك نسعى ونطوف

في كل صباح بشتاق أجيك .. أكوس لحضنك وأبوس إيديك

وتقول لي بالحنية دي .. يا جنائي عفوي ورضأي عليك

الدُنيا يمة الشتتنا .. وما فيها خير الفرقتنا

ضيعتنا ووترتنا .. ومن صغار جات يتمتنا

مشتاق يا يُمة أنا لي سنين .. لحضنك الدآفي الحنين

الكون بلاك أصبح حزين .. يا يُمة وينك لي وين !

رقد متوسِّد دموعو الغسلت قميصو وملتفِّح أحزانو السَّقت قبر أُمُو ، كآن يوم كئيب نأم
فيهو عماد جنب أُمُو .. لأول مرّة من خمسة سنين !

{ بَلَقَاك حِلْم .. }

(.الحلقة الحادية عشر.)

"رجولتك تكْمُن في معاملتك للأخريات ، لا لعرضك فقط !"

(♥).....*.....••.....*.....(♥)

في الخرطوم شرق - حيّ الرّياض :

في حوش ريم صباح اليوم التاني الساعة ٨ صباحاً وعماد لسّة ما جا ! ، كآنت ريم
قاعدة ومعاها غيداء ..

غيداء : والله يا ريم لو شفقي الشاب المرآق ليك دآ ..

ريم باستغراب : مآلو ؟

غيداء : قرررض قرررض !

ريم إبتسمت إبتسامة خفيفة ،

غيداء بحمّاس : عيونو يا بت جمييلة ! عآرفة لون غريب كدآ ! بني على عسلي على زيتي
على مآ تعرف شنو ، بس حلوة والله حلوة ،

خالد عاين للفيلا ورجع عاين لسعد : يعني بعد ما أبوها مات ، جات سكنت مع عمها ؟

سعد : بالظبط ..

خالد وفتح باب العريّة : أنزل يلا ..

نزلوا من العريّة و البوّاب فتح لهم الباب بعد ما عرف إنودا سعد خطيب ريم ، قابلهم ياسر في حوش الفيلا سلّم على سعد وعاين لخالد بحقد وكراهية وقال ليه : إنت الجابك

هنا شنو؟

خالد بغرور: ما جاي عشان حضرتك أنا !!

ياسر: لاحظ إنو أنا ساكن هنا ودا بيتي ..

خالد : أنا جاي مع سعد ..

ياسر إلتفت على سعد باستغراب منتظر منو يشرح ليه سبب جية خالد معاهو ،

سعد بتوتّر: آآم ، إححم ، هو في الحقيقة ، نحن كنا ماشين على البيت ، بس قُلت

أغشى ريم وهو كان معاي في العريّة ونزلنا سوا

ياسر الكآن شاكّي في الموضوع : أيوااا !

سعد : ريم معاهها زول يا ياسر؟

ياسر: أيوا معاهها المرافق الجديد ،

سعد : أيوا ، يلا نستأذن نحن ..

ومشوا على بيت ريم مخليين ياسر مُحْتار في خالد

(.....•○•.....)

في بيت ريم :

قاعدة في الصّالة وبتسمع في الأخبار في التلفزيون ، وفي كنبه تأنية قاعد عماد وبالو مشغول ببيان و مازن ، من لحظة ما طلع أمس من البيت ما رجع تاني ، سرحان وما قطع سرحانو إلا صوت نأس برا الحوش ، ريم اتلقّت بتفتّش على عماد : عماد ، عماد ؟

عماد : أيوا أيوا ، انا هنا ..

ريم : دا منو الجا دا ؟

عماد قام على حيلو : ما عارف والله دقيقة بس أشوفو ..

ريم : اوكي ،

طلع عماد الحوش وسمع صوت ضحكات جاية من الباب الفاصل بين الحوشين ، شاف اتنين جايين على بيت ريم مشى عليهم ووصل عندهم ،

خالد باستغراب : إنت منو ؟

عماد باستغراب أكثر : إنت المنو ؟

سعد واتدكر كلام ياسر : شكلك كدا مرافق ريم ، صح ؟

عماد : أيوا أنا هو ، إنت منو ؟

سعد ومدّ يده وسلم عليهم : أنا سعد ، خطيب ريم ..

عماد وسلم عليهم : دا منو المعاك دا ؟

خالد بغرور : هوي هو دا تحقيق ولا شنو ؟ زحّ لينا خرينا نمشي ..

عماد : معليش يا أستاذ بس دا برضو من ضمن شغلي ، وريم سألتني دايرة تعرف دا منو

البرّ دا !

خالد : هه ! تيجي تسألني أنا شخصيا ؟ إنت قايل روحك منو لما تيجي تتكلم معاي !

عماد وكأتم عصبيتو: يا أستاذ قلت ليك دآ شُغلي !!

سعد ادخّل قبل ما تحصل مُشكلة: آآ معليش يا أستاذ ، دا خالد .. صحي ..

عماد والتفت على خالد : مش كان ممكن تقول كدا وخلص ؟

و أدهم ضهرو راجع على بيت ريم ، دخل عندها ووقف عند الباب وقال : يا أستاذة ، دا

واحد قال إنو سعد خطيبك ، ومعاها زول قال إنو خالد صحبو ،

ريم وقفت على حيلها بخوف : خَ .. خآ..لِد !

عماد ومستغرب من ردّة فعلها : أيوا خالد ،

ريم و أصابعها بترجف : دَ داير شنو ؟

عماد : ما سألتهم والله *ولاحظ لرجفة اصابعها وخوفها* تحيي أمشيهم ولا أخليهم يدخلو

؟

ريم : لالا خليهم يدخلوا ، بس إنت كمان خليك معاي ، ما تمشي

عماد ولاحظ كمّية الخوف في ملامحها : طيب إن شاء الله

وطلع من الباب ونادى سعد و خالد ..

دخل سعد الصّالة وجنبو عماد ، خالد الكآن مآشي بكل غرور وكبرياء دخل من باب

الصّالة ، اتسمّر مكانو لما شاف ريم واقفة ونظراتها مُشتتة ، اتأكد إنو هي فعلاً عمياء ،

اتوتّر واتعرقّ و غرورو اختفى وكبرياؤو اتلاشى ، حسّ بالذنب وهو بشوف ريم عمياً ! ما

استحمل فكرة إنها عميا وما ح تشوفوتاني ،،

مشى عليها بخطوات بطيئة ثقيلة وصل عندها ووقف قدّامها ، قال بصوت مخنوق :

ريما !

ريم واقفة مكانها والدموع اتجمّعت في عيونها ..

خالد مدّ أصابعه الرّاجفة جهة عيونها وقال بصوت مخنوق : حبيبتى ! شايفاني ؟

ريم بأسى: أشوفك كيف يا خالد ؟

خالد ودموعه خنقت عيونو: كيف ما شايفاني يا ريم ؟ مش انا خالد ؟ حبيبتك ؟

ريم بتوتّر: حبيبي ؟ خالد مُش نحن انتهينا من الموضوع دا ؟

خالد بعصبية ودموعه مغطّية على عيونو: لآ ما انتهينا من الموضوع دا ! شُفتي ! شُفتي

حصل شنو لما انتهينا ؟

ريم واقفة مكانها وخايفة ..

خالد بشرّ: قُلتي لي نفترق عشان ما دايرة أجيب لأبوي سمعة وما دايرة الناس تعرف
وتتكلّم فينا ، لآ وكمان قلتي دايرة تقري ! لما ألاقيك ارتبطتي بإبن عمك الواطي دا ياسر ؟

ريم بتوتّر: ياسر ولد عمي وزي أخوي بس !

خالد بنفس العصبية : ياخي ؟ لا واضح إنوزي أخوك ، عشان كدا ما شاء الله داخله و
طالعة معاهو ، وما شاء الله في أي حديقة ألاقيكم مع بعض !

ريم : خالد صدّقني !

خالد : لآ ما بصدّك ! كذبتى علي ، وقلتي لي عشان الناس لو عرفو بعلاقتنا ح يتكلموا
فيك ويجيبوا مشاكل لأبوك ، أها تابعتي لي ياسر لغاية ما جاها ليك كبيرة !

ريم ودموعها نزلت على خدّها قالت وهي بتبكي : بس يا خالد بس !

خالد كملّ ومتجاهل ريم : لعب بيك وكذب عليك ، لغاية ما في النّهاية لعب بشرفك ،
ومشى وخلاّك ، لآ كملّتي قرابتك ، وهدمتي سمعة أبوك وقتلتهمو وعميتي إنتي ! لأنو لعب

بيك وخلاّك وإنّت حامل !

عماد الكآن سأكت من البداية إستفرتوا كلمات خالد وقف على حيلو بسرعة وقال بعصبية : بس يا أستاذ كفى ! أنا لي أسبوع في البيت دأ ، وما بعرف عن ريم أو عن ياسر كثير ، بس الشي البعرفو إنودا مُستحيل يحصل ، ياسر ما من التوعية الإننت بتتكلم عنها ، وريم ما بالضغف الإننت شايفو ، دي أعراض ناس بطّل تآكل فيها ! خالد بعصبية : أهأا وإننت الحشرك شنو ؟ أطلع منها عشان ما تسمع كلام ما بيعجبك ! عماد : أنا عندي أخت و ما كُنت ح أرضى إنوزول يتكلم عنها كدا ، دا في النهاية شرف وما فيهو لعب !!

خالد : ياخ انت مالك ؟ إننت بس أطلع منها !

عماد : أنا راجل ، عارف يعني شنو راجل ؟ يعني الما برضاهو لأختي ما برضاهو لبنات الناس ! *والتفت على سعد الكآن قاعد وكأنو ما سامع شي* وإننت يا أستاذ ! ما راجل ؟ البت البيتكلم فيها دي تبقى خطيبتك ، يعني كلها فترة وتبقى مرتك ! ح تبقى عرضك يعني !!

سعد سكت وعارين في الأرض وكأنو عماد ما بيقصدو بالكلام دا ..

عماد مشى على خالد وقال بهدوء : ممكن تطلع يا أستاذ من هنا ؟

خالد بدهشة : ما يكون بيتك و أنا ما عارف !

عماد شدّ على أسنانو : أنا كم مرّة قلت ليك دا شغلي وبأخذ فيهو قروش ، أطلع ما أنادي ليك ياسر وأستاذ سيف !

خالد إلتفت على سعد : سعد ! قوم يلا *وعارين في عماد* عندنا شغل مع الأستاذ دا نتمو يوم ثاني !

وطلع من الباب ولحقو سعد ..

عماد إلتفت على ريم الكأنت قاعدة في الكنبه وبتبكي ، مشى عليها وبقى يهدّي فيها :
خلاص يا ريم عشان ياسر ما يجي .. خلاص خلاص بكلم الأستاذ سيف وهو بيعرف
يتصرف معاهو !

ريم رفعت رأسها وقالت بصوت خافت : شكراً يا عماد !

عماد بابتسامة : شكرا على شنو ؟ من واجبي كراجل إنو كان أَدافع عنك !

ريم يهدوء : لوكل الدنيا فيها رجال !!

(♫)-----*-----•♫•-----*----- (♫)

{ بَلَقَاكَ حِلْم .. }

(.الحلقة الثانية عشر.)

"وليس كلّ ماضٍ سعيد ! بعضه يؤلم بشدة !!"

(♥).....*.....•♫•.....*.....(♥)

في بحري - شمبات :

انتهى من دوامو ورجع البيت ، كآنت الأنوار مطفيّة و البيت هادئ قال في نفسو: يعني

سأقت بيان معاها ؟

دخل الصّالة وفتح النّور وقعد على السّرير وختّ رأسو بين يدينو بأسى ، سمع صوت

الغرفة بينفتح عاين جهة الغرفة طلعت بيان منها ، عاين فيها بإستغراب ، بيان شافتو

وجات قعدت جنبو وقالت بصوت مخنوق : عماد ! كُنت وين ؟ من أمس ما جيت !

عماد الكآن مُستغرب قال بهرود : يعني فرقت معاك كُنت وين ولا وين ؟

بيان ودموعها نزلت : كيف ما فرقت معاي ؟ عماد أنا أمس ما نمت كنت منتظراك !

مشيت وين ؟

عماد بنفس البرود : كُنت مع أمي ..

بيان : عماد ، أنا ما مشيت مع عمّتي وقلّتها لهما ترفض العريس الإبتدّم لي ..

عماد : تمام

بيان ورجعت تبكي : عماد إنت لسة زعلان مني ؟

عماد وقام على حيلو : أنا طالع أنوم برّا ..

وطلع نّام في الحوش مخّلي بيان في الصّالة تبكي ..

(.....•○•.....)

صباح اليوم التّاني :

طلع عماد من الصّالة بعد ما جهز عشان يطلع ، لقي بيان طالعة ومعاها مازن استغرب

عماد ببرود : سايقة مازن وين ؟

بيان : قالوا عندهم إجازة الليلة ، سايقاهو معاي المدرسة ..

عماد : وعادي ؟

بيان : عادي ، المعلّمات عارفين إنوما في زول يقعد معاهاو عشان كدا !

عماد : أيوا ، طيب إنتبهي ليهو ..

بيان : إن شاء الله ..

وقعد على السرير يرتّاح قبل ما يطلع على الدوام ، قرّبت منو بيان وقعدت جنبو .. قالت

بصوت خافت : عماد ، لسه زعلان مني ؟ ما كان قصدي والله ،

عائن في ساعتو وقام على حيلو : أنا إتأخّرت على الدوام ..

بيان مسكتو من قميصو وقالت بنبرة مكسورة : عماد ! معليش يا عماد ، جد والله آسفة

، تاني ما بكبّر كلامك ولا بمشي لنأس عمّتي !

عماد مسكها من يدها وقعدّها : طيب طيب كدي أقعدي

قعدت في السرير المُقابل لهو ،

عماد : يا بيان ، عمّتي ولا يهّمها مصلحتك ولا تعرسي منو ولا منو ، إنتي عارفة إنو من يوم أبوي مرق ما جونا ؟ ولما أمي ماتت الله يرحمها ولا زول فهم جا عزّانا ؟ أنا بس كان غايظني إنك ما سمعتي كلامي ومشيتي من وراي وخليتي مازن المسكين براهو ! أصلا هم ما معترفين بمازن إنو أخونا ، بس عشان ما من نفس الأبو ..

بيان ودموعها على خدها : خلاص يا عماد جد والله بسمع كلامك تاني ، سامحني وما

تزعل مني

عماد بابتسامة : خلاص يا بيان ، مافي مُشكلة *وطّلع قروش من جيبو ومدّاها لها* أنا كمان مُقصر معاك ، شيلي ديل اشتري بيها الحاجات الدايراها ،

بيان مسحت دموعها وقالت بابتسامة : ناقصنا سُكر ، ولبن بدرة تقريبا

قاطعها عماد : لالا إشتري بيها حاجات ليك إنتي ، حاجات البيت ميزانيتها براهها ..

بيان قامت وحضنتو : ربنا يخلّيك لي يا أحسن أخ في الدنيا ..

عماد بابتسامة : ويخلّيك يا أحلى بيان !

قامو وطلعوا كلهم من البيت وقفلوا الباب ، في طريقو مرّ عماد على دكان العم سعيد ، لقي وليد وسلطان هناك سلّم عليهم ..

سُلطان : إشبك يا وآد من يوم ما اشتغلت ولا عاد تسأل عننا ! لا يكون شفت نفسك

علينا بس !

عماد : معقولة يا أخ ! أنا أقدر ؟ بس إنت عارف أنا بطلع ٧ الصبّاح وبرجع ١٢ المساء

وإجازتي يوم واحد بس !

سُلطان : الله يعينك بس !

وليد : بالمناسبة يا عماد ، ما داير ليك إقامة للسعودية ؟

عماد باستغراب : إقامة ؟ ليه ؟

وليد : سُلطان قال أخوهو شغال بيطلع إقامات قال ممكن يطلعها لينا بسعر رخيص وفي وقت سريع ..

عماد : كويس والله ! بس إنت عارف ، بيان ومازن وما بقدر أخلهم براهم ، ولا بقدر أطلع لكل واحد فيهم إقامة .. إنت ح تطلع ليك إقامة ؟

وليد طلع إقامة و جواز من جيبو ومدّاها لعماد : أنا خلاص طلّعت !

عماد بدهشة : لآلا أصلو ما معقول ! متين الكلام دا ؟

وليد : والله في الأسبوع الفات دا !

عماد : شنو الخيانات دي ؟ ولا قتلولي ولا حاجة !

وليد : نحن لآمين فيك لمن نقول ليك !

عماد : أها ماشي متين ؟

سُلطان : إن شاء الله بعد شهر ، إذا أجزت أنا نسا فر مع بعض ،

عماد : كويس والله ، يلا بالتوفيق ..

قأطعهم العم سعيد الكآن طالع من الدكان وفي يدو جريدة وقال لعماد : عماد يا ابني ، طالع ؟

عماد : أي يا عم ، في شنو ؟

العم سعيد : لآ بس كُنت دآير أسآلك بتغرف دكتور أديل آرنو ؟

عمآد بتفكير: تقريبآ كدآ ، دكتور عيون مُش ؟

العم سعيد بفرحة : آي آي دكتور عيون ..

آدخّل وليد : دكتور ألماني على مآ أظن مُش ؟

العم سعيد : أيوا ، الله يفتح عليكم ،

عمآد : مآلويآ عم ؟

العم سعيد : قآلوا جآي السودان في رحلة طيبية للمستشفى التركي ، هو طبعبآ دكتور

شاطر ، داير أمشي لمهو عشآن الموية البيضآ ..

عمآد : جآي متين هو ؟

العم سعيد : حسب الكلام الفبي الجديدة بعد شهر جآي إن شاء الله ،

عمآد : أيواا

العم سعيد : بس كُنت دآيرك تغشى لي المُستشفى وتشوف لو في إمكانية لحجز موعد

الآن

عمآد بآبتسآمة : يآ عم هولسه ما جا ، خلي بعد يجي ونمشي نحجز الموعد

العم سعيد : هو دكتور شاطر ، وجآي السودان أسبوعين ، الناس من الآن ح تبدآ تحجز

عشآن بعدين بكون في زحمة

عمآد : طيب طيب يآ عم ، إن شاء الله في أقرب فُرصة بمشي وأحجزليك

العم سعيد : كآر خيرك يآ إبني

عمآد : الله يزيد فضلك ، تآمر بحاجة ؟

العم سعيد وختّ يدو في كتف عماد : لآلا ، الله يفتحها عليك بس ..

عماد ختّ يدو فوق يد العم سعيد : آمين يا رب ، يلا يا عم في أمان الله ..

والتفت على سلطان ووليد : يلا يا شباب أشوفكم على خير ..

ومشى منهم وغشى المستشفى و حجز موعد للعم سعيد واتصل عليهم وكلمو بمواعيد
المقابلة ، وطوّالي مشى على فيلا الأستاذ سيف .. دخل بيت ريم ، استغرب لما ما لقاها في
الحوش زي كل مرة ، دخل الصّالة لقاها قاعدة ومعها هيفاء ، أول ما شافتو قامت
على حيلها إستأذنت منهم وطلعت .. مشى عماد على ريم وصبح عليها ..

ريم بتردّد : آآآ .. عماد !

عماد الكآن سرحان إلتفت لهما : أهلين أهلين ..

ريم : ممكن لو جآ خالد تآني تمنعو إنو يُدخل لي ؟

عماد : جدآ ، إن شاء الله ..

ريم : شكراً ،

عماد : هو زاتو زول غريب ، ما عارف سعد دا مُصاحبو كيف !

ريم : أصلاً قصتو عجيبة خالد دا ، أنا شايفة بعد الحصل أمس من حقك تسمعها !

عماد عدلّ قعدتو : سأمعك ..

ريم اتحنحت : زمان قبل ما أنعي وقبل ما أبوي يتوفى ..

عماد : معليش بس ، يعني إنتي ما إتولدتي عمياً ؟

ريم : لآلا ..

عماد : أيوا ، أوكي طيب كملي ..

ريم بخجل : كُنّا أنا و هو في علاقة مع بعض ، بعدين في نأس في الحارة عرفوا الكلام دأ ، أول ما عرفت كدأ ، قطعت علاقتي معاهو عشآن سُمعة أبوي ومركزو .. هو زعل طبعاً و هدّدي إنولو ما رجعت لهو ما ح يحصل لي خير ، برضو كمان ما إشتغلت بيهو .. فترة كدا انفصلنا وطبعاً ياسرزي أخوي بنطلع مع بعض وأحياناً بتجي معانا غيداء وكدا .. يلا هو بقى شاكي في حكاية إنونحن مُرتبطين ولا لا .. ومن اليوم داك وهي حاقد علي !
عماد باستغراب : أيوا ، بس يعني لو ما في إحراج ، هو أمس كان بقول كلام كبير وقوي ، يعني وصلت لمرحلة يطعن في الشرف ! ما أظن الكلام دأ جا من فراغ !..

ريم : دي حكاية تانية كمان ..

عماد : أوكي ، انا سامعك ..

ريم : كآنت جآت فترة بتجيني ألام قوية في المعدة ، وكنت بستحمل ، بس يوم جآني ألم أقوى من أي مرّة كلّمت أبوي وطبعاً أبوي نادى الدكتور الخاص بأبوي كشف علي ..
دمعت عيونها

عماد بدون ما تكمل فهمها وقال بأسى : أيوا أيوا فهمتك ..

نزلت دموعها على خدودها : بس والله الكلام دا ما حاصل ، بجد بجد اتظلمت شديد ، أنا بقيت ما فاهمة حاجة وكم مرة أقول لعبي سيف نرجع المستشفى نتأكد يرفض ، لغاية ما طلعتنا أنا وياسر من ورا عمي سيف ومشينا المستشفى ، وفعلاً الدكتور أكّد الكلام دا ، بس قال إنو الجنين مات وسقط ! بس والله الكلام دأ ما حصل ، أنا ما عارفة كيف ، يعني ما معقولة الكلام دا يحصل وأنا ما جايبة خبر ، صح ؟

عماد الكآن مُصديق ريم : والله يا أستاذة ، ما عارف ليه .. بس انا مُصديقك ، مع إنولي كم يوم من ما عرفتك ، بس برضو حايبي إنو فعلاً ظلموك ! لأنو ياسر ما من النوعية
البيتكلّم عنها خالد

رفعت رأسها وقالت بصوت مخنوق : أبوي أول ما عرف جاتو ذبحة و مات في اللحظة ،
كم يوم كدا والخبر انتشر .. نفسياتي تعبت ، صحيت في يوم مآ شايفة أي حاجة ، من
مُستشفى لمستشفى .. قالوا عى لكن مآ عارفين بسبب شنو ، ونمشي مستشفى والتأني ،
لغاية ما قالوا مافي علاج لحآلتي دي ..

عمآد بأسى وحية : ربنا يعينك يا ريم ..

ريم وزادت تبكي أكثر ..

عمآد واندكر الدكتور الألماني الجآي زيارة للسودآن : بالمناسبة ، في دكتور ألماني أخصائي
عيون جآي السودان لمدة أسبوعين ، بس بعد شهر من الآن ، لو تحيي ممكن نمشي ليهو
!..

ريم بحيرة : وعي سيف ؟

عمآد إبتسم : مآ مُشكلة أنا بقنعوا ..

ريم بهدوء : أوكي !

(♩)-----*-----•♩•-----*----- (♩)

مرؤا يومين وريم وعمآد بقوا أصحاب وبيحكوا لبعض كل حاجة في حياتهم ، وعمآد
اتعوّد على شغلو ، وريم بقت ترتآح لوجود عمآد معاها في نفس البيت

وبقوا عارفين عن بعض أكثر من أسامهم ..!

عماد لسه ما فاتح سيف في موضوع المُستشفى والدكتور الألماني

(♩)-----*-----•♩•-----*----- (♩)

{ بَلَقَاكَ حِلْمٌ .. }

(.الحلقة الثالثة عشر.)

" بعضهم يبيع ضميره من أجل دُرهِيمَات ! هُنَا الأَرْض "

(♥).....*.....•••.....*.....(♥)

في شركة أبو خالد :

قَاعِد في المكتب بكل رَاحَة وبتكَلِّم مع صحبو سعد وبيضحكو ، فجأة عدل قعدتو و
اتحوّلت نبرتو للحدق والجديّة : أنا ما غايظني إلا المرافق بتاع ريم دا ، *وعقد حواجبو*
إسمو منو هو ؟

سعد : إسمو عماد تقريباً

خالد : أي صح صح عماد ، ياخ غايظني ياخ ، أنا بتكلم مع ريم هو الحشرو شنو ؟

سعد : هههه ، قال ليك دأ شغلو

خالد : ياخ شغلو ولا هنأي ، أنا مآلي ومآلو ، *رفع رأسو وعاین في سعد* عشان نعمل
الإتفقنا عليهمو لأزم أول شي نشيلو من طريقنا

سعد : بتفكر في شنو إنت حالياً ؟

خالد بحيرة : مآ عارف والله ، المشكلة نحن مآ عارفين عنو أي حاجة عشان نعرف نضربو
من وين

سعد : صح صح مشكلة والله !

خالد الكآن بفكر رفع رأسو لسعد وقال لهو : طيب أسمعني ، أمشي أجمع لي عنو
معلومات ، إسمو وسآكن وين وتأريخو كلو والكلام دا

سعد بإستغراب : أجيب الكلام دأ من وين ؟

خالد : ما عارف ، اتصرّف ، إنت أول شي أعرف من ياسر هو ساكن وين ، وأمشي حلتو
وأسأل عنو

سعد : طيب طيب إن شاء الله ..

(♫)-----*-----•♫•-----*----- (♫)

الخرطوم شرق - حي الريّاض :

في فيلا الأُستاذ سيف ، السّاعة ٦ بالمغرب ، وقت الغروب .. قاعد الأُستاذ سيف و معاهو
ياسر إبنو في الحوش بيتناقشوا في المشروع الجديد .. جا عماد عليهم من بعيد وقف بعيد
منهم لغاية ما يخلّصوا كلامهم ، سيف الكآن مُقابل عماد إنتبه ليه ونادى بأعلى صوتو :
يا عماد ، تعال تعال ..

مشى عليهم عماد بخطوات واثقة ووقف عندو : نعم

سيف : واقف هناك زي الصّئم مالك ؟

عماد : لا حضرتك ، بس كُنت عايزك في موضوع كدا ، بس شُفتك مشغول

سيف ولم الورق القدّامو : لا أنا خلّصت الشغل ودا ياسر طالع الآن

ياسر قام على حيلو بابتسامة : عن إذنكم ،

سيف وأشّر لعماد على الكرسي المُقابلو : اتفضّل

قعد عماد على الكرسي وقال بابتسامة : يزيد فضلك يا أُستاذ

سيف : أها ، شنو الموضوع الدايرني فيهو دا ؟

عماد شبّك أصابع يدو ببعض وختّاهما على الطرييزة : والله يا أُستاذ قبل كم يوم وأنا
بتصحّح في الجرايد ، لقيت إعلان إنو في دكتور عيون ألماني إسمو "أديل أرنو" معروف في

العالم كلوشاطر ما شاء الله ، قالوا إنو جاي السودان بعد شهر لمدة أسبوعين في
المستشفى التركي ، بأسعار مناسبة وكدا ،

سيف الكان مُندمج معاه : أها ..

عماد بتوتّر: فقلت أشوف رأيك إنو ممكن ريم تمشي تتعالج عندو أو على الأقل يفحص
لها من جديد

سيف بجديّة : يا ابني البنت دي خلاص ، الدكاترة كلهم قالوا مافي أمل في علاجها ..
أصلاً معظمهم قالوا ما عارفين سبب العمى دأ شنو ..

عماد: بس يا أستاذ حسب العرفتو ممّا إنو ما حصل عرضتوها على دكتور أجنبي ،
جأيز يعرف أو التقنيات عندهم هناك أكثر من عندنا هنا

سيف: لآلا أنسى الموضوع دأ نهائياً ، دأ دكتور أجنبي و أكيد دأيرليه مصاريف كتيرة ..
لآلا أنا ما بقدر على الكلام دا

عماد: مُش هي عندها ميراث ؟ تقدر تصرف بيهو حق المقابلة و العلاج

سيف بعصبية: ميراث ؟ ميراث شنو ؟ ما عندنا بنات بيورثوا !

عماد: يا أستاذ إذا الدين شرع ليها حقها في الميراث ، بأي حق تمنعها إنت ؟

سيف على نفس عصبيتو: يا ولد دأ دينك برآك ، البت دي ما عندها ميراث عندي

عماد بهديّ فيهو: طيب طيب يا أستاذ هديّ بآلك ، إنت بس أسمح لي إنو أسوقها
المستشفى ويمشي معانا يآسر ، القروش انا بدبرها ..

سيف: لآلا كان كدا خلاص وآفقت ليكم ، بس القروش ح تدبرها من وين ؟

عماد: أنا بصرف ليها حق المقابلة و العلاج ، ما أظن تجي خمسة مليون أو أكثر منها !

سيف بدهشة: يا ابني إنت مرتبك كلو خمسة مليون !

عماد : أيوا عارف ،

سيف : و حتقدر تصرف على نفسك كيف ؟

عماد بابتسامة رضا : الله كريم !

وقام على حيلو راجع على بيت ريم عشان يبشّرها ..

سيف بدهشة من عماد رجّع ضهرو على الكرسي وكانو لأول مرة يسمع الكلمة دي

قال وهو بردد فيها : الله كريم !

(.....•○•.....)

في بيت ريم :

كانت قاعدة في الحوش كالعادة مع هيفاء بنت عمها ، كان نفسها تستمع بالجو الجميل

دا لأنها سامعة صوت العصافير وحاسة بالنسمات الخفيفة الباردة وحاسة ببرودة

التجيلة القاعدة عليها ،

سمعت صوت خطوات ماشة عليهم إتفتت على مكان هيفاء الكانت قاعدة جنبها : دا

عماد يا هيفاء ؟

هيفاء بصوت وأطي : أي دا هو ..

جا عماد وعلى وشو إبتسامة ، إستغربت هيفاء منو لانو تقريباً دي أول مرة تشوفو

مبتسم ، قامت على حيلها عشان تستأذن منهم ، إلا إنو صوت عماد سبقها : خليك

خليك ، نفسي اعرف كل ما أجي بتقومي ليه ؟

هيفاء بحرج : آآ ، لا ما كدا

عماد بإبتسامة : طيب خليك قاعدة

عيونهم معلقة بيه ، وصل عندهم وقف بكل شموخ وطلّع نظارتو الشمسية وقال بنبرة
وأثقة وعزيزة :

السّلام عليكم يّ شباب

ردّ واحد منهم : أهلين يا شيخ

سعد : لو سمحتوا بتعرفوا وأحد إسمو عماد ؟

وأحد من الشّباب : عماد ؟ ممم ؟ عماد منصور ؟

سعد المآ كان عارف إسمو: تقريباً كدا ، بس هو عيونو عسلية ..

ردّ واحد تاني من الشّباب : أي أي عماد بنعرفو ، مآلو ؟

سعد : بتعرفو بيتو وين ؟

وأحد من الشّباب وقف على حيلو ولفّ على الجهة التانية وأشرليه بيدو : شآيف العمارة

الخضراً ديك ؟

سعد : أيوا أيو ،

الشّاب : شآيف البيت الوراها ؟

سعد : لآلاً مآ شايفو ، يأتو الفوقو خزّان دا ؟

الشّاب : لآلاً مآ دا ، القبلو ، لونو أزرق

سعد : أي أي

الشّاب : بس يآهو دا بيتو ..

سعد : أيوا *ولفّ علمهو* شكراً يا شاب

الشّاب : العفوياً أستاذ

سعد : بتعرفوهو من زمان عماد دآ ؟

الشّاب : آي يآخ كيف ، ولد حلتنا ، بنعرفو من زمن كآن كتكوت ، الحلة كلها بتعرفو

سعد بفرحة : طيب تعال نقعد هنا وأحكي لي عنو بالتفصيل ..

الشّاب : لآلآ يآخ ، دي أسرار حلتنا ، مآ بحكي ليك ، معليش يآخ

سعد بكُل ثقة دحل يدو في جيب القميص وطلع منها قروش ومدآها للشّاب

الشّاب عآين للقروش ورفع رأسو على سعد : دآير تعرف شنو إنت بالضبط ؟

(♫)-----*-----•♫•-----*(♫)

{ بَلَقَاكِ حِلْمٌ .. }

(.الحلقة الرابعة عشر.)

" و الخيال هو حياةٌ أُخرى ، إلا أنه أفضل ، أفضل بكثير "

(♥).....*.....•♫•.....*(♥)

الخرطوم شرق - حي الرّياض :

قعد عماد وريم يتونسوا بعد ما قامت هيفاء مّهم ، إلتفت ريم حولها بنظرات مُشتتة

ورجعت إلتفتت على عماد وقآلت بأسى : نفسي أشوف المكان دا بس !

عماد بإستغراب : ليه ما حصل شفتيه إنتي ؟

ريم على نفس حآلها : للأسف لآ ! / أول مآ أبوي الله يرحمو إتوقّى وبعد ما أنا إتعميت

جيت سكنت هنا ،

عماد بحيرة : و كنتوا وين قبل مآ يحصل دا كلو ؟

ريم : كُنّا في حي المطار ، ساكنين أنا و أبوي هناك ، *واتنهّدت بأسى* نفسي أرجع هناك ..

عماد : إن شاء الله يجي يوم و ترجعي هناك

ريم بحيرة : تفتكر ؟

عماد بإبتسامة : إن شاء الله

ريم و إلتفتت حولها و رجعت إلتفتت على عماد : عارف إنو أنا يومياً بقعد أتخيل في

المكان دا ؟

عماد : طيب يلاً قول لي بتتخيليهو كيف ، وأنا بقول ليك لو صح أو لا ..

ريم : أوكي ، أممم ، حاسّة إنو مكان واسع و كبير ، لأنو دائماً المكان دا بكون فيهو هواء

عماد و إلتفتت حولو : فعلاً صح ،

ريم و مسكت النّجيلة بيدها وقالت : في نجيلة كتيرة مقصوصة بانتظام ، و لونها أخضر

شديد لأنو دائماً بتكون رطبة و دا معناهو إنو في مجموعة نوافير صغيرة بينها

عماد و إتأكد من كلامها : فعلاً فعلاً صح !

ريم : أممم ، و كمان في أشجار على أطراف الحوش ، لأنو أنا و غيداء كُنّا بنقعد تحتها

دايماً ،

عماد و إلتفتت على السُّور و أطراف الحوش : أيوا ، كمّلي

ريم : و كمان في أحواض ورود جنب الأشجار دي ، و الحاجة المتأكّدة منها إنو في الزاوية

ديك في حوض فيهو ورد الجوري * و أشّرت على زاوية من زوايا الحوش الواسع*

عماد إلتفتت مكان ما كانت بتأشرو إنتبه لحوض الورد الأحمر و رجع و إلتفتت عليها : هو

غابتو في ورد أحمر ، بس ما بقدر أحدّد ليك إذا هو جوري أو لا ، بس الحاجة المخبّراني

كيف عرفتي إنو هو جوري ، و متأكّدة كمان ؟

ريم بإبتسامة : أنا و أبوي الله يرحمه كُنَّا بنعشق الجوري ، وهو معروف بريحتو القويّة
الجميلة ، ممكن من مسافة متر تقدر تشمّها ، بقدر أميّز ريحتو من بين كلّ العطور ..

عماد بإبتسامة : سُبحان الله !

ريم إبتسمت و رجعت ملامحها للأسى وقالت بنبرة فاقدة للأمل : نفسي أشوف الجوري !
إشتقت لهو و للونو الأحمر!

عماد بطمئن فيها : اتأكدي إنوح يجي يوم و تشوفهو مرّة ثانية ، إن شاء الله ..

ريم بإبتسامة : إن شاء الله ، *سكتت و رجعت تكملّ* عماد ، إنت بتحب شنو من أنواع
الورود ؟

عماد إبتسم بألم وقال بحزن عميق : أمّي !

ريم بأسى : ربّنا يرحمها ، ويرحم أموات المسلمين

عماد غمّض عيونو بخشوع : أميين آميين يا رب ، *وفتّحها وعين في ريم* من يوم رحيلها
و الدُنيا مرّة ، صح ماتت قبل خمسة سنوات ، بس الفراغ التّركتو فيني عمرو ما ح
يتملي ، والجرح السّببوي بُعدها كل يوم بيتجدّد ، كل يوم بحس بفقدّها أكثر من أمس ..

ريم مُندمجة مع كلام عماد العزف فيها على وتر حسّاس !

عماد : كل يوم بحلم بيها ، من خمسة سنين و أنا بلاقيها في أحلامي ، بكون معاها نتوتّس
و نضحك و ما كاتّها ماتت ، في التّهاية بضمّها بقوة ، بصحى و بلاقي نفسي حضنت المخدّة
، وأحياناً حضنت مازن البكون نايم معاي ..

ريم بإستغراب : مازن ؟ مازن منو ؟

عماد بإبتسامة خفيفة : دأ أخوي من أمي

ريم بحزن : يا سلام يا عماد ، حظّك ! وعندك تآني أخو غيرو .؟

عماد : لآلآ ، بس هو مازن في الرّوضة ، وبيان ماشة تالت ثانوي ..

ريم : حظك بجد ..

عماد بإستغراب : حظي ! حظي في شنو ؟

ريم ونزلت رأسها : عندك أخوان ! بالجد أنا الحاجة الوحيدة البتمنّاها إنو يكون عندي أخ أو أخت ، ناس بتهتمّ بي ، بقدر أحكي لهم كل حاجة بدون ما يفهموني غلط ، ومهما أعمل وأحكي لهم نظرتهم فيني ما بتتغير لأنو عارفين إنو جوّاي إنسان كويس ، *رفعت رأسها وقالت بنفس اللهجة الحزينة* ناس بجمعك بيهم أكثر من رابط الدّم وإنو تعيشوا في نفس البيت !

عماد إبتسم : طيب لو مألزم يجمعهم رابط الدّم ، إعتبريني زي أخوك !

ريم بفرحة : جد يا عماد ؟

عماد بإبتسامة : جد يا ريم ، تقدري تحكي لي كل حاجة ، وصديقيني نظرتي فيك ما بتتغير ، لأنو حقيقة أنا عارف إنو جوّاك إنسان كويس ، إبتسمت ريم بفرحة وقالت بخجل : تسلم يا عماد ..

عماد : يسلمك ربي من شر عباده

ريم على نفس حالها : ريم و عماد أخوان ! جميل :) !!

(♫)-----*-----•••-----*----- (♫)

الخرطوم - حي المطار:

في بيت أبو خالد وأحد من رجال الأعمال المعروفين في البلد ، البتربطو بالأستاذ سيف علاقة شغل السّوق والتّجارة ، في الصّالون الكآن تصميمو بيدل على شخصيّة راقية و فخمة و ملكيّة ! كآن قاعد خالد إبنو الوحيد مع صحبو سعد ، سعد الكآن بيعحكي

عماد : بسيطة ، لما بيان تتزوج إن شاء الله ، أنا بتزوج بعدها إن شاء الله ..

سُلطان بحماس : طيب ليه ما تزوّجها ؟ ..

عماد المُستغرب من حماس سُلطان : لأنها لسة صغيرة الآن ، ما حتقدر توفّق بين قرايتها

وبيتها ، والأهم من كدا .. مآزن !

سُلطان وإنطفى حماسو : أهاا !

عماد وقام على حيلو : يلا يا شباب ، أشوفكم بعد الصلّاة إن شاء الله

وليد : يلا مع السّلامة ..

سُلطان : في أمان الله ..

(♫)-----*-----•♫•-----*----- (♫)

{ بلقآك حِلْم .. }

(.الحلقة الخامسة عشر.)

" العآهآت و التّقآلید ؛ قوانین أموات تُطبّق على الأحياء ! "

(♥).....*.....•♫•.....*..... (♥)

الخرطوم - حي المطآر:

بعد أسبوع في شركة أبو خالد .. خالد الكآن قاعد في المكتب و مشغول بكمية أوراق و

قدآمو لآبتوب ، إتفاجأ بالبآب ينفتح بدون إذن ، رفع رأسو بعصبية ، لكن عصبيتو

إتحولت لإبتسامة و هو شايف سعد واقف قدآمو قال بإبتسامة عريضة : أهليين أبو

الشباب ، إتفضّل إتفضّل

وقام من مكتبو و سلّم على سعد و قعدوا سوا في كنية جلدية قدآم المكتب ..

خالد بإندماج : أهاا

سعد : يتخيّل لي إنو أول ما هرب مشى أم درمان ، لأنو قبضوهو في القضية دي قبل
خمسة سنوات في أم درمان ..

خالد بتفكير: اللي هي نفس السنّة الهرب فيها !

سعد : أيواا ، عليك نوور.. بالظبط كدا ، المهم بعد ما طلع براءة وفكّوهو ، هناا حكايتو
في القسم إنتهت وما عندهم أي معلومة عنّو.. مشيت أم درمان الثّورة وبقيت لآقي في
الحارات أسأل وكدا ، طبعاً ما معروف شديد هو ، بس الحمد لله لمّيت ليك في واحد
كدا طلع بيعرفوا ،

خالد : وقال ليك شنو ؟

سعد : قال إنو أول ما جا أم درمان دي قعد فيها كم شهر وقاموا قبضوه في إشتباه
تعاطي المخدرات القلتوليكيك دا ، قعد سنتين كدا وبعدين طلق مرتو الجديدة دي ، و
بقى مضيع وقتو في القمارو والمخدرات ..

خالد بإستغراب : مُش هو طلع براءة من حكاية المخدرات دي ؟

سعد : فعلاً طلع براءة لأنو الوقت داك ما كان بيتعاطى ، بس بعد ما فكوهو قعد سنتين
وفلس فيها ، لى لهو في أولاد حرام كدا بس بدا يتعاطى معاهم ، يا زول باع ليك ذهب
مرتو كلو وطلّقها وفكّ البيت الكآن مؤجرو ، وفقد وظيفتو ، ما عندو أي حاجة ،
مفلس بس ، بقى يسرق عشان يجيب قروش للمخدرات ..

خالد بإندماج : أها ، وبعدين

سعد : بقى لآقي في الشوارع ينشل ويسرق عشان المخدرات دي ، ليوم الليلة هو لآقي في
الشوارع

خالد : أها و قابلتوا ؟

العم سعيد وختّ يدو على كتف سلطان وقال بالحنين الإتعرف بهو : سلطان ، في
شنوياً ولدي ؟ الكلام دأ ما كلامك .. دأ كلام زول مهموم و مطعون و حآقد على الدنيا ،
مأ كلام سلطان الطوالي بيضحك و بيتسم و ضارب الهم بالفرح ..

سلطان نزل رأسو وقال بأسى : مأ فيني إلا العافية يا عم !

العم سعيد رفع رأس سلطان و عآين في عيونو وقال : سلطان ، إنت زي ولدي ، عآرف
إنو في حاجة مضايكاك .. تقدر تحكي لي !

سلطان إتهّد و رفع رأسو : عمي ، أبي أتزوج ..

العم سعيد بوش مُتهلّل و مبسوط : كلام سليم يا إبنني ، أي و الله عين العقل

سلطان : بس عمي فيه مُشكلة !

العم سعيد بإستغراب : مُشكلة ؟ مُشكلة شنوياً ولد ؟ العرس دأ سُترة و عفآف .. مآفيهو
أي مشاكل بإذن الله ،

سلطان : و الله فيه يا عمي ، فيه كئيبير ، مشاكل "ن" مأ عشتموها أنتم بزمناكم

العم سعيد بإندماج : مشكلة شنو طيب ؟

سلطان بأسى : العآادات و التّقاليد يآعم ، قوآنين الأموات اللي قآعدة تنطبّق علينا إحنا
الأحياء .. البنت اللي أبيها يا عم ، العآاهات و التّقاليد تمنعني و تمنعها ..

العم سعيد قطّب حوآجبو بإستغراب : عآادات و تقآاليد ؟ متين العآادات و التّقاليد كآن
لها دخل بالعرس ؟

سلطان و رسم إبتسامة سآخرة جانبية : يا عم ، العآادات و التّقاليد أغلبها مأ ينطبق إلا
على الزّواج ..

العم سعيد بهمة : طيب يا إبنني قول لي دي منو الدآيرها دي و إن شاء الله مأ يحصل إلا
الخير ،

العم سعيد وقطب حواجبو بإستغراب أكثر: طيب المشكلة في منو؟

سُلطان: فيني أنا و في أهلي .. عاداتنا تمنع إني أتزوج من برّا العيلة حقتنا ، تبيها

تسمحلي إني أتزوج من برّا البلد بكبرها !

العم سعيد و سكت مسآفة ، بعدين رفع رأسو في وش سُلطان : أقول ليك حاجة يا

ولدي ؟ أنا بتكلم مع أبوك المآقاعدين نشوفو إلا في المسجد دآ

سُلطان بسرعة: تكلم أبوي ، وش تقوله ؟ أبوي يا عم ولد قبائل و بدو ما عنده ذي

العلوم

العم سعيد : ياخي يمكن قعدة السُودان دي تغيروا شويّة ، أنا بتكلم معاهو وأشوف

رأيو ، إنت بس أطلع منها ..

سُلطان بإستسلام : طيب ، يصير اللي فيه خير إن شاء الله

العم سعيد : إن شاء الله ، يلا قوم خلينا نقفل الدُكآن دا ..

سُلطان و قام على حيلو: زين !

(♫)-----*-----•••-----*----- (♫)

يأسر بإبتسامة سآخرة : حضراتهم مُتهميني أنا في حكاية ريم دي ، أنا حتّى لو كُنت إنسان سيء ما كُنت ح اعمل كدا في ريم ، ولأ ريم ح ترضى كدا .. ياخي ريم دي كُتلة براءة بتمشي ، كمّية ما معقولة من البراءة و الأنوثة و اللُطف و الطّيبة .. عآرف يا عماد ؟ كأن عندها نظرة براءة كدا بتخلّيك تنسى نفسك و تضيع في عيونها ، تبقى ما شايف أي حاجة غيرها هي بس .. إشتقت للنّظرة دي ، و إشتقت لريم القديمة !

عمآد بتمهيّدة : إن شاء الله يا ياسر ، كُلهأ أسبوعين و حنقآبل الدّكتور الألماني دا ، ما عارف ليه ، بس أنا مُتفائل شديد والله

ياسر : و حجزتوا موعد ؟

عمآد : أيواا يوم التلاتا في الأسبوع الأول

ياسر بإبتسامة : خير إن شاء الله

عمآد و عآين لساعتو كانت ١١:٣٠ قآم على حيلو : الليلة الخميس ، المُواصلات ح تكون زحمة شديدة ، أنا أحسن لي أطلع الآن

ياسر و قآم معاهو : ماشي بالمواصلات ليه ؟

عمآد : لآلا يا ياسر ، أنا بالمناسبة لو ما مشيت بالمواصلات بحس في حاجة غلط في يومي

..

ياسر بإستغراب : ليه ؟

عمآد بإبتسامة : ما عارف ، بحب عيشة البسآطة ، بحب أركب في المُواصلات زي زي أي زول تآني ، حتّى لو كُنت شغآل مع سيف خليل بآبكر ..

ياسر بإبتسامة : خلاص ما بضغط عليك ، بس إنت عارف لو إحتجت ليك توصيلة أنا جاهز ..

عماد : تسلم ، ما بتقصّر عارفك ، *وعاين لجوّ الفيلا* أنا أدخل أسلم على ريم ، لأنو
بكرا ما جاي

ياسر: صح إجازتك وكدا ..

عماد : بالضبط ..

و دخل الفيلا و إتوجّه على ريم الكانت قاعدة في الصّالة مع غيداء و بيتوتّسوا ، أول ما
دخّل الصّالة ، غيداء الكانت قاعدة في الكنبّة و حاضنة المخدّة إلتفتت على ريم و قالت
بإبتسامة : عماد جا ..

عماد إبتسم و إلتفت على ريم : يلا يا ريم ، أنا طالع ، تأمري بشي ؟

ريم : لآلا سلامتك بس ..

عماد : الله يسلمك ، يلا أشوفك يوم السّبت إن شاء الله ..

ريم : إن شاء الله

عماد : طيب يلا مع السّلامة* و أدّاهم ضهرو طالع من الباب*

وقّفو صوت ريم : عماد .. خلّي ياسر يوصلك بالعربية ، الوقت متأخر

عماد بإبتسامة : لآ تسلموا ، بس أنا بحب أركب المواصلات ، مُتعود أمشي زي الوقت

دا

ريم بقلة حيلة : لكن ..!

عماد : ما تقلقي إن شاء الله يوم السّبت بجي سليم ..

ريم بإستسلام : طيب ، مع السّلامة

عماد : مع السّلامة ..

(♫)-----*-----•♫•-----*(♫)

في أم دُرمان - الثَّورَة :

نهار يوم الجمعة ، قدّام واحد من المساجد القديمة والكبيرة والمعروفة في أم دُر ، و
أثناء الصَّلَاة والمكان فاضي وهادي إلّا من تراتيل القرآن العذبة الشّجية الطّالعة من
المسجد ، كأن واقف راجل في العقد الرابع من عمرو ، بس شكلو شكل مُراهق أو شاب
ضاع في طُرقات الحياة ، تاه في دُروب الحياة المُتشابكة وإختلط عليه الأبيض والأسود ،
بقى شأيف للحياة لون واحد وهو الرّمادي ! شكّو مخيف ! ، عيونو منقّخة ولونها أحمر
وتحتها هالات سودا ، جسمو هزيل ما بيتناسب مع عمرو وسنو .. واقف بتوتّرزي
الطّفّل المنتظر لعبة ! من بعيد كأن سعد واقف وبيعان ليهو ، إبتسم إبتسامة مُنتصرو
كأنو كأن مُضيع حاجة ولقاها ، ! بخطوات وآثقة مشى على الرّاجل وبكّل ثقة قال :
منصور ؟

إلتفت عليه الرّاجل بقلق وقال بنبرة مُتوتّرة : لا ما منصور !

سعد بإبتسامة : ما تخاف ، أنا ما من الشّرطة ، أنا بس كنت جآيب ليك هديّة

إلتفت قدّامو بخوف وهو مُتوتّر وما قادر يثبت مكانو : قُ..قلت ليك أنا ما منصور .. زح
مّني

سعد بتمثيل : أيوا ، معلّش يا أخ ، بس كنت بفتّش لوأحد إسمو منصور ، عندي ليهو
كمّية قروش تكفّيهو طول عمرو ، *وبخطوات بطيئة مشى عنو*

مُجرّد ما سمع سيرة القروش نادى باعلى صوتو : يا زول ، تعال دقيقة

سعد إبتسم إبتسامة خبيثة وإلتفت عليه : في شنو ؟ أنا ماشي أفّتش لمنصور ياخ

إلتفت يمين ويسار وقال بنبرة خوف : ع..عندك قروش حقيقة ؟

سعد بإبتسامة سُخرية : و إنت شغلّتك شنو ؟ أنا جايها لمنصور إنت مالك ؟

إتقدّم عليه بخطوات بطيئة : أ .. أنا منصور ..

سعد بإبتسامة إستهزاء : كُنْتُ عارف إنَّكَ منصور

منصور : يلاً سريع أدّيني القروش دي !

سعد : القروش للأسف ما عندي أنا

منصور بإنفعال : ما عندك ؟ عند منوطيّب ؟

سعد : مع ولدك عماد !

منصور وإلتفت يمين وقال بإنكار : ما عندي ولد إسمو عماد انا

سعد : يا زول انا عارف تأريخك كُلو ، وعارف مرتك الأولى و التّانية ، وولدك عماد و بنتك بيان ، أنا بعرفك اكثر من نفسك .. وصدّقني عندي القروش الحتقدر تشتري بيها كمية المخدرات الإنت بتحتاجها لبقية حياتك

منصور و إلتفت عليهو بدهشة

سعد وكمل كلامو : داير القروش ؟ تعال معاي ..

منصور ساكت بحيرة ،

سعد وبعد منو : انا ماشي على العريية ، إنت لو عارف مصلحتك جد ح تعي معاي
ومشئى مخلّي منصور مُحْتَار

وصل عربيتو وركب فيها وشغلّها ، إلتفت يمينولقي منصور جاري عليهو ، إبتسم
إبتسامة جانبية وقال بصوت وأطي : لغاية هنا ماشين كوئيس !

(♫)-----*-----•••-----*----- (♫)

في بحري - شمبات :

في مسجد قباء ، و بعد صلاة الجمعة ، النَّاس بدت تطلع جماعات و سَط الرّحمة
الشّديدة ومباركات النَّاس بيوم الجمعة ، في المسجد كان في ناس قاعدين لسة ما طلّعوا

العم فهيد : طألما هي أخت عمآد ، مآ عندي مُشكلة ، عمآد رجآل "ن" مآ منّه ثنين ، والله أفتخر بنسبه وقربه ، لكن زي مآ قلت لك أم سُلطان هي اللي رآفضة ،،

العم سعيد : طيب يآ فهيد حآول فيها حآول إنك تقنعها ..

العم فهيد بإبتسامة : إن شاء الله ..

على سُكوت العم فهيد جآ سُلطآن وقف جنبهم وسَلّم على العم سعيد وإلتفت على أبوهو : يُبة وينك ؟ قعدت أدور عليك ..

العم فهيد : معليش يآ وليدي ، سرحت في الكلام مع عمك سعيد ، بخصوصك ..

سُلطان ومثّل الإستغراب : بخصوصي أنا ؟

العم فهيد : إيه أنت ، إجلس الله يحفظك ..

سُلطان وقعد جنب أبوه : هآ يُبة ، سم ..

العم فهيد : سم الله عدوينك يآ وليدي ، السآلفة و مآ فيها إن العم سعيد يبيك لبيان أخت عماد ؟

سُلطان بتمثيل : عمآد عنده خوات ؟

العم فهيد بإبتسامة : هذا اللي أنا قُلته !

سُلطان : والله يُبة مآ عندي مُشكلة ، عمآد خوي "ن" مآ منه ثاني ، وحنآ نبي القُرب منّه *وفجآة كآنو إندكر حاجة* ويمّة ؟

العم فهيد وإتهدّ : أمك خلّها علي أنا بقنعها إن شاء الله ..

سُلطان بفرح : إن شاء الله ..

العم فهيد : يلا قومني يآ وليدي ..

سُلطان وقف على حيلو بضحكة : وين شبآبك يُبة ؟ يلا يلا قُم انت قدّها

خالد وشال منو مفتاح العربية بسرعة ومشى فتح الباب ، شاف منصور قدّامو ، إيتسم

بسعادة أكبر وقال بترحيب : اهلين اهلين ، نورت ، إتفضّل ..

منصور بتردّد نزل من العربية ودخلوا البيت سوأ وقفلوا الباب ..

(.....•○•.....)

في الصّالون :

سعد و خالد قاعدين في كنبه وأحدة مُقابلة لمنصور القاعد بتوتّر في كنبه تانية .. وقدّامو

كُباية عصير ، خالد بإبتسامه : أشرب يا أستاذ

منصور وهو بحك تحت أنفو : ما داير أشرب ، أديني القروش سريع

خالد إيتسم : شكلك مُستعجل شديد ، ع العموم ، القروش ما عندي أنا مع عماد

ولذلك !

منصور : ع..عماد ؟ عماد وين ؟

خالد ومدّ ليه صورة بيت عماد : بتعرف البيت دأ يا منصور ؟

منصور وإستلم الصُّورة : آي ، ، دأ ..دا بيت ندى ، ندى مرتي الأولى

خالد وإلتفت على سعد بإبتسامه خبيثة : البيت مُسجّل بإسم منويا منصور ؟

منصور : مُسجّل بإسم ندى الخير ، أصلاً هو بيتها هي ، كأن نصيها من ميراث أبوها

خالد بإبتسامه : أيوااا ، إنت عارف البيت دأ قيمتوكم ؟

منصور بعدم إستقرار : كم ؟

خالد وشبك أصابع يدينو ببعض : بـ ٩٠٠ مليون ، ودأ سعر تقديري بس ! إحتمال يكون

أكثر !

منصور بدهشة : إنت جادّي !

يشوف ملامح الرّاجل دأ ويعرفو منو ، أما الرّاجل الكآن بيعآين للبيت إلتفت وراهو لمآ
حسنّ بأنفاس زول وراهو

لمآ إلتفت عمآد إتسمّر مكانو ، كآن الأرض وقفت بالنّسبة ليهو ! لآ هي فعلاً وقفت بالنّسبة
ليهو الرّمن الهوّاء الشّجر ، كلّ حاجة كآنت وآقفة مآ بتتحرك حتّى هو ، هو بيعرف
الملامح دي كويس ! وببكرهآ ! بكره ذكريآتها و آيامها ، إتقدّم خطوة مُتردّدة وقال
بإستغراب : منصور !

وليد الكآن بعآين للموقف من بعيد عيونو إتوسّعت و هو بشوف منصور

سُلطان بإستغراب من وليد : من ذآ يا وليد ؟

وليد و إلتفت عليه بدهشة : دآ منصور ! أبو عماد

سُلطان و رجع عآين للرّاجل : كذّاب !! أما هذا هو ؟ مو هذا اللي شرد من زمان ؟

وليد : آآي ياهوزاتو !

سُلطان : وله وجه يرجع بعد ؟ *وهزّ كتف وليد * قُم قُم خلّينا نشوف شآلسالفة

وليد و مسكو : لآلآ خلّيك ، عمآد بكون دآير يتكلّم معاهو برآهم ..

بالنّسبة لعمآد ، رجع شريط ذكريآتهم ، كآن عصبي وقآسي ! و أنااني و بخيل ومآ في قلبو
رحمة ، كآن شريط قآسي على عماد وفيهو ذكريآت كثيرة أليمة ، رجع للحآضر و هو لسة

مُستغرب ، رجّع وكرّر كلامو بدهشة : منصور !

منصور بإستغراب : آي منصور ، إنت منو ؟

عمآد و إتأكد إنودآ منصور اللي مُفترض إنو أبو هو ، كتّف يدينو وقال بسُخرية : ليك
الحق مآ تعرفني ! ح تعرفني كيف و إنت خلّيتني من آيام الثّانوي ، آيام كُنت مُراهق
طايش في أكثر وقت مُحتآج ليك فيهو *سكت مسآفة و كملّ * أنا عمآد يآ منصور ، عمآد
ولدك الوحيد !

منصور برود : أيوا عماد ، كبرت لكن !

عماد بسخرية : كبرت ؟ أنا حتى روجي كبرت و بقت عجوز ، عمري كلو كبر ! تفكيري كبر ،
و مسؤوليتي كبرت ..

منصور على نفس برودو : أيوا ، أديني ورق البيت دا يا عماد

عماد بإستغراب : أديك الورق ؟ بأي حق ؟

منصور : بحق إنودا بيتي !

عماد بحيرة : بيتك بأي حق ! دا بيت أمي يا منصور ، إنت حتى بيت ما قدرت توقرو ليها
!

منصور بإنفعال : أمك دي تبقى مرتي !

عماد بإستهزاء : لأ كتر خيرك عارف إنهم مرتك ! مُش دي مرتك الإنت إتخلّيت عنّها في أشد
حوجتها ليك ؟ مُش دي مرتك الحملتها مسؤولية ما قدرها ؟ مُش مرتك الإنت طلّقتها
عشان ما قادر على علاجها ؟

منصور ورجع بآرد : دا كان زمان ، ما تخلّينا نرجع للماضي يا ولد !

عماد بإنفعال : ما نرجع للماضي ؟ نحن ما رجعنا لهو ، الماضي هو الملاحقنا ، الماضي
الكئيب العيشتنا فهو دا ، *وقال بنبرة هادئة حزينة* في ذكريات يا منصور بتتنجحت في
الذاكرة عُمرها ما تنمحي ، ذكريات أليمة !

منصور برود : طيب ، أديني ورق البيت دا ، ولا داير تحتفظ بيولنفسك عشان تبيعو !

عماد بإستغراب : أبيعو ؟ في زول ببيع جزء من رُوحو ؟ أنا أبيع نفسي و أبيع بيان و أبيع
مآزن و أبيعك إنت ولا أبيع البيت دا ! البيت دا آخر حاجة بتربطني بأمي ، الذكري
الوحيدة الخلتها ليها ، ولو بيعتو تفتكرح يجيب ثمن ؟ في حاجات عُمرها ما يكون ليها
تمن ! لأتّها غالية ، وما أي حاجة بتتباع ، الشرف يا منصور ما بيتباع ، الأخلاق يا

منصور ما بتتباع ، الشّهامة والدّم الحارّ ما بيبتباع يا منصور ! في حاجات لو بيعتها ما ح
تقدر ترجع تشتريها مرّة ثانية !

منصور وعأين في الأرض بقلّة حيلة ورفع عينو على عماد : البيت دا بجيب ٩٠٠ مليون يا
ولد ! أديني الورق و خليني أتخرج ..

عماد وإتقدّم بخطواتو قدام باب البيت عشآن يمنع منصور : لو على الورق ، عمرك ما
ح تمسكو بيدك ، يدك تنقطع قبل ما تشيل الورق دا !

منصور بقلّة صبر : عماد جيب الورق دا !

سلطان الكآن متابع الكلام من بدايتو ، إلتفت على وليد وقال بقلق : وليد ، خلنا نروح
عندهم ، أخاف يسوي فيه شي ، تراه يتعاطى ذا !

وليد بإستغراب : يتعاطى ؟ القال ليك منو بيتعاطى ؟

سلطان بسرعة بديهية : ما تشوف كيف عيونه ووجهه ؟ يا واد وجهه مقلوب فوق تحت
، شف حتى دايم يحك أنفه ..

وليد ولأحظ لمنصور : صح والله ! قوم أرح ما يعمل حاجة لعماد !

عند عماد و منصور ، عماد وأقف بشموخ قدام الباب ، أما منصور بقلّة حيلة إتقدّم
على عماد وعأين في عيونو : عماد ، دا آخر إنذار ، زح من هنا ..

عماد بإصرار : البيت دا طلعت منو بإرادتك عمرك ما ترجع ليهو ..

منصور فأر من العصبية ودموغلى بدون مُقدّمات طلّع مطوة من جيبو و طعن بيها
عماد ورماهو على جنبه .. حصل دا كُلو بسرعة قبل ما يستوعبو عماد ، ودخل بسرعة
للبيت ، سلطان و وليد الكآنوا ماشين عليهو جروا بسرعة لما شافوا عماد بيقع على
الأرض قالوا بصوت عالي : عماد !!!

، وصلوا عندو كان بيتألم قال بصوت متحشرج : بـ.بيان ، الورق !! البيت !!

سُلطان الكآن قاعد مع عِماد إندڠر إنو بيان جوا البيت برأها مع منصور : قام على
حيلو بسُرعة وقال لوليد بإنفعال : وليد ، دق على الشُرطة والإسعاف بسُرعة !!

وليد وطلع قميصو الكآن لأبسو وربط بهو خصرعماد ، وصرخ بأعلى صوتو على
الشباب الكآنوا بيلعبو في الميدان البيبعد مسافة ما طويلة عنهم : يا شباب الحازة ، يا
رجال شمبات ، ألقوننا !

دخل سلطان بسُرعة وهو ما عارف يمشي وين بالظبط ؛ دي أول مرة يدخل فيها البيت ،
بقي يدخل في العُرف ويصرخ بأعلى صوتو: بيان ! بيان .. بيان تسمعيني ؟ بيان ! ..
سمع صوت صرختها جاية من عُرفة تانية بسُرعة جرى مكان الصُوت ، لقي منصور
واقف قدام الباب و في يدو المطوة ، إلتفت لقي بيان في واحدة من زوايا العُرفة وشها
ضايع من ملامح الخوف ، لأبسة بيجامة و في يدها توب بتحاول تحتمي بهو من قُوّة
اليأس !

{ بَلَقَاكِ حِلْمِ .. }

(.الحلقة الثامنة عشر.)

" لِلْحُبِّ تَسْعُ وَتَسْعُونَ لَعْنَةً ، أَوْلَهَا إِهْتِمَامٌ ! "

(♥).....*.....••.....*.....(♥)

دخل سلطان بسُرعة وهو ما عارف يمشي وين بالظبط ؛ دي أول مرة يدخل فيها البيت ،
بقي يدخل في العُرف ويصرخ بأعلى صوتو: بيان ! بيان .. بيان تسمعيني ؟ بيان ! ..
سمع صوت صرختها جاية من عُرفة تانية بسُرعة جرى مكان الصُوت ، لقي منصور
واقف قدام الباب و في يدو المطوة ، إلتفت لقي بيان في واحدة من زوايا العُرفة وشها
ضايع من ملامح الخوف ، لأبسة بيجامة و في يدها توب بتحاول تحتمي بهو من قُوّة

اليأس ! أمّا سُلطان بدُون تفكير منو .. رَمَى منصور على الأرض وبقوا يتضاربوا ، و كان سُلطان هو الغالب ، منصور أثناء دفاعو عن نفسو و صدُّوا لَهْرِيَّات سُلطان المُتتاليَّة ، مسك المطوَّة بكل قُوَّتو و رفَعها في الهوا و بكل ذرَّة طاقة عندو هوى بيها على ذراع سُلطان و سَحَبها مسافة عشرة سَم تانية ، وطلَّعها بقوة صرَّخ ممَّا سُلطان إلتفت على ذراعو كان الدَّم بينزف بقوة ، الدَّم اللي هو بيكره يشوفو رأسو دآخ و فقد توازنو و وقع على الأرض ، بيان بخوف و هي شأيفة سُلطان على الأرض و الدَّم بينزف صرخت بصوت عالي : سُلطان !!

منصور إستغلَّ الفرصة و قام على حيلو ماشي على بيان بخطوات واثقة ، قطع عليه و خطواتو الشَّباب الكائنوا داخلين الغرفة ، ما كانوا إلا شَباب شمبات ورجال الحارَّة ، كانوا خمسة أشخاص ، مسكو منصور و وقَّعوا على الأرض و نزلوا يضرُّبوا فيهو ، أمّا سُلطان البدأ ينتبه للحاصل حولو ، رفع رأسو لقي بيان في الزاوية و خأيفة ، نادى بصوت مُتقطع : بيان ..!

بيان إلتفتت على سُلطان ..

سُلطان إتحمَّل على نفسو و وقف بخطوات مُتأرجحة و أشرب بيان إتهما تعي : تعالي يا بيان ، أخرجي من هنا

بيان بخطوات حذرة سريعة مشت على سُلطان و مسكتو من يدو و ساعدتو إنو يطلع من الغرفة ..

سُلطان بتعب : فين الورق يا بيان ؟

بيان بخوف : و .. ورق شنو ؟

سُلطان : أوراق المملكيَّة حقت البيت ..

بيان : م .. ما عارفة ، ب .. بس إحتمال في غرفة عماد ..

سُلطان و مسكها من يدها : طيب تعالي دُليني خلنا نجيبها

بيان وإنتهت للجرح العميق والطويل في يد سلطان، قالت بخوف وبصوت مُتقطع :
سُ.سُلطان يدك !

سُلطان غطى الجرح وإتحاشى النظر للدم : إيه أدري ، ما عليك ، يلا بسرعة نجيب
الورق ..

بيان بإصرار: سُلطان الجرح كبير ما بيستحمل يصبر ..

سُلطان بتوتّر: بيان خلنا نروح نجيب الورق بسرعة لا يطب علينا هالمخبول المتعاطي ..
بيان بإصرار أكبر مسكت التوب الكآن في يدها وشرطت قطعة منو ، مسكت يدو بخفة
وبقت تربط فيهو

سُلطان بتوتّر: بيان .. مو مهم دحين ، خلنا نلحق الورق وبعدين يدي ملحوق عليها ..
بيان وهي مشغولة بربط التوب : وإفترض الجرح إتلوّث ! ح تبقى مُشكلة أكبر إحتمال
يقطعوا فيها يدك ..

سُلطان بقلّة صبر: يآلييل ! بيان الناس في إيش و إنتي في إيش ، اخوك برا قاعد يموت
و أبوك جوا قاعد يموت بعد ، و البيت ذآ في خطر إته ينباع و إنتي مشغولة بيدي ؟ مو
مهم يا بنت !

بيان إنتهت و رفعت رأسها و عآينت فيهو : خلاص إنتهيت ..

سُلطان عآين ليذو وقال بسرعة : طيب يلا خلنا نلحق الأوراق بسرعة ..

ومشوا بسرعة على غُرفة عماد بعد ما بيان وصّفت ليهو الغُرفة .. دخلوا الغُرفة وإتجهوا
على الدّولاب ، وبقوا يفتّشوا فيهو بين الملابس .. بيان و شآفت مجموعة أوراق إتجهت
على سُلطان الكآن مشغول بالتفتيش : دآ يا سُلطان ؟

سُلطان و مسك الأوراق من يدها و عآين فيها مسآفة : إيوا إيوا هي ، يلا بسرعة خلنا
نخرج قبل لا يطب هذآك الخبل ..

ومشوا بسرعة على باب الشارع ، أثناء ما هم طالعين من الغرفة سلطان ضرب يدو
المطعونة بالباب و سببت لهو ألم كبير ، صرخ بصوت عالي ، إلتفتت عليهو بيان وشأفت
الدم رجع ينزف أقوى ، سلطان وشأف الدم فقد توارزنو وإتأرجح في مشيتو إلا إنو بيان
سندتو وقالت بخوف : في شنو يا سلطان ؟

سلطان بألم : الهيموفوبيا ، زهاب الدم .. غطيّه يا بيان غطيّه !

بيان وفهمت قصدو سألت قطعة كانت موجودة في واحد من السراير وربطت يد
سلطان و سندتو عشآن ما يقع و طلّعا من البيت بسرعة ، وليد وإنتبه لسلطان وهو
بيتأرجح في مشيتو مشى عليهو بسرعة و خوف : في شنو يا سلطان مالك ؟

سلطان و مدّ الأوراق : هذا الورق و جنبناه ..

بيان إنتهت لعماد الكآن على الأرض ورأسو على رجلين العم سعيد جرت عليهو بسرعة و
خوف و دموعها بدت تنزل بقوة : عماد !

عماد كآن غايب عن الوعي و ما حاسي بالحولو ..

العم سعيد : ما تخافي يا بّي الإسعاف جآية و أنا كلّمت الشُرطة ..

بيان وكأنتها إتذكّرت حاجة : وين مآزن ؟

وليد : مع أبو سلطان في البيت .. خليك معاهاو يا بيان

بيان و دموعها ما وقفت : لآ ، أنا دايرة اجي معاكم المستشفى

العم سعيد : لآ يا بيان خليك مع مآزن عشآن ما يحس بشي ..

سلطان لوليد: هذي الأوراق يا وليد .. حطّها في بيتنا عشآن لآ تضيع و مآحد يدري عنها

وليد و إستلم الأوراق و إلتفتت على بيان يهدّي فيها : يلا أمشي على مآزن ، عشآن ما

يخاف ، و عماد ح يكون بخير إن شاء الله ، ما تخافي عليهو ..

سُلطان : لا تخافين يا بيان ، إن شاء الله عماد مآفيه إلا العافية ، إنت بس روجي بيتنا
وأجلسي مع أخوك ، البيت مآ فيه إلا أبوي ،

بيان وقامت على حيلها ودموعها بتجري : طيب ..

ومشت بخطوات بطيئة مُترددة على بيت أبو سلطان ، لحقتها عيون سلطان بإبتسامة
خفيفة ..

وليد الكآن بعآين بعيد قال بتبشير: هدي لهما الإسعاف جات ..

جات الإسعاف عندهم ونزلوا منها ممرضين رفعوا عماد على النقالة ودخلوهو جوا
العربية .. وركب معاهم العم سعيد ،

وليد وإلتفت على سلطان : أطلع معاهو يا سلطان ..

سلطان بتردد : لا ، مآ أبغي ..

وليد : سلطان إنت كمان إتعوقت و عماد لازم يكون معاهو زول ، وأنا كمان لازم أقعد
هنا عشآن أنتظر الشرطة وأقفل البيت وأودّي الورق بيتكم ..

سلطان بتأفف : طيب طيب !

وليد وربت على ظهرو : إنتبه لعماد ولنفسك ..

سلطان بتنهيدة : إن شاء الله !

(♫)-----*-----•♫•-----*----- (♫)

في المُستشفى :

دخلوا عماد الغآيب عن الوعي بسُرعة غرفة العمليآت وقفلوها ، مخليين سلطان والعم
سعيد برآ في جو مُتوتّر .. العم سعيد الكآن قاعد على كرآسي الإنتظار وهو بيعآين

لسُلطان المتوتّر ماشي و جآي ، قَالَ بنبرة تعاطُف : سُلطان ، أهدى .. البتعمل فمهو دآ
بدون فايده ..

سُلطان بعصبية : قسَم بالله هألخبل اللي إسمه منصور أخليه يشوف النجوم بعزّ النهار

العم سعيد و أشّر على الكرسي الجنبو : طيب تعال يا ولدي أقعد ..

سُلطان قعد جنب العم سعيد و يدّينو على رأسو بتوتّر ، إنتبه العم سعيد ليد سُلطان

الكأنت مربوطة بقطعة ومليانة دم ، قَالَ بخوف : سُلطان ، يدك مالها ؟

سُلطان بيروود : إنطعنت فيها من منصور ..

العم سعيد بقلق : قوم ، قوم يا ولد أمشي شوف ليك أي دكتور عشان يوقّف ليك

التزيف دا

سُلطان : مو مهم يا عمي !

العم سعيد : ما مهم ! كيف يعني ما مهم ؟ قوم يا ولد وقّف التزيف دا

سُلطان : الصراحة يا عمي أخاف من الدّم عشان كذا ما أبي أروح

العم سعيد : يا سلام ! يعني تموت عشان خايف من الدّم صح ؟ قوم يا ولد قوم !

سُلطان و وقف على حيلو بتأفّف : طيب طيب ..

و مشى بخطوات مُتباعِدة و تفكيرو شآرد صحي من شرود تفكيرو لما إصطدم بممرضة

كأنت ماشة في عكس إتجاهو قال بسرعة و حرج : آآ .. آسف ، ما كُنت منتبه والله

الممرضة بإبتسامة : لآ ما مُشكلة ،

سُلطان المآ كان عارف يمشي وين ، مدّ يدهو للممرضة و إتحاشى إنويشوف الدّم : طيب

معليش طأل عمرك ، بس أناا إنطعنت في يدّي و ما أدري فين أروح ..

الممرضة و مسكت يدهو : سلامات ، تعال تعال ، بسيطة دي ..

و مشى وراهاا لغرفة الإسعافات الأولية ، قعد في واحد من الكرسي بعد ما أشارت ليهو
الممرضة بكدا .. جابت عدة الإسعافات الأولية وقعدت في الكرسي المقابل ليهو .. فتحت
العدة ومسكت المقص وقصت القطعة الكانت على يدو .. مسك القطعة قبل ما تقع و
غمضها في يدو عشان ما يشوف الدم .. بدت الممرضة تطهر في الجرح وتعقم فيهو ، أما
سُلطان سرح بأفكارو وشرد بخيآلو ، إتذكر لمسات اصابع بيان اثناء ما بتربط ليهو في
القطعة وكيف كانت مهتمة وخآيفة شديد ، إتذكر ملامح الخوف في عيونها لما دخل
عليها الغرفة ولقى منصور فيها .. حمد ربو إنو جا في اللحظة المناسبة .. إتهيا ليه إنو
للحظة سمع دقات قلبها ، إتذكر شكلها ! هو ما كان مُنتبه ليهو أثناء الربكة كأن شكلها
عُفوي و بريء .. إبتسم إبتسامة حآلمة و متمنية ، قطع عليهو سرحانو الممرضة القالت
بصوت خآفت : خلاص إتهينا ..

سُلطان و عآين ليدو الملفوفة بشآش طيب ، قام على حيلو بإبتسامة : مشكورة يا دكتورة

..

الممرضة بإبتسامة : العفو ولا يهَمَّك !

طلّع من الغرفة و طلّع تلفونو من جيوبو بعد ما سمعو برن ، كآن المتصل وليد ، ردّ
بسُرعة ، وقال بلهفة : ها ، وش صآر ؟

وليد : الناس بتسلّم أول حاجة ..

سُلطان : ياخي رأيقلك أنا أقعد أسلّم ، أخلص وش صآر ؟

وليد : هههههه ، أبدأ ولا شي ، بس الشُرطة جآت و سأقت منصور بعد ما أنا حكيت
لهم كل الحكآية ، وقالوا إنو أول ما عماد يتحسن إن شاء الله ح يجوا عشان يسألوهو
كم سؤال كدآ ،

سُلطان بإرتياح : الحمدلله ، ها و بيان ؟

وليد بإستغراب : مآلها بيان ؟

سُلطان بتوتُّر: يعني كيفها الحين ؟ لان لما رُحنا كانت تبكي ..

وليد : والله ما عارف ما مشيت بيتكم أنا ،

سُلطان :ليه وينك إنت فيه ؟

وليد : انا قدام بيت عماد ، قفلت البيت وشلت المفتاح و مآي على بيتكم الآن عشان

اودّي الورق و اتطمّن على مآزن وبيان

سُلطان : إيه حلو ..

وليد : و إنتو عملتو شنو ؟

سُلطان : أبدأ طال عُمرك ، بس عماد الحين في عُرفة العمليّات ، يقولون فقد كمية كبيرة

من الدّم ، و رأيح أنا الحين أتبرّع له ، و الحمد لله في شباب في المُستشفى قاعدين

يتبرّعون الحين ..

وليد : الحمد لله ، خلاص أول ما يحصل جديد كلّمنا ، تمام ؟ عشان أجيب بيان ونجي

..

سُلطان : إيه ، خير إن شاء الله ، ،

وليد : يلا يا شباب ، أنا ح أقفل الخط عشان أمشي أعمل القُلتوليك دا ..

سُلطان : يلا ، فمآن الله ..

وليد : مع السّلامة ..

(♫)-----*-----•♫•-----*----- (♫)

{ بَلَقَاكَ حِلْمٌ .. }

(.الحلقة التاسعة عشر.)

" السَّعَادَةُ أَحْيَانًا تَكْمُنُ فِي أَبْسَطِ الْأَشْيَاءِ ! "

(♥).....*.....•••.....*.....(♥)

بعد ساعتين :

قَدَامَ غُرْفَةِ الْعَمَلِيَّاتِ ، سُلْطَانُ كَانَ نَائِمًا وَمَكْتَفٍ يَدِينُو ، فِي حِينِ إِنْوَالِ الْعَمِ سَعِيدِ كَانَ مَاسِكًا الدَّسْبِيحَةَ وَلِسَانُو يَهْطُلُ بِذِكْرِ اللَّهِ .. إِفْتَحَ الْبَابَ صَحِيًّا عَلَى أَثَرِ صَوْتِ سُلْطَانٍ وَقَامَ عَلَى حَيْلِو الْعَمِ سَعِيدِ ، إِتَّجَهُوا بِخَطْوَاتِهِمْ تَجَاهَ الدِّكْتُورِ .. الْعَمِ سَعِيدِ بِلَهْفَةٍ : أَهَا يَا دَكْتُورُ ؟ عَمَادُ كَيْفَ ؟

الدِّكْتُورُ بِإِبْتِسَامَةٍ : لَّا إِتَطَمَّنُوا ، هُوَ كَوَيْسٌ جَدًّا .. الْحَمْدُ لِلَّهِ وَدَا يَرْجِعُ لِلزَّمَنِ الْقِيَاسِيِّ الْجَبْتُوهُوَا فِيهِو ، وَالْحَمْدُ لِلَّهِ قَدَرْنَا نَعْوُضُ النِّقْصَ فِي الدَّمِّ ،

سُلْطَانُ : طَيْبُ يَا دَكْتُورُ ، مَتَى يَصْحَى ؟

الدِّكْتُورُ : هُوَ الْآنَ تَحْتَ تَأْثِيرِ الْمَخْدِرِ ، إِنْ شَاءَ اللَّهُ الْمَخْدِرُ تَأْثِيرُو بَيْنْتَهِي بَعْدَ سَاعَتَيْنِ ، بَسْ هُوَ حَيٌّ يَبْقَى نَائِمًا طَبِيعِي ..

العَمِ سَعِيدِ : أَيُّوَا ، طَيْبُ نَقْدِرُ نَدْخُلُ لِهِيو ؟

الدِّكْتُورُ : طَبِيعًا ، بَسْ بَعْدَ مَا يَطَّلِعُوهُوَا مِنَ الْغُرْفَةِ وَيَنْقَلُوهُوَا لِلْعِنَايَةِ ..

سُلْطَانُ : شُكْرًا يَا دَكْتُورُ ..

الدِّكْتُورُ بِإِبْتِسَامَةٍ رِضًا : الْعَفْوُ ..

وَمَشَى عَنْهُمْ ، الْعَمِ سَعِيدِ إِتْفَتَ عَلَى سُلْطَانٍ : يَا ابْنِي ، إِتَّصَلْ عَلَى وُلِيدِ وَكَلِّمُو ، خَلِيَّهُ يَطْمِنُ بِيَانِ ،

سُلطان : إن شاء الله ..

و مششى بعيد و طلّع تلفونوو إتصل على وليد ، كآنت السّاعة ٨:٣٠ المسآ ، في غضون

ثواني ردّ وليد ، سُلطان : هلاّ وليد ..

وليد : أهلين سُلطان ، اهاا في جديد ؟

سُلطان : إيه ، الحمدلله عمآد طلّعوه الحين من العمليآت ، ويقولون ماّ فيه إلاّ العافية

.. و إن شاء الله بُكرا الصُّبح يكون صحى ..

وليد بفرحة : الحمدلله ياخي .. الله يبشرك بالجنة يا سُلطان

سُلطان : آمين يا رب وياك ..تقدرون تجون بُكرا إنت و بيان

وليد : إن شاء الله ، سُلطان ، بيان دي دايرة تتكلم معاك

سُلطان بإرتباك : إنزين ..

بيان بصوت تعبان : أهلين سُلطان ..

سُلطان بلع ريقوو قال بتوتّر: هلا بيان ، كيفك ؟

بيان : الحمد لله بخير ، كيف عماد الآن ؟

سُلطان : لا الحمد لله تطمّني خرجوه من العمليات والحين تحت تأثير المخدّر ..

بيان بفرحة : الحمد لله يا رب .. يعني قدرو يعوّضوا النقص في الدّم ؟

سُلطان : إيه الحمد لله ..

بيان : الحمدلله *سكتت مسآفة ورجعت تتكلم* وكيف يدك يا سُلطان ؟

سُلطان بإبتسامة : الحمد لله أحسن ، نظّفو الجرح و عقّموه و الحمدلله ..

بيان : الحمدلله ،

سُلطان : طيب بُكرا الصُّبح تعالوا على السّاعة ٨ ، طيب ؟

بيّان : إن شاء الله ..

سُلطان : طيب يلاً فمآن الله ..

بيّان : في أمان الله ..

وقفل الخَط بإبتسامة ولِحِق العم سعيد الكآن مَشى على عُرفة عماد ..

(.....•○•.....)

في عُرفة عماد :

دخل سُلطان العُرفة بعد ما سأل واحد من الدّكاترة الوّصفوليهو العُرفة ، لقي العم سعيد قاعد جنب عماد في واحد من الكراسي .. بخطوات هادئة مَشى على العم سعيد و ربّت على كتفو ، إلتفت العم سعيد على سُلطان ،

سُلطان بإبتسامة : عيّي ، يلاً عشان تروح ..

العم سعيد : لا يا ولدي ، خَليني أقعد هنا مع عماد ..

سُلطان : يا عيّي الله يرضى عليك لأزم تروح ، عشان زوجتك و عشان بيّان تتطمّن بعد .. عشان تفتح الدّكان بعد ..

العم سعيد إتمهد تنهيدة حارة : كلامك صحّاح و الله * وقام على حيلو وإلتفت على عماد*
يلاً في أمان الله يا ولدي ..

و طلّع سُلطان مع العم سعيد و ركّبوا العربية و سلّم عليهم و جاّ راجع العُرفة .. دخل العُرفة و قفل الباب و قعد مسافة يعاين في عماد .. كأن صدره عاري و منطقة خصرو ملفوفة بشاش طيّ و في يدو المغذي .. سُلطان و هو بيتأمل في عماد طرت على بالو بيّان ، قال بإنزعاج : وش ذا ؟ ماني قادر أوقّف تفكير فيها ! حتى في هالوضع الصّعب و هي

شأغلت "ن" بآلي!! وختّ يدينو على جوانب رأسو: سُطان ، يرحم أمك شيلها من رأسك
الحين!

ومشى بخطوات بطيئة على الكنبه الكانت بعيدة عن سرير عماد رقد فيها بتعب و إتهد
، قال فجأة و كأنو إتدكر حاجة : صبح ! ما صلّيت المغرب و العشا !!

وقام بسرعة إتوضّى و طلع صلّى على الأرضية الباردة .. في النهاية رجع رقد على الكنبه
بتعب ، و في لحظات غفى في نومة عميقة ! ..

(♫)-----*-----•♫•-----*----- (♫)

الخرطوم - حي المطار:

سعد و خالد الكانوا قاعدين في الصّالة و بالهم مشغول بعماد و منصور ..

خالد إلتفت على سعد : سعد ، ح نعرف كيف الحصل شنو؟

سعد : ما عارف والله ، لأزم واحد فينا يمشي بكرة و يعرف الحصل شنو ،

خالد عاين في سعد بإبتسامة ، سعد : شنو؟ ما بمشي أنا غايتو ..

خالد : ليه ؟ مُش إنت مشيت أول مرة ؟ يعني ح يعرفوك !

سعد : ياخي أنا ما داير أمشي ، أهاا و فرضاً عرفو إنون نحن الحرشنا منصور ، يقبضوني

أنا مُش ؟

خالد بإبتسامة خبيثة : ما تخاف يا إبني ، إنت ناسي إنون نحن عندنا ظهر!

سعد : صبح صبح ! خلاص بكرة بجيب ليك خبرو (:

(♫)-----*-----•♫•-----*----- (♫)

في بحري - شمبات :

صَبَّاح اليَوْم التَّانِي ، فِي بَيْت أَبُو سُلْطَان ، بِيَان ووليد الكَانُوا صَاحِبِينَ مِنْ آذَان الفَجْرِ
، شَرَبُوا الشَّاي و مُنْتَظِرِينَ السَّاعَةَ ٨ تَجِي .. بِيَان وَهِيَ بَتَلْبَس فِي مَازَن عَشَان تَوَدِّيهِو
لَلجِيرَان لَأَنو إْتَفَقُوا إِنْو مَازَن مَا يَجِي مَعَاهم عَشَان مَا يَخَاف وَ نَفْسِيْتو تَتَعَب .. قَال مَازَن
بِفَرْحَةٍ : نَحْن مَاشِينَ وَين يَا بِيَان ؟

بِيَان بِإِبْتِسَامَةٍ : ح أُوَدِّيكَ نَاس عُبُودِي عَشَان تَلْعَب مَعَاهم ..

مَازَن بَتَكشِيرَةٌ بِرِيئَةٍ : أَبِييت ، مَا دَاير

بِيَان بِإِسْتِغْرَابٍ : لِيهِ ؟

مَازَن : هُو بَقِي مَا صَحْبِي ، عَشَان فِي الرُّوضَةِ قَال لِلأَوْلَاد مَازَن مَا عِنْدو أَبُو ..

بِيَان بِتَأَلُّمٍ : شِينَ عُبُودِي دَا ، لِيهِ يَقُول لِيهِمْ كَدَا .. تَأَنِي أَصْلُو مَا ح نَمشِي لِيهِمْ .. أَهَا دَاير
تَمشِي لِمَنو ؟

مَازَن : نَمشِي نَاس مُصْطَفَى ؟

بِيَان : خَلَاص نَمشِي نَاس مُصْطَفَى ..

مَازَن بِحَيْرَةٍ : عَمَاد وَين يَا بِيَان ؟

بِيَان بِإِرْتِبَاكٍ : آآ.. عَمَاد ، عَمَاد مَشَى قَرِيب وَ جَآي

مَازَن : قَرِيب وَين ؟

بِيَان : قَرِيب قَرِيب ، *وَقَامَت عَلَي حِيلِهَآآ وَ مَسَكْتو مِنْ يَدُو* يَلَا عَشَان مَا نَتَأَخَّر عَلَي نَاس
مُصْطَفَى ..

وَ طَلَعَت لَجِيرَانِهِمْ وَ خَلَّت مَازَن عِنْدِهِمْ وَ جَآت رَآجِعَةً ، لَقَّت وَليد وَ عَم فَهَد وَ آقْفِين

قَدَام البَاب ، وَليد بِإِبْتِسَامَةٍ : يَلَا نَمشِي ؟

بِيَان : آي يَلَا ، بَس عَمو فَهَد مَا ح يَمشِي مَعَانَا ؟

قفل الخَط وقَام على حيلو شآف السّاعة كآنت ٨:٤٥ قَام على حيلو إتوضّى وطلع صلبى
الفجر، على السّلام الأخير، دخلت الممرضة وفي يدها مجموعة أوراق ، عآينت في
الأجهزة و سجّلت ملاحظات و جآت طآلعة إآ إنو صوت سُلطان وقّفها : معليش بس أبى
أسأل ، الحين المُخدّر تآثيره إنتهى ، صح ؟

الممرضة : أيوا صح ..

سُلطان : يعنى عادى نصحيه ؟

الممرضة : لآ طبعآ ما عادى ، لآزم يآخذ رآحتو كآملة ..

و طلعت بدون مآ تنتظر رد .. قَام سُلطان على حيلو وقعد في الكرسي الجنب عمآد وفي
يدو سبحة وقعد يستغفر .. قطع عليه الجوّ الرّوحانى صوت إنفتاح الباب ، إلتفت
وراهو كآن وليد و بيآن ، قَام على حيلو بإبتسامة عريضة حضن وليد بقوة ،

وليد : حمد الله على السّلامة يآ دكتور ..

سُلطان : الله يسلمك حبيبي ..

وبعدو عن بعض ، ومدّ يده لبيآن و سلم عليها بهدوء ..

وليد و إتجّه على عماد : كيف الشّاب دا ؟

سُلطان : الحمد لله مآفيه إآ العافية .. بس هو نآيم الحين نوم طبيعى ..

بيآن و قرّبت من عمآد طبعت بوسة على جبينو ، و قآلت بصوت خآفت : تقوم بالسّلامة
يآ رب ..

وليد : أبوك قآل ليك إتصل علمو دآير يتطمّن عليك ،

سُلطان : إن شاء الله ، هآ أفطرتم و لآ ؟

وليد بضحكة : نفطر؟ نفطر كيف مع بيان دي من الفجر أزعجتني ، قوم عشان نمشي
لعماد ..

سُلطان و عآين في بيان بإبتسامة : ما تنلآم ، أخوها .. * ورجع عآين لوليد * طيب أنا
بروح أجيب شي نفطربه .. * وإتجه بخطواتو على الباب *

وليد : أجي معاك ؟

سُلطان وفتح الباب : لا ما يحتاج ، أدل الطريق ..

وطلع و قفل الباب وراهو ..

(♫)-----*-----•♫•-----*----- (♫)

الخرطو شرق - حيّ الرّياض :

في عُرفة ريم ، كانت قاعده و معاهها هيفاء الكانت مُنتظرة عماد يجي ، ريم وهي حاسّة
إنو الزّمن مشى ، قالت بقلق : السّاعة كم يا هيفاء ؟

هيفاء و عاينت في السّاعة : السّاعة ٩ يا ريم ..

ريم بقلق أكبر : و عماد لسّة ما جا ؟

هيفاء : أي والله لسّة ..

على آخر كلمة دخل ياسر من الباب قال بنبرة جدّية : هيفاء يلا عشان أوصلك الجامعة

..

ريم وهي بتسمع صوت ياسر : ياسر ، عماد لسّة ما جا ؟

ياسر و عآين لساعتو : أي والله ما جا ، غريبة !!

هيفاء : طيب دُق عليه ..

وليد بإبتسامة : لا إطمئن ، الشرطة جأت و قبضتو وقالوا إنو إن شاء الله أول ما
تتحسن ح يجوا ويسألوك كم سؤال ..

عماد : جميل جداً .. * وقال بحيرة* نفسي أعرف هو كيف عرف إنو البيت قيمتو ٩٠٠
مليون ، ومنو القال ليهو إنو أنا داير أبيعو ..

سُلطان : لا تشغل نفسك بذي الأشياء الحين ..

وقعدوا يتونسوا و مشى الزمن ، سُلطان و عاين لساعتو ورجع عاين لوليد و بيان : يلا يا
شباب روحوا ، خلوا الرجال يرتاح ..

وليد : لالا أمشي إنت و بيان ، أنا بقعد مع عماد ..

سُلطان : يبوي أنا بجلس مع عماد ، رُح إنت و بيان ..

بيان : لا أنا كمان دأيرة أقعد مع عماد ، أمشوا إنتوا إثنين ..

وليد و إلتفت على بيان : بيان إنتي لازم تمشي عشان مآزن ، * وإلتفت على سُلطان* وإنت
لازم تمشي عشان أبوك سأل منك ، غير كدا إنت من أمس قاعد .. أمشي البيت إرتاح و
أخذ ليك دُش ، و تعالوا بُكرا الصباح ..

سُلطان بإستسلام : طيب .. * وإلتفت على بيان* يلا يا بيان ..

سَلّموا على عماد و طلّعوا سَوا ..

(♫)-----*-----•••-----*----- (♫)

مرّ أسبوع :

عماد طَلع من المُستشفى و قاعد في البيت راحة بوصية من الدِكتُور ..

الشُّرطة إستدعت عماد للقسم و مشى و حكى كُل الحكاية ..

منصور إعترف على سعد و خالد البدورهم طلّعوا مّتها زي الشّعرة من العجينة لأنو
عندهم ظهر!

منصور أخذ ١٠ سنوات سجن بتهمة تعاطي المخدرات! و ٤ سنوات بتهمة الإعتداء
بالسلاح الأبيض!

عماد إتصل على ياسر و كّممو بالحصل ، و بالتالي ياسر كّم ريم الكانت طول الأسبوع
مقلّقة ،

سُلطان و وليد بقوا طول اليوم مع عماد في البيت لغاية ما إتعافى عماد ،

أبو سُلطان لسة ما كّم أم سُلطان برغبة إبنو الزّواج من بيان ..

عماد وگل وليد إنو يحجز ليهو موعد مع دكتور العيون الألماني "أديل أنو" و فعلاً وليد
حجز..

(♩)-----*-----••♩•-----*----- (♩)

بعد أسبوع يوم الجمعة :

عماد الكآن قاعد في الحُوش و قدّامو بيان بتكّب في الشّاي ، رفعت رأسها على عماد و
قالت بإبتسامة : صاحبك الإسمو ياسر دا من الصّباح بيدق عليك ..

عماد : جد ؟

بيان : جد و الله ، شكلوزول طيبان ..

عماد : صح و الله ظريف شديد ياسر دا و طيبان و على نيّاتو ..

بيان : ح تمشي بكر الدوام يا عماد ؟

عماد و شرب من الشّاي : أي إن شاء الله ..

بيان : بس يا عماد إنت لسه تعبّان ،

عماد : لا الحمد لله بقيت كويّس ..الدكتور قال أسبوع راحة بس ، وبعدين ريم دي
مسكينة ما معاها زول كل الناس حولينها مشغولين عنّها و مآفي زول فأضي ليها ..
بيان ورجعت تكب في الشّاي : الله يكون في عونك يا عماد .. ويديد على قدر نيتك ..

عماد : آميين يا رب ..

(♫)-----*-----•♫•-----*----- (♫)

الخرطوم شرق - حيّ الرياض :

صباح اليوم الثاني ، دخل عماد الفيلا الضخمة من الباب البوذي على بيت ريم ، دخل
بابتسامة عريضة لأقاهاو ياسر بابتسامة أعرض و قال بصوت عالي : أووه عماد ياخ !

مشى عليهو بسرعة و حضنو بقوة ..

ياسر : عماد عدييل ؟ ياخ حمدلله على السلامة ، والله قلقتنا عليك ..

عماد بتألّم : آآخ ، الله يسلمك ..

ياسر وزحّ منو : معليش يا شاب ، بس جد ياخ ليك وحشة ،

عماد بابتسامة : ما يوحشك غالي يا رب ..

ياسر : وهو في أعلى منك *ومسكو من يدو ودخلوا الصّالة سوا*

ياسر بصوت عالي وبعين جهة السلم البطّ على غرفة ريم : يا هيفاء ، نادي ريم و
تعالى بسرعة ..

في خمسة ثواني جأت هيفاء نازلة و معاها ريم الكآن بأين من وشّها إنها تعبانة ،

هيفاء و إنتهت لعماد القاعد جنب ياسر قالت بفرحة : عماد !

عماد قام على حيلو و سلم عليها بابتسامة و عاين لريم الكانت ما فاهمة حاجة ..

و جرى على البيت جواً ..

بيان جأت راجعة تلحقو إلا إنو سلطان وقفاها : خليه ينظفه ، عشان لا يتعود على
الغلط كثير..

بيان : بس ما صح يتعود إنو هامتو تنكسر! :

سلطان : مو مشكلة ، ع الأقل يتعلم إنه مو دأيم يرفع خشمه في السما وإن محد قدّه ..

بيان بتفكير: أمم ، صح .. *وانتهت ليدو* كيف يدك الآن ؟

سلطان : لا أحسن .. أحسن كثير ، و الفضل لله ثم لك .. شكراً ..

بيان بإبتسامة : العفو ، ما عملت شي .. *ونزلت خصلة متمردة من شعرها على عيونها*

سلطان بدون ما يحس رفع الخصلة مع بقية خصل الشعر وقال بإبتسامة : خيها لا
تعذب قلبي أكثر..

بيان بخجل و حياء دخلت البيت ونست الباب مفتوح من الخجل ،

سلطان و إستوعب الحصل قال بسرعة : وش ذا ؟ وش قاعد أهذربه أنا ؟ أستغفرالله
يا رب هذي أخت صديقي ، بالله هذا شي تسويته يا سلطان ؟ يا لييل .. أنا لازم أروح و
أعلم أمي إني خلاص بأزوجها !

و بسرعة مشى جهة البيت ..

(♫)-----*-----•••-----*----- (♫)

الخرطوم شرق - حي الرياض :

في الحوش قعدت ريم ومعاها عماد بيحكي لها قصتو مع منصور ،

إتهد وقال : بس ، وبعد كذا فقدت الوعي ، صحيت وأنا في المستشفى ،

ريم : سلامتك .. بالجد والله خفنا عليك أسبوع كامل ،

عماد : الله يسلمك *وقال فجأة بإستدراك* بالمناسبة ، حجزت موعد مع الدكتور
الألماني القُتوليك داك ..

ريم بإهتمام :ليه يا عماد ؟ ما كان في دأعي تتعب نفسك و إنت في الحالة دي ..
عماد : مآفي تعب ولا شي ، بعدين أنا قُلت ليك إنو الدكتور دآ جآي أسبوعين بس ،

ريم : أهأا ، طيب و حجزت متين ؟

عماد : إن شاء الله يوم الثلاثاء الأسبوع الجآي ،

ريم : إن شاء الله ..

عماد : مآ عارف ليه بس أنا مُتفائل شديد بالدكتور دآ ، حآبتي إنو إن شاء الله ح
تشوفي النُور على يدُو ..

ريم بأمل : يآآ ريت والله يآ عماد ، لأنو نفسي في حاجات كتيرة أعملها ..

عماد بإهتمام : زي شنو مثلاً ؟

ريم : نفسي أرجع و أكمل درآستي ، و نفسي أرجع و أمسك الفرشة و الألوان و أقدر أرجع
أرسم براحتي .. بحب الرسم شديد أنا .. و نفسي أرجع أشوف نفسي في المرآية .. نفسي
أشوف الجُوري و أرجع بيتنا عشآن أهتم بالجُوري العندناً في البيت ..

عماد بإندمآج : و تآني ؟

ريم و عآينت بعيد : و نفسي أقدر أشوفك ..

عماد إبتسم إبتسامة خفيفة ، إلآ إنو جآهو ألم مُفآجئ في منطقة الخصر قآل بألم :

آخخ ، رجع تآني !

ريم بخوف : في شنو يآ عماد ؟

عماد و قآم على حيلو مآ تهتبي كثير ، ألم مُفآجئ بس .. أنا قايم اتمنئي ..

ريم ووقفت معاه : طيب خَليني أجي معاك ..

عماد : طيب ، بس خَلِيْ بِألك مَا ح أمسكك ، عشان تتعودي على الطريق ، يعني لا سمح

الله لو حصل زي الأسبوع الفآت تقدري تتصرّفي ..

ريم بخوف : عماد لا ، مَا بعرف الطَّرِيق والله ..

عماد : مَا مُشكلة أَنَا بوصِّف ليك بس خَلِيك جنبي إنتي ..

ريم : طَيِّب ،

عماد : طيب يَلاً أمشي سييدا ..

ريم و مشت معاهو : أوكي ، لو جآت لَفَّة كَلَمني ..

عماد : لَسَّة ، ح تمشي سييدا طوآلي :

ريم : أوكي ، هدي أَنَا ماشَّة سييدا ..

مَاشَّين في سَكُوت تَام مصأحبو أَنفاسهم ، قَرَّبوا من حوض الجوري ..

ريم بإرتياح : يَا سلام وصلنَا عند الجُوري ..

عماد : هههههه ، مَا شاء الله عليك ، هو فعلاً ريحتو قويَّة .. *وعآين في الورد مسآفة

ومشى عليه وشَال مُنُووردة ورجع لريم*

ريم بإستغراب وهي سَامعة صوت خطوآتو : مشيت وين ؟

عماد بإبتسامة غرس الوردَة بين خُصلات شعرها وقال بإبتسامة : تشبهك !

ريم بخجل ولمست الوردَة على شعرها ، قالت بهدوء : تسلم !

عماد بإبتسامة بحأول يغيّر الموضوع : عارفة إنو إنتي بتشبهي ريمي ؟

ريم بإستغراب : ريمي منو ؟

العم فهد بتهيدة حارة : هذا اللي بغيت أكلمك فيه .. توني كنت أكلم أمك ..

سُلطان بتوتر: وش قالت الغالية ؟

العم فهد : مُصرة على قرآرهااا ، ، أنت لنورة و نورة لك !

سُلطان وقام على حيلو: وش قاعد تقول يبة ؟ أنا ما أبي غير بيان !

العم فهد : أدري يا ولدي ، بس أمك الله يهدآها تبي غير كذا .. تبيك لبنت عمك ..

سُلطان بعصبية : أنا ما أبيها يبة ، ما أبي بنت عمي .. وش ذا ؟ ما أقدر أحد شي بحياتي ؟

العم فهد : يا بني العادات تقول..

قأطعو سُلطان بعصبية ووش أحمرزي لون عيونو: العادات تقول العادات تقول ؟ وش ذنبي أنا إذا العادات تقول ؟

ومشى على أبوهو وقعد على الأرض قدامو مسك يد أبوهو وبأسها و عآين فيهو بعيون رآجية

: يبة ، إنت تبي سعادتي صح ؟ أنا ما راح أكون سعيد إلا إذا تزوجت بيان ، تكفى يبة لآ تحرمني من سعادتي ..

العم فهد : يا ولدي ، أمك تبيك لبنت عمك ..

سُلطان وقام بعصبية : وإننت وشو؟ منتب رجال ؟ ليه مآلك كلمة في البيت ؟ كل شي تسويه أمي ؟

العم فهد وقام بعصبية : أسكت ! هذا اللي باقي بعد ، مآني موافق ولا شي .. وبتزوج نورة يعني بتتزوج نورة ..

سُلطان : مآني متزوجها .. وهذا وجهي لو تزوجتها

ومشى على إتجّاه الباب بخطوات قويّة و غاضبة

العم فهد بعصبية :سُلطان ! أقولك كلام تسمعه ، وين رايح ؟

سُلطان و إلتفت على أبوهو : أنااا خارج من ذا البيت و حرام بالله ماني برأجع إلا و بيان زوجتي ..!

* وطلع من البيت بسُرعة مُتجاهل نداءات أبوهو المُتكرّرة*

(♫)-----*-----•••-----*(♫)

صباح اليوم التّاني :

طلع عماد من البيت السّاعة ٦:٣٠ .. قابلو في الطّريق وليد و باين في وشو تضاريس التّعب ، قال بإستغراب : وليد ؟

وليد بإبتسامة باهتة : اهلين عماد ..

عماد بإستغرابو : مالك ؟ البطلّعك قبل الشّمس شنو ؟ الساعة لسه ٦:٣٠ !

وليد و مسح بيدو على وشو : مافي حاجة ، بس صاحبك سُلطان دا ..

عماد : مالو سُلطان ؟

وليد : طلع أمس من البيت و ما رجع !

عماد بإندهاش : و مشى وين ؟

وليد : إتشاكل مع أبوهو و خلى لهو البيت ، بس ما عارفين مشى وين ..

عماد و فهم الموضوع : أيوااا ! وفتشتو كل مكان ؟

وليد : حتّة حتّة ، حتى الدكاكين واحد واحد ..

عماد بإبتسامة : ما تشغل بآلك إنت ، تقريباً عرفتو وين .. أمشي إرتاح إنت ..

وليد : طيب ، و عليك الله لو لقيتو قول ليهو أبوك ما نام أمس مُنتظرك قال ..

عماد : إن شاء الله .. بس أمشي إنت ،

وليد : طيب يلاً ، أشوف وشك بخير ..

(.....•○•.....)

في بيت أبو سلطان :

قَاعِد في السَّرِير و تَعْبَان و في يَدُو سَبْحَة ، من أمس ما نام ، شَاف التَّلْفُون بِيرن كَانَت دي أُم سُلْطَان رَفَع التَّلْفُون بَتَعَب و رَدَّ :

ألو ، لآ والله ما جا باقي ، ما أدري والله .. كيف يآ أُم سلطان أروح أدور عليه .. يالله يالله أروح الغرفة الثَّانية ، لآ والله ما أقدر ، إيه خويَّانه يدورون عليه .. إيه من أمس ما جا .. أقولك صفق الباب و رآح ، ما ادري أخاف إنه سوى بروحه شي ! إيه والله راح معصَّب من هنا ..

و فجأة إتقلبت ملامحو للعصبية : يا حُرمة الله يهدالك ، ولدك ما ندري فينه و إنت تتحلِّفين تزوجينه بنت عمّه ! لا والله بعد اللي صار ماني مزوَّجه نورة ! لآ ما أمزح ، البنت ما يباها وش نسويِّله يعني ، نغصبه ؟ لآ نورة نصيِّها بجيلها .. و حرام بالله ماني جآي المملكة إلآ و هو خاطب البنت اللي يباها .. إيه ما أمزح ، هذا ولدي و أنا حُر فيه .. و أعلى ما بخيلكم إركبوه !

(♫)-----*-----•♫•-----*----- (♫)

الخرطوم شرق - حيّ الرِّياض :

دخلت غيداء غُرْفَة ريم عَشَان تصحِّها كالعادة ، لقتها قَاعِدَة في المُصْلَاية و بتستغفر ،

قَالَت بِاسْتِغْرَاب : ريم ؟ عرفتي تقومي كيف ما شاء الله و تمشي تتوصِّي و كمان تعرفي

إتجاه القبلة !

في بيت أبو سعد ، كان سعد طالع على دوامو ، مسك التلفون يشوف الساعة كم ، إلا
 إنو ابتسم لما شاف صورة ريم الكانت خلفية تلفونو .. ابتسم وإندكر أول يوم لما شافها
 ، فعلاً خالد ما كذب لما قال إنها جميلة ، حتى عيونها الما بتشوف عجبتمو !
 إتحمس إنو ما عرفها إلا متأخر .. ما عرفها إلا لما خالد عرفها ، خطرت في بالو فكرة ،
 ريم حالياً خطيبتمو ! وأستاذ سيف مُستعد يعمل أي حاجة عشان يتخلص منها !
 قرّر إنو الليلة ما يمشي المدرسة ، طلع من البيت وركب عربيتو مُتجّه على فيلا الأستاذ
 سيف !

(♫)-----*-----•♫•-----*----- (♫)

{ بَلَقَاكِ حِلْمٌ .. }

(.الحلقة الثانية والعشرون .)

" والأشياء التي لا نُحسن إخفاءها ! تفضح .. "

(♥).....*.....•♫•.....*..... (♥)

الخرطوم شرق - حيّ الرياض :

ووصل عماد فيلا الأستاذ سيف ، وقرّر إنو ياجّل موضوع سلطان شويّة ، يمكن يهدأ و
 يرجع بنفسو .. كالعادة إستقبلوا ياسر الكان قاعد في الحوش مُنتظر ريم تنزل عشان
 يكلمها إنو سعد جاي .. قعد مع ياسر في واحد من الكراسي حول واحدة من الطرايز
 الكثيرة المنتشرة في أنحاء الحديقة .. اثناء قعدتهم الهادية دي إلا من صوت العصافير و
 طنين النحل المُتجمّع على الورود .. وقفت عربية سوداً فخمة قدام البوابة .. نزل منها
 سعد بخطوات وأثقة إتجه على ياسر وعماد ، طلع النظارة الشمسية وقال بإبتسامة
 هادئة وأثقة : صباح الخير ..

عماد ببرود : صباح النور ..

يأسر بإستغراب : سعد ؟ الجأبك شنو بدري كدا ؟

سعد بإبتسامة : شنو يا ياسر ، أرجع ولا كيف ؟

يأسرو إستوعب هو بقول في شنو : آآ .. قصدي يعني الوقت لسه بدري ، وانت عندك

دوام في المدرسة صح ؟

سعد وقعد في واحد من الكراسي وقال بثقة : قررت الليلة ما أمشي ، قلت أجي الليلة

لريم .. هي برضو خطيبتي و أنا مُقَصِّرَ معاهااا ..

يأسر بعدم إقتناع : أهأاا ..

سعد بإبتسامة : أستاذ سيف موجود ؟

يأسرو قام على حيلو : أي قاعد ، أنا ديهوليك ؟

سعد و سَنَدَ ظهرو على الكرسي بإسترخاء : يا ليت ..

يأسر : إن شاء الله ،

وأدهم ظهرو و مشى عنهم بعيد على الجانب الثاني من الفيلا ..

سعد و عآين لعماد : كيف يا عماد ؟

عماد على نفس برودو : الحمد لله ماشي الحال ..

سعد : وكيف ريم ؟

عماد : ما عليها عوجة الحمد لله ..

سعد : الحمد لله ..

و سَادَ بيهم صمت قاتل و كئيب .. حتّى أنفاسهم تخيل لهم إتهما وقفت ، قطع عليهم الصمت دأ خطوات الأستاذ سيف الكآن متوجّه عليهم بثقة و شموخ و عزّة نفس ما بتتلقي إلا عندو هو ! و جنبو يأسر إبنو الوحيد .. وصل عندهم بإبتسامة عريضة .. وقف

سعد على حيلو و سلم علمو ، وقعد مكَانو ، في حين إنو الأستاذ سيف قعد جنب عماد و
مُقابل سعد ..

سيف بإبتسامه : خطوة عزيزة يا سعد .. شنو المفاجأت دي ..

سعد : هههههههه ، لآ يا أستاذ ، بس قررت أجي أزورريم ، طولت مَمها شديد والله ..

سيف : آي والله ، ياخ معقولة ياخ .. هي برضو خطيبتك ، حتى سلام سااي ما تسلّم !

سعد : هههههههه ، معليش يا أستاذ ، حقكم علي ، بس برضو المشاغل ..

سيف : لآ والله مُقدِّرين ، الناس ظروف ..

سعد : الله يخليك يا أستاذ ، بس أنا كُنت دايرك في موضوع بسيط كدا ..

سيف و رفع ظهرو من الكرسي الكآن مُسترخي عليه و عقد حوآجيو : خير إن شاء الله ،
موضوع شنوياً إبني ؟

سعد و عآين ليدُينو الكآنت مُتشابكة ببعض من التوتّر : لآ هو خير إن شاء الله أناا بس
قُلت .. يعني إنو .. *ورفع رأسو* أناا دآير أعقد على ريم ..

سيف بإبتسامه و وش مُتهلّل و كأنو في جبل على صدرو و إنزاح : تعقد ؟ والله دي خطوة
خير .. وأحسن موضوع والله .. متين لكن ؟

سعد بإبتسامه : والله أنا شخصياً جاهز ، إنتو حدِّدوا وقت و أناا بقولكم تم !

سيف بإبتسامه : والله نحن كمان جاهزين ، نعقد طوالي بُكرا دي !

عماد الكآن قاعد من بداية الجلسة ببرود ، قرّر إنو يتدخّل و يدّي رأيو ، رفع ظهرو من
الكرسي الكآن قاعد عليه بدون إهتمام و قال بنبرة جدّية : معليش يا أستاذ سيف على
التدخّل ، بس أنا نسيت أكلمك إنو أنا حجرت لريم موعد مع الدكتور الألماني القلتوليك
يوم الثلاثاء الجاي ..

سيف وبيتصنع الإهتمام بريم : خبر جميل والله .. *وفي نفسو: إن شاء الله ما يقول داير
قروش بس !*

عماد : طيب يا أستاذ أنا شايف إنو موضوع العقد دا يتأجل شوية ، لغاية ما نمشي
للدكتور دا .. لو قال مآفي أمل ، تعملوا العقد ، لو قال في إمكانية لعلاجها ننتظر لغاية
ما ينتهي العلاج ، أقلها تحضر العقد وهي شايقة الثور ، هي في النهاية بنت و من حقها
يعني تفرح بيوم زي دا .. *والتفت على سعد بملامح جامدة* ولا شنويا أستاذ سعد ؟

سعد بإرتباك : صح صح والله كلام جميل .. أنا شايف إنو نطيق كلام عماد دا ..

سيف بتوتر: لـ.لكن !

سعد : ص..صح ، المفروض تفرح بيومها ، خلاص يا أستاذ نأجل الموضوع دا شوية ..
سيف وقام من الكرسي ورمى لعماد نظرة غضب قال بصوت فخم و جآدي : خلاص إن
شاء الله حصل خير ، لما تبقى على موعد ، كلمني .. *وعآين فيهم الإثنين* عن إذلكم !..
ومشى عنهم بخطوات سريعة ومتباعدة لحقو ياسر ..

سعد و إلتفت على عماد وقال بتوتر: عن إذلك ، أنا طالع لريم !

عماد ووقفو : خليك مكانك ، انا بناديها ..

سعد : لـ.لكن !

عماد بإبتسامة بأردة : دا برضو شغلي !

(.....•○•.....)

في غرفة ريم :

عماد بإبتسامة إلتفت على ريم وقال بهدوء : كيفك ؟

ريم بإبتسامة هادئة : الحمدُ لله ، كيفك إنت ؟

عماد : تمام الحمدُ لله .. غريبةَ أول مرة أشوفك مبسوطه من الصَّباح !

ريم : فعلاً .. أنا أول مرة أنبسط كدا ، دي أول مرة من يوم فقدت بصري أقدر أمشي
خطوتين برأي ..

عماد : إن شاء الله دائماً ، يلاً أنا جيتك هنا عشان دأير أسوقك تحت ..

ريم و عقدت حواجبها : ليه ؟

عماد : مآ عارف ، خطيبك الإسمو سعد دا تحت ..

ريم بدهشة : جآ الآن ؟

عماد : آأيوا ، وقال جآي عشان يعقد عليك !

ريم وقامت من مكانها بسُرعة وقالت بتوتُر: عقد ! يعقد علي ؟ أنا ما إتوقعت الموضوع
يوصل كدا !

عماد بإستغراب قام على حيلو و مشى عليها بهدوء : بسم الله ! خُفتي كدا مالك ؟

خطيبك و جا يعقد عليك ! مُش إنتي وافقتي علمو من البداية ؟

ريم وتوتُرها زاد : ما وافقت عليه والله يآ عماد ، دا عيِّي سيف ! أنا ما دايراهوياً عماد
.. عليك الله أمنعو ..

عماد بهديّ فيها : طيب أسمعيني أهدي شويرة كدا ، أنا إتكلّمت معاهم و وافقو إنو يكون
بعد العلاج إن شاء الله ..

ريم : يعني بعد العلاج ح اتزوّجو ؟

عماد بحيرة : لآ ، بس إن شاء الله للوقت دآك بنكون لقينآ حل !

ريم ساكتة مكانها ، بس لسه متوترة ..

عماد : طيب يلا نزل ليه تحت ، عشان ما يجي طالع لينا هنا ..

ريم : أوكي

(.....•○•.....)

في الحوش :

نزلت ريم مُستندة على يد عماد .. سعد الكان مُلتفت على البوابة ، سمع خطوات ريم و

عماد إلتفت وراهو لقاهم ماشين علمو ، وقف مكانو بإبتسامة عريضة .. وأسرع

بخطواتو عليهم بإبتسامة

عماد همس لريم : مآي علينا الآن هو ، ح أفكك أنا ، ، تمام ؟

ريم بنفس الهمس : عماد ..

عماد : هلاً ..

ريم : ما تمشي بعيد يا عماد خليك قريب مآي ، طيب ؟

عماد وشد على يدها : أنا معاك يا ريم ، ولو إحتجتيني ح تلقيني جنبك ..

وصل سعد عندهم و مسك ريم من يدها الثانية وقال بإبتسامة : صباح الخير ريم ..

ريم بهدوء : صباح النور ،

سعد مسكها من يدها ومشوا على واحدة من الطرايز الحديدية وقعدوا في الكرسي

حولها

في حين إنو عماد بقى واقف مكانو وفي رأسو ألف فكرة و فكرة ! ، منصور و بيان و مآزن

و عمّتو و العم سعيد و ريم و العم فهد و سلطان ! .. إتهد بحسرة على حال سلطان و

أبوهو .. هو عارف سلطان ممكن يكون وين ، مكان هو بحبو كويس و بيرتاح فيهو ، إبتسم

إبتسامة إنتصار.. قطع علمُو سرحانوريم وسعد كأن قاعد معاها وبأين في عيونو إنو بحبها ، إستغرب ! إذا كان بحبها كداا ليه وقف ساكت لما خالد كان بهين فيها ؟ ولية يسمح لخالد إنو يتكلم معاها بالطريقة دي ؟ وأصلاً ليه يرضى إنو يخطب حبيبة صحبو السابقة ! إنتهد بحيرة و عرف إنو خالد وسعد وراهم سركبير! بيتعلق بريم !
إنتبه لسعد المد أصابعو بهدوء ومسك يد ريم ، لأحظ توتر ريم .. بدون مُقدّمات عصب ! ما عارف ليه ! بس هو عصب حس كأنو سعد مسك يد بيان أختو ، مشى بخطوات يفهم مئها إنو معصب ، وصل عندهم قال لسعد بهدوء : أستاذ سعد ، إتصلوا عليك من المدرسة ، وقالوا ليك مطلوب إنك تحضر حالاً ..

سعد بإستغراب : لكن أنا إستاذنت ..

عماد بعصبية باردة وبحاول يمسك أعصابو : ما عارف ، بس إتصلو الآن على تلفون ياسرو وقالوا دايريتك حالاً ..

سعد وقام على حيلو بإستغراب : طيب !

(♫)-----*-----•♫•-----*----- (♫)

في بحري - شمبات :

الساعة ١٢ في المساء ، رجع عماد من فيلاً الأستاذ سيف ، إتدكر سلطان .. مشى على بيت أبو سلطان ، دق الباب و إنتظر .. سمع صوت خطوات مُسرعة ، إنفتح الباب لقي العم فهد قدّامو وعلى وشو إبتسامة إختفت بسرعة ..

العم فهد بأسى : حسبتك سلطان .. *وأداهو ظهرو داخل جوا* إدخال يا ولدي ..

عماد بإبتسامة وقفو : عبي ، أنا عارف سلطان وين ..

وقف العم فهد مسافة و إلتفت على عماد بفرحة : منجد ؟ ها شفته ؟ وش قالك ؟ وش تحترى يا ولدي ؟ أمش يلاً خلنا نجيبه بسرعة ..

عماد بإبتسامة : بس لحظة يا عمي ، قبل ما نجيبو ، ممكن اتكلم معاك شوية ؟

العم فهد بحيرة : أكيد أكيد يا وليدي ، إتفضل ..

دخل عماد وقفل الباب ورأهو ، ومشى على العم فهد وقعدوا سوا في السرير الكانت في الحوش ..

العم فهد وخت يدينو فوق العكاز البيستند بهو ، وسند دقنو فوق يدينو قال بتفهم : هآ يا وليدي ، وش عندك ؟

عماد وإتهد : عمي ، أنا صح ما بعرف سلطان من فترة طويلة ، كلها خمسة سنوات ، بس نقول إنو الخمسة سنوات دي عرفتها فهو اكر من نفسي ، سلطان زول شفاف و واضح و بينفهم بسرعة ..

العم فهد : إيه وإنت الصادق ..

عماد : سلطان يا عمي ما بيزعل بسرعة ، ولا بيعصب بسرعة .. زول صدر و رجب و حليم ، بس كونو يطلع من البيت بالطريقة دي ويقعد يومين برا البيت ؟ أنا ما أظن إنو الموضوع كان عادي ..

العم فهد إتهد بحسرة ..

عماد كمل : أنا ما عارف الحصل بينكم شنو ، بس هو أكيد كان موضوع كبير .. ومهم بالنسبة ليهو .. والظاهر إنك عاكستو فيهو ، انا بسوقك لسلطان يا عمي ، بس ما بضمن ليك إنو يرجع معاك إلا بطريقة وحدة ..

العم فهد بحماس : قل يا وليدي و انا أسمعك ..

عماد : تحقّق ليهو الحاجة الهو طلبها ..

العم فهد و إختفى حماسو عاين للأرض بحسرة ..

عماد كمل كلامو: سلطان يا عم ما بيطلب كثير، تقريباً هو ما قاعد يطلب حاجة أبداً..
ولو طلب بيطلب حاجة في حدود المعقول، كل حاجة متعود يعملها بنفسو.. لما يطلبك
ترفض ليهو؟ انا بسوقك ليهو، راضيهو و قول ليهو إنك وافقت ليهو بالحاجة الهو طلبها

..

العم فهد رفع نظراتو الضايعة من الأرض و عاين لعماد: و إن كان السالفة تخصك يا
عماد؟

عماد بإستغراب: تخصني أنا؟

العم فهد بتهدية: إيه يا ولدي تخصك أنت.. إنت تدري إن أم سلطان تبيه لبنت عمه
صح؟

عماد: أيوا صح، و تقريباً دا السبب الكآن مخليهو متردد في السفر..

العم فهد: إيوا صادق، سلطان ما يبي بنت عمه، يبي وحدة ثانية..

عماد: يا عمي، كمان موضوع زي دا حساس جداً، ما بيستحمل الجبر و الغصب،
موضوع زي دا المفروض يكون في يدو هو.. هو يتحكم فيهو، عمي، لو داير مصلحة
سلطان و سعادتو خليهو يتزوج الهو دايرها، عشان تضمنو إنويكون سعيد..

العم فهد و رفع نظرو من الأرض و ركز عيونو في عيون عماد و إتأمل فيها، سكت
مسافة طويلة، قطع سكوتو دا صوتو الخفيف و هو بيقول: حتى لو كانت أختك يا

عماد؟

عماد سكت لغاية ما إستوعب كلام العم فهد، قال بدهشة: بياان!

(♫)-----*-----•••-----*----- (♫)

{ بَلَقَاكَ حِلْمٌ .. }

(.الحلقة الثالثة والعشرون.)

" وَجُرْعَةٌ مَفْرُطَةٌ مِنَ السَّعَادَةِ ، قَدْ تَخْتَبَأُ فِي مَلْعَقَةِ قَدْرِ صَغِيرَةٍ "

(♥).....*.....•••.....*.....(♥)

العم فهد ورفع نظرو من الأرض وركّز عيونو في عُيون عمّاد و إتأمل فيها ، سكت مسافة طويلة ، قطع سكوتو دأ صوتو الخفيف وهو يقول : حتّى لو كانت أُختك يا عماد ؟

عمّاد بدهشة : بياان !

العم فهد بتنهيده : إيه أُختك بيان ، حتّى أنا لما قالي كذا إنصدمت زيّك ، بس تقدر تتخيّل قد إيش هو يحبّها ؟ صرخ في وجهي عشّانها ، و ما يبي يتكلم مع أمّه عشّانها ، و رفض بنت عمّه عشّانها ، و خرج من البيت عشّانها ، يحبّها يا عمّاد يحبّها ..

عمّاد الكآن مُنصدم من كلام عم فهد ما إتحرّك ، بقى قاعد مكانو في سكوت ..

العم فهد : والله يا عمّاد يا ولدي أنا ما أبي أمدح سُلطان عشّانته ولدي ، لكن سُلطان كفو والله ، و رآح يحفظ أُختك ويصونها ، ما رح يخلّيها تحتاج لشي ، إن تبي تجلس هنا تجلس و إن تبي تسافر معه تسافر ،

عمّاد و حرّك شفاهو بهدوء و ملامحو مرسوم عليها الدّهشة : بـ.بس بيان لسّة صغيرة !

العم فهد : وش صغيرة ؟ سُلطان يقول إنها في الثّانوي ! والله عمرها مُناسب ، بعدين إنت تعرف الجّامعات و عيال الحرام كثيرين !

عمّاد بنفس حآلو : و الدّراسة ؟ بيان لسّة ما إمتحنت الشّهادة ..

العم فهد : و سُلطان ما راح يمنعها ، تكمل دراستها إن تبي ، و راح يجيب لها شغالة
تخليها تركّز على دراستها .. بعدين حتى سُلطان يدرس ، ما بقى له إلا سنة وحدة .. خلّ
الخطبة تكون الحين ، و الزّواج السنّة الجاية لآ تخرّجوا ثنينهم ، بيان من الثّانوي .. و
سُلطان من الجامعة ..

عماد سكت مسافة و إستوعب كلام العم فهد ، قال بتفهم : والله يا عم أنا ما ح ألقى
زي سُلطان لأختي بيان ، وأنا بفتخر بنسب سُلطان والله ، بس ما عارف .. أنا لسنة
مصدوم من الكلام دا ..

العم فهد : إيه والله بأين من ملامحك إنك مصدوم .. إسمعي ، خذلك مدّة فكّر فيها .. و
قول لبيان بعد ، خليها تفكّر هي الثّانية ..

عماد رفع رأسه بحيرة : والله يا عمي أنا مبدئياً موافق ، بس أشوف بيان
العم فهد بوش مُتهلّل : بس لآ تطوّل علينا ، عشان الأسبوع الجاي بنسافر إن شاء الله ..
عماد على نفس حاله : طيب ..

العم فهد و قام على حيلو : يلا يا ولدي ..

عماد و رفع رأسه على العم فهد : على وين يا عمي ؟

العم فهد : نروح عند سُلطان ، بقوله إني و أفقت ، والباقي عليك إنت ..

عماد قام على حيلو و مسك العم فهد من يدو : طيب يا عم يلا ..

(.....•○•.....)

قدّام دُكان العم سعيد :

كان وليد قاعد مع العم سعيد تحت نور اللّمبة الخافت ، و قدّامهم الميدان الإنكسي
بالظلام ..

خالد ورقد في السرير بتعب : خَلِيّ أَسْئَلْتِكَ لِبُكْرَا ، نَعْسَا ان وَالله ..

سعد : هو بس سؤال بسييط جداً ..

خالد و غمّض عيونو : قُلْنَا بُكْرَا يَا خ !

سعد : ليه إنت قُلْت لي أخطب ريم مع إنك لسة بتحبها !

خالد فتح عيونو بسرعة وقعد على طرف السرير : مُش قلناا عشان انا بعدين أخطبها ؟

سعد : أيوا ، بس حقيقة أنا ما فاهم علاقة الكلام دا بخطبتي ليه شنو ، مُش كان ممكن

تمشي تخطبها على طول بما إنو أبوها مات ؟

خالد : أيوا ، بس أنا أبوي ما مات .. إنت عارف مشاكل أبوي و أبوها ما بتسمح يكون

بيننا أي إرتباط !

سعد بدهشة : يعني إنت دأيرني ابقى خايطها لغاية ما أبوك يموت ولا شنو ؟

خالد : لآلا ما كدا ، إنت عارف إنو إنت خطبها وهي ما موفقة ، دا كلو من عمائل

عمها سيف الكآن مبسوط إنوح يخارجها ، يلا بعدين لما تفرکش الخطوبة دي زي ما

إتفقنا ، عمها ح يجن ! يعني ما كفاية كلام الناس البقولوهو فيها دا ، كما ان خطوبتها

تتفرکش ! و الناس كلامهم كتير !

سعد بإندهماج : أها ، وبعدين !

خالد : بعدين أدخل أنا و أتقدم ليه و أخطبها من عمها ، بس ح يكون شرطي إنو

الزواج يكون في السر بدون معرفة أي زول ، عشان أبوي ما يعرف كما ان ، بس أنا وهي

و المأذون و سيف و إنت و ياسر شهود ! و طبعاً سيف الجبارح يوافق طوالي ، لأنوزي ما

قُلْت ليك دأير يخارجها بأي طريقة !

سعد : أيوا ، طيب ليه ما خطبها إنت أول شي و طلبت إنوزواجها يكون في السر ؟

الفرق شنو يعني ؟

خالد : الفرق إنو سيف بهتمّ بالمظاهر وكلام النَّاس ، يعني لما تخطبها إنت وتزوّجها على مرأى من النَّاس ، النَّاس ح يقولوا يا سلاام سيف ستر بنت أخوهو الجأبت لهو فضيحة ، ودا طبعاً في صالحوهو ، بس لما تتفركش الخطوبة .. النَّاس ح يقولوا لقي فيها عيب تاني وكلام زي داا وطبعاً دا ضدُّوهو ! ح يكون بفتّش لأي فرصة إنو يتخلّص منها بأي طريقة ، ولما أجبهو انا ح أكون زي الرّحمة التّزلت من السّما .. وحيواافق على أي حرف أنا أقولوا ..

سعد وإستوعب كمّية الخُبث الموجودة في خالد : أيواا !

(♫)-----*-----•♫•-----*----- (♫)

في بحري - شمبات :

قدّام المسجد المشهور في شمبات مسجد قباء ، وقف العم فهّد ومعاوه عماد ، عماد شأيف سلطان قاعد في المسجد ومغطّي وشو بيدينو بتعب !
عماد وإلتفت على العم فهّد قال بهمس : شُفت يا عمّ ، هداك سلطان ، ما تكسر لهو رأيو ، خليموزي ما دااير ..

العم فهّد بإبتسامة : إن شاء الله يا ولدي ، بتروح إنت ؟

عماد : لالا أنا بانتظرك هنا ، عشآن لو إحتجتني ولا شي ..

العم فهّد وختّ يدو على كتف عماد : الله يحفظك يا إبنّي ..

عماد بإبتسامة : جمعاً يا رب ..

رمى العم سعيد إبتسامة مطمئنة لعماد وطلّع جزمتهو برا المسجد ودخل المسجد بخشوع وهو بيردّد في دُعاء المسجد بوقار .. كان المكان هاديء من كل شي إلا صوت شهقات مكتومة ، وصوت عُكاز العم فهّد ..

سُلطان الكآن مُستند على واحد من الأعمدة الشّامخة في المسجد ، سمع صوت خطوات
مُتّجهة عليه إلتفت بإستغراب ورأه ، كانت الرؤية مآ واضحة بالنّسبة لهو بسبب
الدّموع الغطّت عيونو ، مسّح دموعو ورجع عآين تآني لقي أبوهو مُتّجه عليهو بإبتسامة
هادئة ، قام من مكانو بسرعة قال بإنفعال : يُبة ! إنت وش جآبك هنا ؟
العم فهد وقف مكانو وختّ يدينو فوق بعضها على العُكّاز : جيت يآ ولدي آخذك معي
البيت !

سُلطان بإنفعال أشد : البيت ! لآ والله مآني رآيح البيت وقلتك مآ برجع ،
العم فهد بإبتسامة : حتّى لو قُلت لك إنّي وآفقت على زوآك من بيان ؟
سُلطان بدهشة : يُبة ..

قآطعو العم فهد : وعلّمت عماد و هو بعد مبدئياً مُوافق .. بس بآقي نعرف رآي العروس
!

سُلطان بدهشة و إندفع على أبوه بسرعة : يُبة منجّدك إنت ؟

العم فهد : ههههههه ، إيه والله مآ أمزح معالك ..

سُلطان : يعني بيان بتصيرلي ؟ و أنا و بيان بنصير لبعض !

العم فهد : ههههه إن شاء الله إذا وافقت هي ،

سُلطان و كأنو إستدرك حاجة : طيب و أمي ؟

العم فهد : زي مآ قُلتلي ، أنا الرّجال و إنت ولدي .. إذاا بيان وآفقت أخطيها لك قبل لآ

نسافر و أمّك مآلها شغل فيك !

سُلطان بفرحة : تمزح يُبة ، تمزح صح !

ريم وتعلقها بيزداد بعماد وإهتمام البتلقأهو منو ..

(♫)-----*-----•♫•-----*----- (♫)

يوم الإثنين :

الخرطوم شرق - حيّ الرياض :

كألعادة عماد وريم قاعدين في الحوش ، وقت الغروب و الشمس بترسُم لوحة حمراً
بريشة المغيب على الأرض ، وإختفى صفاء السماء تحت رحمة الشمس ولوحتها الحمراً
الطالت السماء كما ان ! إعتادت العصافير تغني بإنسجام في الوقت دا .. وإعتادت
الورود إنها تقفل باب بيتها وتنوم بدري ! .. أما الشجر فإعتاد إنو يعزف سيمفونية
هادئة .. والأرض كعادتها كانت رطبة بسبب التوافير المدسوسة بحرص فيها !

عماد بجديّة : طبعاً يا ريم ، بُكرا موعدنا مع الدكتور ..

ريم : إن شاء الله ،

عماد : مع إنو أنا مُتفائل بالدكتور دا ، بس برضو دأيرك تخيّي في باللك إنو مهمما كان
كلام الدكتور ، تبقي زي ما إنتي قويّة !

ريم بتنهيدة : حاضر ..

عماد : كلّمت ياسرو جآي معانا بُكرا إن شاء الله ، من الصّباح لما أجي تكوني جاهزة ،
عشان نطلع بدري ، تمام ؟ لأنو إحتمال يكون في زحمة ..

ريم : إن شاء الله ..

(♫)-----*-----•♫•-----*----- (♫)

في بحري شمبات :

فجر اليوم الثاني ، زي ما إتعود عماد إنو يصحى قبل العصافير وقبل الشمس .. إلا إنو
ما يبسبِق الأذان ، قام من سريره الكآن في الحوش وهو بيسمع في الأذان الأول ، قام
على حيلو ودخل الصّالة على بيان ، لقاها فأرشة الكُتب و متوسّدة الدفاتر و نائمة
بتعب ، وقف مسافة يعاين فيها :

فعلاً تشبه أُمو شديد ! هي نُسخة مَنها .. حتّى في تصرُّفاتِها ! عيونها الكآنت مُنطبقة على
بعضها و متغطّية برموشها الكثيرة ، انفها الكآن واقف بشموخ ، شفأيفها الصّغيرة ،
بشرتها الخمرية ، شعرها الطويل المتغطّية بهو ! فعلاً كانت نُسخة من أمها .. بكل
هدوء لم الكُتب و الدفاتر في الشنطة ، عدل لها نومتها إلا إنو بيان بطبيعة نومها
الخفيف فتحت عيونها بتعب و ملامح مُستغربة ، قالت بصوت خفيف مبوح : عماد ؟

عماد بإبتسامة : أنا ماشي الصّلاة يا بيان ..

بيان بإبتسامة و رجعت نامت : أدعي لينا معاك ..

عماد : حاضر ..

و بإبتسامة خفيفة غطاها و مشى على السّرير الجنيها و طبع بوسة على خد مآزن و
غطاهاوزي الناس .. طلع من الصّالة و مشى إتوضّى ، طلع من البيت و قفل الباب و
قطرات الموية بتنقّط منو ، مشى بخطوات خآشعة على المسجد .. و كل خطوة بتسبقها
التانية ، قطع عليه خشوعو صوت الخطوات المُتسارعة الكآنت و راهو و كأنها بتحاول
تلقو ، إلتفت و راهو لقي سلطان ماشي عليه قال و هو بحآلو يلم نفسو : يبوي بشويش
، عجزت الحقك !

عماد بإبتسامة : معلش ما إنتهت ليك ..

سلطان : ما عليك ، إمشي خلنا نلحق الصّلاة ..

عماد بإستغراب : وين وليد الليلة ؟

سلطان : تو دقيت عليه الباب و قال بيتوضّى ويلحقنا ..

عماد : كويس والله ،

و مشوا بخطواتهم في سكوت رهيب ، قطعو صوت سلطان المتوتّر: إلا كيف بيان ؟

عماد بإبتسامة عريضة : كويسة الحمد لله ،

سلطان بتوتّر: آآ..ط..طيب ، ما قالت لك إيش رأيها ؟

عماد : ما سألتها والله ، ما داير أضغط عليها أنا ،

سلطان : ولا أنا ، بس تعرف ، عشان السفر يوم الأحد .. وأنا أبي أروح المملكة وهي

خطيبي عشان أخط أمي قدام الأمر الواقع ..

عماد : ما تخاف يا سلطان ، إذا ربنا كاتب ليكم تكونوا لبعض مآفي حاجة بتمنعكم ..

سلطان و إرتاح لكلام عماد : إن شاء الله ..

(♫)-----*-----•••••*----- (♫)

الخرطوم شرق - حيّ الرياض :

الساعة ٦ و بدت الشمس تطلع بملل و العصافير بدت تصحى على نورها ، ريم الكانت صاحية من الفجر و صلّت .. قعدت في السرير منتظرة هيفاء عشان تجي و تختار ليها ملابس ، سرحت بخيالها في نفسها ، حياتها إتغيّرت شديدا بعد وفاة أبوها ! كل حاجة بالنسبة ليها إنقلبت ! حتى النور بقى ظلام ! إتهدت بأسى ، بس رجعت إبتسمت لما إتذكّرت عماد ، عماد بالنسبة ليها كان هديّة ليها لأنّها صبرت كثير على المصائب البتحصّل ليها ، رغم إنّها عاشت في البيت داا خمسة شهور أو أكثر ، إلا إنو عماد الجا قبل شهر بس بقى أقرب ليها من الناس الساكنين في البيت دا ! إبتسمت برضا على وجودو في حياتها ، قطع عليها سرحانها صوت الباب الإفتح بهدوء و دخلت منو هيفاء قالت بهدوء: معليش يا ريم إتأخرت عليك ..

ريم بإبتسامة : لا لا ما مشكلة ..

هيفاء : خليت غيداء نايمه و جيت ، *واتجهت على دولابها وفتحتمو* دايرة تلبسي شنو
يا ريم ؟

ريم بحيرة : ما عارفة والله .. إنتي و ذوقك غايتو ..

هيفاء و عاينت في الدولاب بتفكير: رأيك شنو تلبسي الإسكيرت الجابتوليك عمّتي من
السعودية ،

ريم بحيرة : ياتو واحد دا ما بتذكرو !

هيفاء : اللونورمادي كدا .. جابتوليك السنّة الفاتت ..

ريم : لآلا ما حلو جيبني لي البيشمهوس لونوبئي ..

هيفاء و مشت تفتش بين الملابس : طيب ..

(♫)-----*-----•••••*-----♫

في بحري شمبات :

كأن قاعد هوو بيان وبيشربوا في الشاي ، عماد وخت الكباية فاضية : أها يا بيان ..

بيان باستغراب : أها شنو ؟

عماد : ما قلتي لي رأيك شنو في موضوع سلطان ..

بيان سكتت وعاينت في الأرض بخجل ..

عماد : أنا ما دأير أضغط عليك بس سلطان لأقاني قبيل ونحن ماشين الصّلاة و قال
لي إنهم مسافرين يوم الأحد و داير يعرف رأيك عشان لو موافقة يخطبك قبل ما يسافر ..

بيان على نفس حالها ..

عماد عاين لساعتو و قام على حيلو : أنا ماشي بعد دا الزمن جا ، فكّري كويس و ما

تتسرعي في رأيك ، و أهمّ شي إستخيري ..

بيان بإبتسامه دافئة : طيب ..

(♫)-----*-----•♫•-----*----- (♫)

الخرطوم شرق - حيّ الرياض :

ريم وياسر قاعدين في الحوش و معاهم هيفاء و منتظرين عماد ، أما غيداء كانت في المدرسة ، دخل عليهم عماد بإبتسامه و سلّم عليهم كلهم بنفس الإبتسامه ، إلتفت على هيفاء الكانت لأبسة و قال بإستغراب : ماشة معانا يا هيفاء ؟

هيفاء : لآلا ، بس ياسر ح يوصلني الجامعة في طريقو ..

عماد : أيوا ، يلا يا جماعة طيب عشان ما نتأخر ..

ياسر و قام على حيلو : يلا ..

أما هيفاء مسكت ريم من يدها عشان تسوقها ، إلا إنو عماد مسك ريم من يدها الثانية و قال بإبتسامه : دا شغلي أنا يا هيفاء .. !

(.....•○•.....)

في المستشفى :

دخلوا المستشفى و كان شبه فاضي من المرضى الجآيين للدكتور الألماني ، عماد إتوجّه لموظف الإستقبال و قال بإبتسامه : معليش ، بس نحن جآيين للدكتور الألماني ، أديل أرنو ..

الموظف : و عندكم حجز ؟

عماد : أيوا .. بإسم عماد منصور يوسف ..

الموظف و فتش في الكمبيوتر القدامو ، رفع رأسو و قال بإبتسامه : أيوا ، عماد منصور موعدكم الساعة ٨ صباحاً ، مش ؟

عماد : ايواا ..

الموظف : تقدر تتفضلوا من هناك *وأشّر ليهو على آخر الممر* الدكتور فاضي و مُنتظركم

..

عماد : طيب ، شكراً يا أستاذ ..

و مشى على ياسر وريم الكانوا قاعدين بعيد وصل عندهم و مسك ريم من يدها و

إتجهوا على غرفة الدكتور .. في حين إنو ياسر قعد في كرسي الإنتظار ..

دخلوا على الدكتور و قعدوا بهدوء معاهو .. كانت الغرفة فاضية إلا من الدكتور و معاهو

مُترجم للغة الألمانية ..

سلم عليهم الدكتور و سألو عن الحالة و أسبابها .. حكي عماد السبب للمُترجم الترحم

كلام عماد للدكتور ، هز رأسو بتفهّم و كأنو عرف المشكلة و علاجها .. و أشار ليهما تقوم

عشان يفحص ليهما ..

(.....•○•.....)

في كرسي الإنتظار كان ياسر قاعد و بعين في المائي و الجاي ، عاين لمكان مكتب

الدكتور لقي عماد طالع بدون ريم مشى عليه بسرعة : خيرياً عماد ، بشّر!

عماد : قاعدين يعملوا ليهما في الفحوصات جوا ..

ياسر : طيب نمشي و نجي بعدين للنتائج و لا كيف ؟

عماد : لالآ قال إنو بنستلم النتائج الآن بس ننتظر نص ساعة بالكتير ..

ياسر : والله حلو ..

(.....•○•.....)

بعد نص ساعة دخل عماد وياسر وريم على الدكتور الكآن مُبتسم برضا وكأنو كان عارف من البداية السبب ، وبدأ بإبتسامه يشرح لهم المشكلة ..

عماد وياسر إلتفتوا على المترجم بإستغراب ..

المترجم بإبتسامه : الدكتور قال إنو من البداية كآن شاكّي في السبب .. وفعلاً النتائج أكّدت ليهو شكوكو ..

ياسر بلهفة : خير يا دكتور ..

المترجم : لا هو خير الحمد لله .. المشكلة إنو هي عندها مرض إسمو الجلوكوما .. هو عادةً ما بيعي إلا في الحالات المتأخّرة ، بس هي إتأخّروا في علاجها عشان كدا أدّى للعمى ، بس هو ما عى كامل حالياً ..

عماد بإستغراب: ما عى كامل ؟ هي ما بتشوف شي ..

المترجم : والله دا المستغرب فهو الدكتور ، ما ح تفهمني إلا أحكي ليك طبيعة المرض دا ، عماد : طيب يا دكتور ، طبيعة المرض دا شنو ؟

المترجم : هو مرض بيصيب العصب البصري ودا طبعاً العصب البيحمل الصور البنشوفها للمخ ، بيحصل نتيجة لإرتفاع ضغط العين .. فنتيجة للكلام دا بيحصل تلف في أنسجة العصب البصري ، هوزي كيبل الكهربا البيحتوي على كمية كبيرة من الأسلاك الرفيعة ، العصب البصري بيحتوي على عدد كبير جداً من الألياف العصبية و هي البتلف بتأثير الجلوكوما الشي البيأدي لتكوين بقعة عميا داخل العين ..

عماد وفهم كلام المترجم : أيوا ، يعني يفقد جزء من المجال البصري ،

المترجم : بالظبط ، ولو المرض ما إتعالج بيحصل تلف كُلي في العصب البصري وكدا العين بتفقد قدرتها على الإبصار.. في حالة ريم دي العصب البصري عندها تآلف بنسبة ٩٥% ..

عماد : طيب ولو كان تالف بنسبة ١٠٠%!

المترجم بأسى : في الحالة دي ما ح يكون في أمل لعلاجها أبداً لأنو حالياً ما ليهو علاج ، بس الحمد لله جبتوها في زمن مُناسب لأنو العصب البصري عندها ما تلف بشكل كامل ..

عماد : يا دكتور ، إذا كان ما تالف بشكل كامل ، مُش المفترض تشوف ولو جزء بسيط ؟

المترجم بحيرة : والله دي الحَاجة الحَيّرت الدكتور إنها ما بتشوف نهائياً ..

عماد : طيّب يا دكتور في علاج للمرض دا ؟

المترجم و إلتفت للدكتور : Gibt es eine Heilung ؟

الدكتور و طَلع نظارتو و ختاها على المكتب و شبك أصابع يدينو ببعض و بنبرة جادة
إتكلم و ختم كلامو بإبتسامة ..

عماد و يأسر إلتفتوا على المترجم ،

المترجم : العلاج الوحيد هو التدخل الجراحي ..

يأسر بخوف : عملية !!

المترجم : أيواا عملية ، بس في ألمانيا لكن ما هنا .. و الدكتور كتر خيرو إتعاطف مع حالة ريم كونها لسنة في بداية عُمرها و قصتها الأدت بيها للعي و إتبّع إنو يجري لها العملية دي على حسابو هو .. بس أول ما يرجع ألمانيا بعد أسبوعين إن شاء الله ..

عماد : وإسم المستشفى شنو يا دكتور ؟

المترجم : إسمو مُستشفى يوروميديك في مدينة دوسلدورف في ألمانيا ..

الدكتور و كان بيكتب في ورق مدهول لعماد و قال : Diese medizinische Bericht ..

المترجم : دا التقرير الطّبي البشّح حالة ريم ، و حاجتها العاجلة للعلاج ..

عماد و عاين للورق مع إنو ما فهم الخط : أيواا ..

الدكتور بإبتسامة طلّع كرت وكتب فهو ومدّاهو لعماد ..

يأسر بإستغراب : دا شنو كمان ؟

المُترجم : دأ إثبات إنو دكتور أديل إتكلّف بالعملية كاملة !

عماد بإبتسامة : طيب يا دكتور ، نستأذن نحن ، شكراً ، *وقال بإبتسامة* شكراً بالألماني
شنو ؟

المُترجم : Danke ..

عماد و عآين للدكتور بإبتسامة : Danke

الدكتور إبتسم إبتسامة عريضة : Amnestie..

و طلّعوا من المكتب و كل واحد ملامحو بتحكي حاجة تانية ، يأسرو والخوف و القلق
البآين في وئسو ، و عماد الكآن مُبتسم إنو في أمل للعلاج ، و ريم الكآنت ملامحها ضايعة
بين الخوف من العملية و الفرحة للعلاج !

يأسرو ختّ يدينو فوق رأسو و قال بخوف : عماد ، عملية لا ..

عماد بإستغراب : يأسر! دا كلام شنو دا !

يأسر: ياا عماد ، عليك الله كل شي إلا العملية !

عماد : يأسر؟ إنت مجنون ؟

يأسرو و الدموع إتجمّعت في عينو: عماد ، عمليات لا .. أنا ح أكلم أبوي يحسم الموضوع

دا

عماد مسك يأسر من أكتافو و قال بإنفعال : يأسر! دأ آخر أمل ليهاا عشان تشوف النُور
.. إنت ماا دآير تشوفهاا فرحانة و هي بترجع تشوف تاني ؟ ما إشتقت تشوف نظراتهاا !

بطلّ حركات الخوف دي يا ياسر و خُتّ الرّحمن في قلبك ! هي ما خسرانة شي لو عملت
العملية ..

ياسر بإنفعال : كيف ما خسرانة شي ؟ إنت ما بتسمع بالأخطاء الطّبية والنّاس البتموت
فيها ؟

عماد : كل حاجة مكتوبة يا ياسر ، والموت واحد ، سواء في عملية أو غيرهو ! وإنت لما
جيت هنا كُنت متوقّع شنو ؟ داا عمى يا ياسر ما فيهو لعب !!
ريم بصوت هادئ لكن كأن مخي فيهو كمّية كبيرة من القوّة : ياسر! كل حاجة مقدرة و
مكتوبة ، وأنا راضية بحُكم الله ، وزى ما قال عماد داا آخر أمل ..

ياسر و ملامح الخوف متجمّعة في عيونو إتّجه بخطواتو على ريم وقال بخوف : إنتي
موافقة يعني ؟ ح تكوني مُرتاحة لو عملتي العملية ؟

ريم وهزّت رأسها بالموافقة ..

ياسر و جمّع شجاعته : طيب إن شاء الله ، *وإلتفت على عماد* يلا يا عماد ، عشآن
نلحق نكلّم أبوي !

(♩)-----*-----•♩•-----*----- (♩)

{ بَلَقَاكَ جِلْم .. }

(.الحلقة الخامسة والعشرون .)

" ونعلق أحياناً بين قرآرين ، أحلاهما حنظل !"

(♥).....*.....••.....*.....(♥)

في بحري - شمبات :

في دُكَّان العم سعيد كالعادة ، قعد سُلطان و العم سعيد ، و وليد في دوامو ..
سُلطان الكآن قاعد في الأرض مآدي رجلو في الأرض و التّانية رافعها و ساند عليها يدو ..
و بعين في الأرض بملل ، قطع عليهو مللودا العم سعيد الكآن طالع من الدُكان و قعد في
العنقريب قدامو ..

قال بإستغراب : قاعد في الأرض مالك يا سُلطان ؟

سُلطان و عآين في اللآ مكان : طفشش !

العم سعيد : طيب عماد قال ليك شنو ؟

سُلطان : يقول باقي ما ردّت ..

العم سعيد بطمئن في سُلطان : ما تخاف ، البت دي عاقلة جدّاً ، و أكيد عارفة
مصلحتها وين ..

سُلطان : يا عبيّ أنا بسافريوم الأحد .. واليوم الثلاثاء و هي باقي ما ردّت !

العم سعيد : إنت ما حاولت تتكلم معاها ؟

عماد و إتقدّم عليهم بخطواتو و الإستغراب مآلي ملامحو من الدهشة ! وصل عند الأستاذ
سيف الأشار ليهو على الكرسي المقابلو إنو يقعد ، بكل هدوء قعد عماد ..

الأستاذ سيف : أهاا خيرياً إبني !

عماد إتحنح و قال بصوت واثق : صباح الخيرياً أستاذ ..

الأستاذ سيف : صباح النور ..

عماد : طبعاً نحن يا أستاذ كُتّا في المستشفى قبل شوية ، أنا و ريم و ياسر ..

سيف : آي كلمني ياسر إنكم ماشين ، أهاا الأخبار شنو ؟

عماد بتوتّر : والله يا أستاذ ، الدكتور قال إنو المشكلة كبيرة جداً و كويس إنو نحننا جينا
في الوقت دأ لأنولو إتأخرناا كان ح تحصل مُشكلة أكبر بتأدي للعي النهائي ..

سيف : يا ساتر ! أهاا و إن شاء الله في علاج ؟

عماد : لا الحمد لله في علاج ! بس في ألمانيا ما هنا !

سيف و عدل قعدتو و ملامحو إتغيّرت : علاج في ألمانيا ! دا شنو دا كمان ؟

عماد بإرتباك من ملامح سيف إتغيّرت : عملية يا أستاذ ..

سيف و ختّ يدو على خدّو بتفكير ..

عماد بسرعة : بس الدكتور إتبرّع بتكاليف العملية كلها الحمد لله ..

سيف برآحة : الحمد لله ..

عماد : بس ..

سيف : بس شنو ؟

عماد : لأزماناا تكاليف التذاكر و الإقامة هناك ..

سيف و مسك التّفون الجنبو: كم تذكرة ؟

عماد : ثلاثة تذاكر ، أنا وريم وياسر..

سيف و بدأ يتّصل : ياسر ما لأزم يمشي معاكم ، عندو جامعة ..

عماد : طيب ،

سيف : متين تمشوا ؟

عماد : الأسبوع البعد الجاي إن شاء الله ، هو حدّد لنا كدا ،

سيف و إتصل : آي يا عبد العظيم ؟ كيفك ؟ تمام ؟ لا الحمد لله .. آي آي ، أسمعني ،

دايرلي تذكرتين لألمانيا الأسبوع البعد الجاي .. آي إثنين ، لا أي يوم المهم إنو الأسبوع

البعد الجاي .. آي عليك الله سريع و رُدّ لي ، يلا مع السلامة ..

قفل الخط و إتصل على رقم تاني : عز الدين سلام ، كيفك ؟ أمورك ؟ لا والله الحمد لله

، آي بس كنت داير منك تحجزلي غرفتين في واحد من فنادق ألمانيا ، آي دايرها جنب

مُستشفى ..*وإلتفت على عماد بإستغراب* مُستشفى شنو إسمو ؟

عماد : مُستشفى يوروميديك في مدينة دوسلدورف في ألمانيا ..

سيف و رجع يتكلّم : إسمو مُستشفى يوروميديك في مدينة دوسلدورف في ألمانيا ، يعني

بس دايرلي عُرفتين في أي فندق في المنطقة دي .. سريع عليك الله ، أي بنتظرك ، يلا

سلام ..

قفل الخط و عاين في عماد الكآن مُستغرب منو ، قال بإبتسامه : الليلة الصباح قالوا

لي إنو أرباح الشركات حقّي كلها زادت ، عشان كدا مزاجي رايق من الصباح ..

عماد و فهم السبب : أيوا ، إن شاء الله دايمًا ،

سيف : شويّة كدا و ح أجيب ليك رقم الحجز و بيانات الرّحلة .. و إسم الفندق

الحتنزلوا فيهو ..

عماد وقام على حيلو : طيب دقائق ..

دخل غرفة بيان لقاها قاعدة قدام المرآة وبتسرح في شعرها قال بابتسامه : بيان ،
فكرتي ؟

بيان وإنهت من شعرها إلتفتت على عماد وقالت بتوتر وهي بتلعب بأصابعها : آي ،
بس كنت دآيرة .. يعني ،

عماد قاطعها : طيب عآيني ، سلطان دا برا قال داير يتكلم معاك ، أمشي إتكلمي معاهو
وقولي لهو رأيك ..

بيان بسرعة : لآ يا عماد إنت كلمو ..

عماد بابتسامه : سمح الكلام من خشم سيدو يا بيان .. يلا أنا مُنتظرك برا و سلطان
كمان ، مآ تتأخري علينا ..

و طلع من الغرفة بدون مآ يسمع ردها ..

سلطان الكآن قاعد بتوتر أول ما شاف عماد قام من مكانو : هآ ، وش قالت ؟

عماد وقعد في كرسي المقابلو : جآية بعد شويّة كدا ..

بعد خمسّة دقائق طلعت بيان بابتسامه خفيفة ، وقف سلطان على حيلو و سلّم عليها

..

قعدت في كرسي قريب منو ، عماد وحسّ بجو التوتر بينهم دا طلع تلفونو وقال

بابتسامه : أنا ح أتصل على وليد أسلم عليه ، مآ تنتظروني ..

طلع من الصّالة و عيون بيان بتلحقو ، سلطان إلتفتت على بيان بابتسامه : كيفك ؟

بيان بصوت خافت : الحمد لله ..

سُلطان بجديّة: بأدخُل في الموضوع على طول ، بيان ، إنتي عارفة إنتي تقدّمت لك من
عماد أخوك ، بس يمكن مو عارفة ليش .. صح ؟

بيان : صح ..

سُلطان و عيونو بتلمع : بيان ، أنا ما أعترف بشي إسمه حُب ، و مُقتنع إقتناع كامل إن
الحب ما يجي إلا بعد الزّواج ، بس إنتي لخبِطِي لي كُل شي ، غيرتي لي مبادئي .. أنا مو بس
إقتنعت بالحُب ! أنا آمنت بالحُب من أول نظرة بعد .. كُل شي فيك يعجبني يا بيان !
صوتك ، أنفك ، شعرك و عيونك ! آه من ذي العيون ، كُل شي يا بيان ، كُل شي .. حتّى
خوفك على يديّ اللي داويتها لي ..

بيان و حدودها إتورّدت بالخجل ..

سُلطان بإبتسامة : حتّى خجلك يعجبني !

بيان نزّلت رأسها من الحياء ..

سُلطان قرّب ممّها و همس لهما : أنا أحيّك يا بيان ..!!

(♫)-----*-----•♫•-----*----- (♫)

{ بلقّاك حلّم .. }

(.الحلقة السادسة والعشرون.)

" يبقى ذنبك أحياناً ، أنّك إنسانيّ فقط !"

(♥).....*.....•♫•.....*.....(♥)

سُلطان قرّب ممّها و همس لهما : أنا أحيّك يا بيان ..!!

بيان إلتفتت بعيد و على شفايفها إبتسامة خفيفة ..

سُلطان : و عماد موافق و أبوي موافق و العم سعيد بعد ! كلهم موافقين ، بس باقي إنت .. و صدّقيني رآح أبقى أحبّك حتى لو ما وافقتي .. محد ينسى أول حُب له ،

بيان إلتفتت على سُلطان بعيون لأمعة من الخجل : آآ.. سُلطان ..

سُلطان بسرعة : لبيّه يا روح سُلطان و قلب سُلطان و كل سُلطان ..

بيان و قالت بصوت خفيف و عيونها على أصابعها الكانت بتلعب بيها : طيب .. يعني ..

قصدي ، *ورفعت رأسها على سُلطان* مُمكن أشرتط حاجة ؟

سُلطان بسرعة : تشتربين ؟ إلا تأمرين أمر ..

بيان بتوتّر : يعني .. مُمكن لو إنو أنا وافقت و حصل نصيب و إتزوجنا .. عادي مازن يجي

يقعد معاانا ؟

سُلطان بإبتسامة خفيفة و يتأمل فيها : أنا ما أدري وش سوّيت عشان الله يرسلك لي ! ملاك و ربّي ملاك ! يعني الحين الموضوع كله يتعلّق فيك إنتي و بس .. و إنتي همك أخوك الصغير .. والله إنتي أحبّك ..

بيان بإبتسامة خفيفة : يعني عادي ؟

سُلطان : عادي ؟ إنتي تأمرين أمر .. ولو تبين عماد بعد يجي يقعد معاانا وين المشكلة

يعني ؟ أنا ما تفرق معي .. *ومسك يدها بخفة* أنا يهمني بس إنك تكونين معالي !!

بيان إبتسمت إبتسامة خجولة ..

سُلطان : يعني موافقة ؟

بيان بخجل إلتفتت بعيد و هزت رأسها بنعم ..

سُلطان قام من مكانو بفرحة : مين قدّي و حبيبتني وأفقت علي !!

(♫)-----*-----•••••*----- (♫)

الخرطوم - حيّ المطار:

في بيت خالد قعد و جنبو سعد الكآن مهموم و سرحان و عينو في الأرض ، خالد و شرب
من الجبنة الكانت قدامو عاين لسعد بطرف عينو: في شنوياً أستاذ ؟

سعد و صبحي من سرحانو: شنو ؟

خالد : ما عارف ، ليك كم يوم ما عاجبي .. الشاغل بالك شنو ؟

سعد و إتهّد : لا أبداً .. بس ضغوط في الشغل ..

خالد : سعد ، أنا بعرفك أكثر من نفسك ، في شنو ؟

سعد و عرف إنوما في مجال يكذب عليهمو : ريم يا خالد قرروا ليها عملية في ألمانيا
الأسبوع البعد الجاي ..

خالد بفرحة : يعني ح ترجع تشوف ؟

سعد بإستغراب من ردّة فعلو : أي ح ترجع تشوف ، مبسوط كدا مالك ؟

خالد بنفس الفرحة : كيف مبسوط ليه ! ح ترجع تشوفي تآني ! يا الله ما مصدق أنا !
ياآه الحمدلله ..

سعد : و إنت لما بتحّيا كدا ، ليه بتعمل فيها كدا ؟

خالد و إلتفت عليه : أعمل فيها كدا ؟ أنا بحّيا يعني ح أعمل المُستحيل عشان تكون
معالي ..

سعد ببرود : أيوا .. ح تعمل شنو الآن ؟

خالد : ح أعمل شنو ؟ ح أنتظرها لغاية ما ترجع و أخطبها طوالي إن شاء الله ..

سعد بإستغراب : وأنا ؟

خالد و شرب من الجبنة الكانت قدامو : تفركش الخُطبة دي !

سعد و بلع ريقو : عارف الماشي معاها منو ؟

خالد إلتفت عليهم : منو ؟

سعد : عماد ..

خالد بإنفعال : تاني الولد دأ ! ياخي أنا بكرهو !!

سعد : نعمل ليه شنو ؟

خالد بإبتسامة خبيثة : ما دام في المرّة الأولى ما قدرنا نعمل حاجة ، يبقى نحاول مرّة

تانية ..

سعد بخوف : ناوي على شنو يا خالد ؟

خالد و على شفتو إبتسامة شر : ولا شي أنا بس ح أخليهم يبعد عنهم اهدوء ، مهدوء

شدييد ! ..

(♫)-----*-----•♫•-----*----- (♫)

مرؤا يومين :

عماد ما كلم زول انوشغلوح ينتهي بعد شهر ، خصوصاً و إنوريم معنوياتها مرتفعة ..

خالد ما كان أقل فرحة من ريم و قرّر انو الأسبوع البترجع فيه و يخطبها فيهو ..

سلطان و خطب بيان عشآن يخط أموقدّام الأمر الواقع ، و طول اليومين دي كان

بيقعد في بيت عماد بالساعات الطويلة ..

وليد رجّع من البلد و جهز للسفر ..

(♫)-----*-----•♫•-----*----- (♫)

مطار الخرطوم الدولي :

ريم بتوتُّر وبتلعِب بأصابعها : أممه ، عماد ،

عماد بإبتسامه : أهلين ..

ريم ونزلت عينها في الارض : شُكراً ..

عماد بإستغراب : شُكراً ؟ على شنو ؟

ريم ورفعت رأسها : على وقفك معاي ، جد أنا من الحصل داك مآفي زول وقف معاي

كدأ و حَسَّسني بقيمتي زيّ ما إنت عملت !

عماد بإبتسامه : إنت تستأهلي كدأ يا ريم و أكثر كمان ..

ريم : بجد ما عارفة أقول ليك شنو ، بس جد والله نفسي أشوفك ..

عماد : هههههه ، خلاص طيب إن شاء الله أول ما تنجح العملية ح أكون في وشك ،

ريم إبتسمت : يا ليت والله ، بقيت لي حاجة أساسية والله ، يا رب تكون معاي دائماً ..

عماد وضاق صدره من كلامها و إتذكّر إنودا آخر شهر ليهو معاها قال بخفوت : إن

شاء الله !..

(♫)-----*-----•••-----*----- (♫)

في بحري - شمبات :

دخل عماد البيت بتعب والساعة كانت مآشة على ١ في الليل ، دخل الصّالة بدون مآ

ينتبه لبيان الكانت قاعدة في واحد من الكراسي ، وبتعب رمى نفسو في السرير .. قامت

بيان من مكانها وقعدت جنبو : أعمل ليك حاجة تأكلها ؟

عماد بتعب : لا لا تسليجي ..

بيان : طيب ، سلطان بيسلم عليك ،

عماد وقام من رقدتو وقعد : الله يسلمو ، *وإلتفت على بيان* أنا مُسافر يوم السبت يا بيان ..

بيان : أي كلمتني ..

عماد : بس يا بيان أنا خايف عليك إنتي و مآزن ..

بيان بإبتسامة : مآ تخاف يا عماد ، شمبات مليانة رجال .. وكلهم بخأفواا علينا زي أخوانهم ..

عماد : بس ...

بيان وربتت على كتفو: إرتاح إنت يا عماد ، شكلك كدآ تعبان .. أنا أقوم أعمل ليك حاجة ،

وقامت على حيلهاا مُخَلِّية عماد في حيرتو وسرحانو ، قطع عليه سرحانو صوت الباب الكآن بيدق

عآين لساعتو بإستغراب كآنت السّاعة ١! إستغرب ، سُلطان ووليد سآفروا دا منو البجي في وقت زي دا ؟ إزداد دقّ الباب شدّة قام على حيلو وقلبو مآ مُتطمّن ، فتح الباب لقي في وشو إثنين من شباب شمبات كآن بآين في وشهم الخوف ، قال بإستغراب : علي و عادل ؟ في شنويا شباب ؟

علي : يا عماد ، أسمعني .. أطلع من البيت سرييع ..

عماد بإستغراب : في شنويا شباب ؟

عادل : عماد أسمعني ، مآفي زمن والله أطلع إنت بس !

علي : في إثنين طويلين شكلهم مُخيف كآنوا واقفين هنا قبل شوية وكانوا بيكَبُّوا في حاجة كدا جنب البيت ، زي الجآز ..

عآدل : والله يا عماد ما بنكذب عليك .. ولما مشينا عليهم جروا بسُرعة ، بس شكلهم ح يرجعوا ..

عمآد باستغراب : متين الكلام دا ؟

علي : والله قبل خمسة دقائق ..

عمآد وزح من الباب طلع و عاين ما لقي زول ،

عآدل : أسمعني يا عماد ، خلي أخوانك يطلعوا ، وبعدين نحن نتصرف ..

علي : عشان لا سمح الله البيت إتحرق ما تحصل لهم حاجة ،

عمآد بقلق دخل جوا البيت بجنون وهو يبصرخ : بيان .. يا بيان ، بيان !

صحي على صوت صُراخو مازن وبدأ يبكي ، بيان وجات بسُرعة وهي خيفة : في شنويا عماد ؟

عمآد بقلق : سوقي مازن و أطلعوا من هنا بسُرعه ..

بيان بخوف : عماد عليك الله في شنو!

عمآد بصوت عالي : سُرعة يا بيان !!

(♩)-----*-----•♩•-----*----- (♩)

{ بَلَقَاكَ حِلْمٌ .. }

(.الحلقة السابعة والعشرون.)

" أَصْحِيحُ أَنْ . الْمَطَارُ أَقْصَرَ الطَّرِيقَ لِلسَّعَادَةِ ؟ "

(♥).....*.....••.....*.....(♥)

عماد بقلق : سوقي مازن وأطلعوا من هنا بسرعه ..

بيان بخوف : عماد عليك الله في شنو!

عماد بصوت عالي : سرعة يا بيان !!

بيان والقلق باين في ملامحها مشت على مازن الكان بيبيكي وهدتو وشالتو على كتفها ..
عماد مسكها من يدها وبخطوات سريعة طلعا من البيت متوجهين على العم سعيد
الكان بيقفل في الدكان ، شافهم ماشين عليه بسرعة ، رسم ملامح الإستغراب على وشو ،
وصل عماد عندو وقال وبحاول يلّم في أنفاسو: عيبي ، مُمكن تخلي بيان ومازن معاك ،
لغاية ما أرجع ؟

العم سعيد بقلق : في شنو يا عماد ؟

عماد بسرعة : عيبي بحكي ليك بعدين ..

العم سعيد وأشر لبيان : لآ جدآ جدا .. أدخلي يا بيان جوا مع خالتك فاطمة ..
دخلت بيان وهي ما فاهمة حاجة وفي يدها مازن على بيت العم سعيد الكانت فيهو
زوجتو فاطمة بس ..

العم سعيد إلتفت على عماد : في شنو يا ولدي ؟ خوفتني !

عماد : ما عارف يا أخ .. بس أنا لازم ألحق البيت قبل ما يحصل ليه حاجة !

العم سعيد : عماد ، كدي أقعد برواقة وأحكي لي الحاصل ،

عماد : بعدين يا عم بعدين ، بس عليك الله خَلِّي بالك من مآزن و بيان ..

و مشى بسُرعة و خَلَّى العم سعيد في حيرتو و إستغرابو .. وصل عماد عند البيت دَخَلَ
عُرفتو بسُرعة و فَتَش بين الملابس على أوراق البيت و جوازو هو و بيان و الأوراق المُهمّة ،
شال النُّسخة الإحتياطية من مُفتاح بيت سُلطان .. طَلَعَ من البيت و قفلوا و مشى على
بيت سُلطان و فتحوا ، خَلَّى الأوراق هناك و طلع برّا البيت قعد يعاين مُنتظر الشَّبَاب
يرجعوا .. مرّت ساعة و مآف أي زول جا ، و عماد الكآن جاي تعبان نَعِس زيادة و غفى
غفوة صغيرة ، مآ صَحى مَها إلا على صوت همس خفيف في نُص الليل .. صَحى من
غفوتو و عاين تجآه بيتو ، كآن في شآبين بيلفوا حول البيت و في يدَهُم قارورة فيها سائل
و بيرشُوهُ على البيت ، بخطوات خفيفة و سريعة و وآثقة مشى عليهم ، أمآ هم في جو
التوتر مآ شعروا إلا بقبضة قوية تمسك رقبة كُل واحد فيهم ، في لحظة وحدّة شهقوا
شهقة خوف إتخيل لعماد إنوروحهم طلعت معاها ! القارورتين الكآنت في يديهِم وقعوا
و السائل فيها تطأير على شكل رذاذ ..

عماد و إتأكّد من الرّيحة إنودا جازز قآل بعصبية : إنتو منو ! و بتعملوا في شنو ؟

وآحد مَهم و كآن خآيف و بيرجف : والله ديل مآ نحن !

ردّ التآني و ما كان أقل خوف من الأول : و .. وَ الله هورسلنا !

عماد بإنفعال : الرّسلكم منو ؟

الأول و بلع ريقو : دَ..دا دا سعد .. أي سعد ،

عماد و عقد حواجبو بإستغراب : سعد ؟ سعد العرفوبيتي شنو ؟

التآني : مَ..مآ عارفين !

عماد و شدّ على قبضتو : يمكن في القسم تعرفوا !

الأول : لآلآ .. عليك الله القسم لآ !

(♫)-----*-----••♫•-----*----- (♫)

في قِسم الشُّرطة - شمبات :

عماد الكان قاعد على أعصابو بزّا مكتب الظّابط ، دأرت في بالومليون فكرة و فكرة ، سعد !سعد مصلحتو شنو من الكلام دا ! هو ما عندو عدا شخصي معاهو ! طيب كيف عرف بيت عماد ؟ يا ربي يكون سعد الواحد دا ؟ لالا الموضوع شكلو أكبر من كدا ! طيب كيف ح يقدر يحيي بيان و مآزن من سعد أو غيرهو ! كدا البيت بقى خطر عليهم ، إنفتح باب المكتب و طلع منو شُرطي قال بنبرة عسكريّة : أستاذ عماد ! مطلوب حضورك جوا ..

عماد المتوتّر قام على حيلو و مشى بخطوات واثقة بتتنأى مع القلق الجوا نفسو ، دخل المكتب و سلّم على الظّابط الأشار ليهو على الكرسي إنو يقعد ، الظّابط رفع يدينو على المكتب و شبك أصابعها ببعض ، و قال بنبرة جدية : يا أستاذ عماد ، الجماعة ديل مُصريين على رأيهم إنو أرسلهم وأحد إسمو سعد ..

عماد بحيرة : أبواا سعادتك ، بس أنا ما عارف سعد مصلحتو شنو من الكلام دا !

الظّابط : عشان كداا نحن ح نعتقلوا الآن و نعمل ليهو إستجواب ..

عماد : عآرفين بيتو طيب ؟

الظّابط : في الحقيقة الشّباب ديل إترفوا بكّل حاجة حتّى بيتو عآرفين مكانووين ،

عماد : طيب سعادتك في مانع إنو أجي معاكم ؟

الظّابط و قام على حيلو بإبتسامة : جدّا .. إتفضّل معانا ..

(♫)-----*-----••♫•-----*----- (♫)

الخرطوم - حي المطار :

خالد الكآن بايت مع سعد في بيتو وسهرانين مع بعض ، و على غير العادة كآن الجو متوتّر بينهم و كل واحد فيهم ساكت .. خالد و قرّر إنو يقطع الصّمت دا ، عدل قعدتو و قال بخُبث :

إنت يا سعد ..

سعد إتحنح : أيوا ..

خالد : رأيك شنو في ريم دي ؟

سعد بتوتّر: ريم ؟ مالها ريم ؟

خالد : يعني رأيك فيها شنو من ناحية الشّكل و الطّيبة و كدا .. يعني قصدي عندي حق إنو أحبّها !

سعد بحالمة : عندك حق و نص ، ريم دي بريئة و طيبة و على نيّاتها ما تستاهل البيحصل ليها دا كُلو ، ياخي دي جميلة جمال ما طبيعي ! دي ملاك ، عارف يعني شنو ملاك ؟

خالد بخُبث و ولّع سيجارة و شرب مّمها : عشان كدا إنت ح تعقد عليها صح ؟

سعد بدهشة إلتفت على خالد : ش..شنو !

خالد ببرود رجّع شرب من السّيجارة مرة ثانية : ما تتضهّب ! أناا عرفت إنك قرّرت تعقد عليها بعد العمليّة !

سعد الكآن مُندهش من كلامو سكت مسافة و قعد بدون حركة ،

خالد على نفس برودو : بس يا سعد ما كان في داعي للخيارات دي ! إنت كآن مُمكن تقول لي إنك عايز تعقد عليها ! أصلاً إنت في النهاية صحي !*ورمي السّيجارة في الأرض وقال بإنفعال* و أناا ندمان على الصُّحبة دي !

سعد : خ..خالد ، إنت بتقول في شنو ؟ د..دا كلام شنو دا ؟

سعد و بلع ريقو وقال بثقة مكذوبة : إنت قائل البلد دي مافها قانون ؟ كل حاجة
بتمشي على هوأك ؟

خالد وبثقة مشى عليهم ووقف قدامو : الظاهر إنك نسيت أنا منو ! أنا خالد يا سعد ،
خالد ود همّام بأشا !

سعد الكآن خايف : بوريك يا خالد ، ما أنا البتعمل فيني كدا ..

خالد وسمع صوت عربيّة الشرطة بيقرّب منهم ، قال بثقة : نشوف كلامك دأ في القسم
..*وضربو بخفّة على خدو* يلا يا حبيب ! أشوفك بعد كم سنّة ! ههههههههههه ..

وبخطوات واثقة دخل جوا العُرفة و خلى سعد في الحوش وأقف مكانو بدهشة و خوف
وقلق إجتمعت سوا ! هو سأمع صوت عربيّات الشرطة بس ما عارف ليه ما قادر يتحرك
، سرح في أفكارو و خيالو ، مُستقبلو ! شُغلو ! أبوهو ! أمو ! حياتو ! كلّها ضاعت في لحظة
وحدة بس عشآن لعب بالتارزي ما قال خالد !! إنقطع حبل أفكارو وهو بيسمع صوت
الباب وهو بيدق بقوة شديدة ، يهزّب ؟ بس لو هرب ح يجيبوهو ! دا خالد مآف زول
بيقدر يمنعوا من حاجة رآكبة في رأسو ، وقف مكانو مسافة ، طلع خالد من الصّالة و
رمى إبتسامة سآخرة على سعد وقال بسُخريّة : ما فتحت الباب مآلك ؟ طيب خليك
هنا ، أناا بفتحو ..

و بثقة يُحسد عليها مشى على الباب وفتحوا ، إتصّع الدّهشة وهو بيشوف إثنين من
الشرطة ، وأحد منهم قال بنبرة عسكريّة : إنت سعد كمال ؟

خالد بدهشة مُصطنعة : لآلا ، انا خالد ، في شنو ؟

الشرطي : سعد موجود ؟

خالد وأشار جوا الحوش : أي قاعد جوا ، في شنوياً جماعة ؟

وأحد منهم زح خالد من المدخل ومشوا عليه جوا ، أما خالد رسم إبتسامة خبيثة عليه ..

دخلو الحوش على سعد الكآن لسّة مُندهش و مصدوم ،

سعد وإنسجن ١٠ سنوات بتهمة التحريض على القتل ،

خالد ونقذ وعدو للإثنين الحاولوا يحرقوا بيت عماد ، وطلّعهم من القضية دي بسهولة

..

عماد و خلى بيان و مازن مع العم سعيد و قعد هو طول الأسبوع دا في البيت تحسباً
لأى حاجة ممكن تحصل ! وقرّر إنو بيان و مازن يقعدوا مع العم سعيد في فترة سفرو

،

(♩)-----*-----•♩•-----*----- (♩)

في بحري - شمبات :

عماد الواقف قدام بيت العم سعيد كان حاضن بيان و هو بودّع فيها ، أما بيان
الكانت واقفة على أطراف أصابعها عشان تسلّم على عماد ، نزلت دموعها بشدة ،
عماد ما حسّ إلا بحاجة باردة بتبلّل قميصوزح من بيان لقاها بتبكي ، قال بضحكة :
بيان ! لما سلطان سافر ما بكيتي !

بيان و طلعت منها إبتسامة خفيفة من بين سيل دموعها : بس إنت ما سلطان ، إنت
أخوي !

عماد و مسح دموعها : طيب يا أختي ، إن شاء الله كّلها أسبوع و برجع .. ما تبكي عشان
مازن ما يبكي ..

على آخر كلمة طلع مازن من بيت العم سعيد و إتعلّق في عماد و دموعو بتنزل قال

بشهقات مقطوعة : عماد ، .. ح .. حتمشي و ما تجي تاني .. مُش ؟

عماد بإستغراب و رفعوا على يدو و مسح دموعو : لا برجع إن شاء الله ، ليه بتقول كدا !

مازن و دموعو رجعت تنزل : زي بابا ، مُش هو برضو مُسافرياً عماد ؟

عماد فهم قصدو حضنو لصدرو وطبع بوسة على رأسو: إن شاء الله برجع يا مآزن بس
مآ تبكي ، أنا ماشي عشان أجيب ليك هديّة ..

مآزن بفرحة مُتنافية مع كمّية الدموع البتزل منو: جد ؟

عماد بإبتسامة : أيواا ..

ونزلو من يدو وسلّم على العم سعيد و الخآلة فاطمة و ودّعهم و طلع من شمبات
الحنينة !

(♫)-----*-----•♫•-----*----- (♫)

في الخرطوم شرق - حيّ الرّياض :

في عُرفة ريم كانت العُرفة مقلوبة فوق تجت و معآها هيفاء و غيدآ الكآنوا متوتّرات و
بيساعدوا في ريم

هيفاء بقلق : السّاعة كم يا غيدآ ؟

غيدآ وعاينت لتلفونها : يووه ، السّاعة ٣:٣٠ يا ريم !

ريم : مآ خلّصتوا إنتو؟ عماد ح يجي في أي لحظة ..

دخل ياسر بإبتسامة : يا ريم عماد جا ، شنطتك وين ؟ جآي أنزلها ليك ..

هيفاء و سألت شنطة ريم : هدي الشنطة نزلها يلا ،

ياسر : شنطة وحدة صح ؟

غيدآ : طبعآ شنطة وحدة ، هُم ماشين أسبوع بس و جآيين إن شاء الله ،

ياسر : طيب يلا مآ تتأخري ..

و شآل الشنطة و طلع من العُرفة ، هيفاء و مشت على ريم عملت لها روج خفيف و

قآلت بإبتسامة : عارفة مآ يحتاج ليك روج ، بس ساي عملتوليك ..

يَاسر سَاعِد عَمَاد وَنَزَل مَعَاهُو الِّشْنَط قَال بِإِتْسَامَةِ لِعَمَاد : خَلِّي بَالِك مِنْ بِنْت عَمِّي
يَا عَمَاد ..

عَمَاد بِإِتْسَامَةِ : ح تَوَصَّيْنِي كَمَا ن ؟

يَاسر وَ حَضَنُو : مَا بَتَتَوَصَّى عَارْفَك ، يَلَا فِي حَفْظ الرِّحْمَن ..

وَسَلَّمَ عَلَى رِيم وَ رَجَعَ بِالْعَرَبِيَّة ..

عَمَاد وَ مَسَكَ رِيم مِنْ يَدَيْهَا وَ دَخَلُوا المَطَار ، خَلَّى رِيم فِي وَاحِد مِنْ كُرَاسِي الإِنْتِظَار وَ وَزَن
العَفْش ، خَلَّصُوا الإِجْرَاءَات وَ دَخَلُوا عَلَى صَالَةِ المَغَادِرَةِ ..

(.....•○•.....)

دَقَّت عَقَارِب السَّاعَةِ البَتَشِير لِلسَّاعَةِ ٩ تَمَام مَوْعِد إِقْلَاع الطَّيَّارَةِ ، فِي اللِّحْظَةِ دِي عَمَاد
الكَان قَاعِد بَهْدُو وَ هُو بَعَايِن لِلْمَاشِي وَ الجَّاي سَمِع صَوْت الكَابِتِن الكَانَ بِقَوْل رَقْم
الرَّحْلَةِ وَ بَهِيَا المُسَافِرِينَ لِلإِقْلَاع قَال بَتَنبِيهِ :

الرَّجَاء رِبْط أَحْزَمَةِ الأَمَان إِسْتِعْدَاداً لِإِقْلَاع الطَّائِرَةِ ..

مَسَكَ عَمَاد حَزَام رِيم وَ رِبَطُوا لِيهَا وَ عَلَى وَشُو إِتْسَامَةِ خَفِيفَةَ وَ رِبَطَ الحَزَام لِنَفْسُو وَ
بَهْدُو قَال دُعَاء السَّفَر ،

أَقْلَعَت الطَّيَّارَةَ فِي لِحْظَات مَوْدَّعَةِ مَطَار الخَرْطُوم الدُّوَلِي وَ أَرْض السُّودَان الحَبِيب !

{ بَلَقَاكَ حِلْمٌ .. }

(.الحلقة الثامنة والعشرون.)

" ويحدث أن تشتاق لرؤية خيطٍ من نورٍ حتّى ! "

(♥).....*.....•.....*.....(♥)

في المملكة العربية السعودية - جدة :

كان واقف في حوش بيتهم وفي يدو تلفون و على شفأيفو إبتسامه عذبة ، قال بصوت

هادئ :

طيب يلا يا بعدي ، أناا بققل ، سلميلي على العم سعيد ، ومازن كماان ،

بيان على الجانب الثاني من الخط : يوصل إن شاء الله ،

سُلطان : بيان ..

بيان بإبتسامه : أهلين ،

سُلطان بهمس : خليلي بالك من نفسك ، و قلبي اللي معك إرحميه ..

بيان و حدودها إتورّدت بألخجل قالت بإبتسامه هادئة : مع السّلامه ..

سُلطان بإبتسامه عريضة : في أمان الله ،

قفل الخط و عأين في التلفون مسآفة .. دخلو في جيبو و مشى على الصّالة ، كانت أُمُو و

أخواتو قاعدين في جلسة قهوة ، دخل عليهم بإبتسامه ..

أختورأما و خلفت رجليها قالت بضحكة : أقول الله يعطينا جو الرّومانسيّة اللي إنت

عأيشه مع خطيبتك !

ريم بإبتسامة : الحمد لله ،

عماد وقام على حيلو : طيب يلا عشان نمشي على المستشفى ..

ريم بإستغراب : ح نمشي المستشفى طوالي يا عماد ؟ و الفندق طيب ؟

عماد : لا الأيام دي ح نقعد في المستشفى لغاية ما تعملي العملية إن شاء الله ، وبعد ما تطلعي نمشي الفندق إن شاء الله ..

ريم : وإنت يا عماد ؟ ح تقعد في المستشفى برضو ؟ تعب عليك كدا :/

عماد بإبتسامة : يعني إنتي مُتخيِّلة إنو أنا ح أقعد مُرتاح في الفندق وإنتي في المستشفى براك !

ريم : بس يا عماد كدا بتتعب ..

عماد : ما مُشكلة ، أهم شي إنك تكوني مُرتاحة !*وإبتسامة* طيب يلا نتحرك ..

طلعوا من صالة الوصول ، وإستأجرو تاكسي وصلهم وأحد من الفنادق الكانت في منطقة مُستشفى يوروميديك ، نزلوا ونزلوا العفش في عُرفهم ، وإرتاحوا مُدّة نُص ساعة ، طلَعوا من الفندق ومشوا على المُستشفى الكان بيبعُد خطوات من الفندق .. دخلوا المُستشفى الكبير والفخم ! عماد ساعدتوا لُغتوا الإنجليزِيَّة إنو يسأل عن دكتور أديل آرنو ، في لحظات كان الدكتور عندهم ومعاهو المُترجم ! بإبتسامة عريضة سلّم عليهم وأشّر لهم إنويتبعوهو ، مئى الدّكتور بخطوات وأثقة و يديّنو في جيوب اللاب كوت ، ووراهو عماد المأسك ريم من يدها .. ركبوا المصعد ونزلوا في الطابق الخامس و إتوجّهوا على واحد من أجنحة المُستشفى الفخمة البيتكون من عُرفة للمريض و صالة صغيرة ، كان الدّكتور متكفل بإقامة ريم فيها .. دخلوا الجناح وقعدوا فيهو ،

المُترجم بإبتسامة بيتكلّم مع عماد : إرتاحوا إنتو الليلة ، وإن شاء الله بُكرا العَصْرَح يكون موعد العمليّة ..

عماد بإستغراب : طوالي كدا ؟

المُترجم : في العادة الدّكتور بيكشف على المريض ، بس هو عآرف حالة ريم و مُتأكد من المشكلة .. إن شاء الله بُكرا ح تكون ..

عمآد وردّ الإبتسامة : إن شاء الله ، و عليك الله أشكُر لي الدكتور داا على كُُل العملو معانا !

المُترجم : إن شاء الله ..

و طلّع من الغُرفة .. أما عمآد إتوجّه على ريم الكآنت قاعدة في السّرير ، قعد جنبها بهدوء و قال بإبتسامة : إن شاء الله بُكرا مواعيد العمليّة .. مُرتاحة يا ريم ؟

ريم بقلق : مآ عارفة ، مآ متعوّدة أنوم برآ البيت ..

عمآد : إتطمّني أنا جنبك يا ريم ..

ريم : كلمت نآس ياسر إننا وصلنا ؟

عمآد : أيوا ، إتصلت عليهم و كمآن إتصلت على بيان ، الحمد لله ،

ريم : أيوا .. تعبانة و الله أنا ..

عمآد و قام على حيلو : طيب إرتاحي أنا نايم برآ لو إحتجتي لي ..

ريم و رقدت على السّرير و إتغطّت : إن شاء الله ، تصبح على خيرآ عمآد ..

عمآد و طفى أنوار الغُرفة : و إنتي من أهلو ..

(.....•○•.....)

صباح اليوم التّاني ، دخل عمآد الغُرفة و فتح أنوارها و ستآرة الشّبآك و إلتفت على ريم الكآنت قاعدة مكانها سألها بإستغراب : مآ قمتي صليتي ؟

ريم بخجل : مآ مُتعوّدة هنا ..

عمآد و مشى عليها : صح أنا كمآن نسيت إنو أنا ما عودتك ..

و مسكها من يدها و ساقها إتوضّبت و جات صلّت و إنتهت و سلّمت ، عماد الكآن قاعد
في واحد من الكراسي : إتصلت على ياسرو بلّغتو بموعد العملية ، إن شاء الله أول ما
تدخلي الغرفة ح أتصل عليه ..

ريم إبتسمت إبتسامة خفيفة بأين فيها الخوف ..

عماد لأحظ خوفها نزل من الكرسي و قعد جنبها قال بإبتسامة : خايفة يا ريم ؟

ريم : أيوا ..

عماد مسك يدها بدفء و قال بهدوء : أنا معاك ! ما تخافي !.. خليّ ثقتك بربك كبيرة !

ريم : إن شاء الله ،

(.....•○•.....)

مرّت الساعات سريعة على ريم بطيئة على عماد ! دحل الدكتور الغرفة و في يدو
مجموعة أوراق و معاهو مُمَرِّضين إتكلّم مع عماد بالألمانية ، مع إنوما فهموبس
إستنتج إنوح يعملوا ليها العملية الآن .. المُمَرِّضين الكآن عددهم ٥ .. حرّكوا سريرريم
بالعجلات على غرفة العمليّات و معاهم عماد .. كآن حاسّي بخوف ريم عشآن كدا بقى
طول المسافة مأسك يدها بقوة عشآن يحسّسها إنو هو معاهها !

(♫)-----*-----•♫•-----*(♫)

في الخرطوم شرق - حيّ الرياض :

في غرفة هيفاء ، دخلت غيداء على هيفاء المشغولة في لوحة بترسّم فيها قعدت في
واحد من الكراسي و هي ساكتة ، كانت عيونها بأين فيها الخوف ..

هيفاء إلتفت على غيداء بإستغراب : عندك شنويا غيداء ؟

غيداء رفعت عيونها الكآنت في الأرض : ريم دخلت العمليّات يا هيفاء ..

هيفاء بدهشة : كذّابة ! القال ليك منو ؟

غيداء : جد والله ، عمّاد إتصل على ياسرو بلّغوا ..

هيفاء ورفعت يدها بالدُّعاء : يااا رب تشوف النُّور!

(♫)-----*-----•♫•-----*----- (♫)

مُستشفى يوروميديك - ألمانيا :

بعد ساعات ، عمّاد الكآن قاعد قدام غُرفة العمليّات وفي يدو مُصحف ، قام على حيلو أول ما شاف البّاب بينفتح و يطلع منُّها الدكتور بإبتسامه ومعاهو المُترجم ..

عمّاد بلهفة : خيراً دكتور !

الدكتور : Wir haben alles erfolgreich geht !

المُترجم بإبتسامه : العمليّة تمت بسلاسة و نجاح الحمدُ لله ..

عمّاد بفرحة : يعني ح ترجع تشوف ؟

المُترجم : للأسف دي حاجة ما بنحدِّدها إلا بعد ما نشيل ضمّاد العين من المريضة ..

عمّاد : متين طيب ؟

المُترجم : إن شاء الله بُكرا الصّبّاح ..

عمّاد : خير إن شاء الله ..

(.....•○•.....)

في غُرفة ريم في المُستشفى :

عمّاد بإبتسامه هادئة : كُل حاجة مرّت بسلام ياا ريم الحمدُ لله ..

ريم بإبتسامه باهتة : طيب ليه ما يشيلو الضّمّاد عن عيوني ؟

أفكارها صوت الباب الإنفتح سمعت صوت عماد بيتكلم مع زول إستنتجت إنودا
الدكتور و المترجم ..

الدكتور بإبتسامة عريضة : guten Morgen ..

عماد : صباح الخير ريم ..

ريم بهدوء : صباح النور ..

المترجم : دا الدكتور يا ريم جاي عشان يشيل الضماد عنك و يعرف نتيجة العملية
الكأنت أمس ..

ريم على نفس هدوءها : أوكي !

الدكتور و شمّر عن يدينو : Sind Sie bereit ؟

المترجم : جاهزة ؟

ريم : أيواا ..

عماد وإلتفت على المترجم قال بصوت خافت : مُمكن اناا أشيل الضماد ؟

مدّ الدكتور يدو عشان يشيل الضماد إلّا إنو صوت المترجم وقّفو : Sir, das tun will, er

..

الدكتور و إبتسم لطلب عماد زح من ريم وقدمو ومسك يد عماد عشان يشرح ليهو
الكيفية ، عماد و فهم كلام الدكتور ، مدّ يدو الكأنت بترجف على عيون ريم ، إتلاحم
خوف ريم مع خوف عماد !

بهدوء شديد شأل الضماد عن عيونها بلع ريقو و عآين في عيون ريم و قال بهدوء شديد :

ريم؟

(♩)-----*-----••♩•-----*----- (♩)

{ بَلَقَاكَ حِلْمٌ .. }

(.الحلقة التاسعة والعشرون.)

" وإن كُنت في جمعٍ من النَّاسِ ، لن تشعُرُ بالسَّعادةِ إلَّا بقرب أحدهم! "

(♥).....*.....•••.....*.....(♥)

عماد وفهم كلام الدكتور ، مدّ يده الكأنت بترجف على عيون ريم ، إتلاحم خوف ريم مع
خوف عماد !

بهدهوء شديد شال الضماد عن عيونها بلع ريقو و عاين في عيون ريم وقال بهدهوء شديد :
ريم؟

الدكتور بهدهوء : .. Möglich, für einen Zeitraum von Sehstörungen sein

المترجم إتنحنح : ريم ، مُمكن الرؤية تكون ضبابية عندك لفترة ، ودي حاجة طبيعية ..
ما سمع رد مّها .. كانت ساكنة و هادئة و ساكنة من الحركة ،

عماد و قلقو بدأ يزيد قال بتوتّر و عيونو إتغطّت من الدموع المتجمّعة فيها قال بهدهوء :
ريم ..

سكتوا كلّهم ، كل حاجة سكتت .. الشمس و القمر و الليل و المساء ، حتى أصوات
أنفاسهم إنقطعت ! كانت الغرفة ساكنة و هادئة من الحركة ، وكل واحد بهمّو .. ريم و
قرّرت إّنها تقطع السكوت دأ ، من غير إرادة مّها شفأيفها بدت تتحرّك إلّا إنو دموعها
سبقتها و نزلت بشدة .. قالت بنبرة متحشجة و مخنوقة : ع. عماد ، فعلاً عيونك عسليّة
!

عماد الكآن على أعصابو قال بفرحة غير معهودة منو: ريم! إنت شايفاني؟

ريم الكآنت بتبكي نزلت دموعها و هي بتهمز رأسها بنعم ..

أما عماد المآ كان مُصدِّق قام على حيلو بسُرعة و حُضن الدِّكتور بقوة ، الدِّكتور المآ كان فآهم حآجة إلا إنو إستوعب إنها بتشوف و إنو العمليّة نجحت ..! ربت على ظهر عماد و هو مُبتسم ،

زح منو الدِّكتور و قعد في الكرسي الكآن جنب سرير ريم قعد بهدوء و لسة مبتسم ، مدّ إصبع يدو بهدوء على عينيها عشآن يتأكد من نجاح العمليّة ، بمجرد مآ رمشت زادت إبتسامتو و عرف إنو العمليّة نجحت ، قام على حيلو بإبتسامة ، وإلتفت على المُترجم و همس في أذنو و طلع ،

المُترجم و إلتفت على عماد الكآن لسة مآ مُستوعب الحاصل قال بإبتسامة : الحمد لله على السلامة يا أستاذ ..

عماد بفرحة كبيرة : الله يسلمك ،

المُترجم : إن شاء الله ح تقعد لغاية بُكرا عشآن نضمن إنو مآ تحصل مُضاعفات جانبيّة للعمليّة ، و بعد بُكرا الدِّكتور يصحح لهما بالخروج ..

عماد : إن شاء الله ، بالله كرر سُكري للدكتور النبيل دا تاني ..

المُترجم بإبتسامة : إن شاء الله ، عن إذنكم ،

و طلع من العُرفة بهدوء و قفل الباب و رآهو ..

عماد بفرحة قعد جنب ريم و هو مُبتسم ، شآيف دموعها بتجري قال بهدوء : مُش قُلت ليك خليّ ثقتك برتِك كبيرة !

ريم : عماد .. أنا .. أنا مآ مُصدِّقة ، بعد مآ فقدت الأمل من بصري .. مآ مُصدِّقة ارجع

أشوف تاني ..

عمادٌ بهدوءٍ قَرَّبَ يَدُو مَتَّهَا و مسح دموعها قَالَ بِإِبتِسَامَةٍ : طيب مآ تبكي ، عشآن
عيونك !

ريم ورسمت إبتسامة خفيفة : بس أخيراً شُفتك !..

عمادٌ بضحكة : هههههههه ، شُفتي ، كنت قدُرو عدي ليك .. انا أول زول تشوفيهو ! *وقَام
على حيلو بِإِبتِسَامَةٍ * أهّا ، دا أنا عماد .. عماد منصور بشحمو ولحمو وأقف قدّامك !..
شأيفاني كويّس!

ريم غصباً عنّها ضحكت نزلت بهدوءٍ وحذرٍ من السّريرٍ وإتجهت على عمادٍ قالت
بِإِبتِسَامَةٍ : يعني غيدآء مآ كذبت في حاجة ، وصفتك لي كأني شأيفالك .. *ومشت على
الشُّبّآك * أخيراً ح أقدر أشوف ! الشّمس .. السّماء .. السّحاب .. الطّيور ، حاجات ما
كانت بتهمّني زمان ، بس الآن حآسة بيها ، جد الإنسان مآ بيعس بقيمة النّعمة إلآ لمآ
يفقدها !

و التفتت على عمادٍ وقالت بِإِبتِسَامَةٍ : أنا دايرة أَلِف ألمانيا دي كُلهّا !

عماد : من عيوني .. بس أكّلم ياسر أول شي لانو مُنتظر على أحر من الجمر ..

و طلّع من الغُرفة و في يدُو التلفون ..

ريم بدون إرادةٍ مَتَّهَا سجدت و همست في أذن الأرض : الحمدُ لله يا رب !

(♫)-----*-----•♫•-----*----- (♫)

في الخرطوم شرق - حيّ الرياض :

ياسر بفرحةٍ قفل التّلفون و جرى بسُرعةٍ على غُرفة هيفاء فتحَ الباب بقوةٍ على هيفاء
الكآنت قاعدة على اللآبتوب و جنبها غيدآء نأيمة بتعب ، إنفتح الباب بقوةٍ على هيفاء
قالت بخلعة : بسم الله الرّحمن الرّحيم ، في شنويآ ياسر !

ياسر ونطّ من الفرحة : ريم رجعت تشوف يا هيفاء !

هيفاء بفرحة قامت من السرير: بجد !!

ياسر: جد والله كلمني عماد قبل شوية ..

غيداء وصحت على صوتهم قامت من السرير وقالت ببحة ناعسة: أطلعوا إتشاكلوا برا

ياخ ، ما ممكن الزول ينوم بهدوء معاكم !

هيفاء و جرت عليها بسرعة: ريم رجعت تشوف !

غيداء و قامت السرير بسرعة: كذابة !!

و كأنها إستدركت حاجة: يعني شافت عماد !

(♫)-----*-----•••-----*----- (♫)

في اليوم الثاني :

الدكتور بعد ما كشف على ريم أبدى إعجابو بالنجاح المبرر للعملية و إنوما ف أي

مضاعفات زي ما كان متوقع ، صرح ليها بالخروج من المستشفى ..

كان موعد رحلتهم يوم الخميس ، ولسة معاهم يومين ، عماد زي ما وعد ريم قرر إنو

يلف بها شوارع ألمانيا كلها ..!

(♫)-----*-----•••-----*----- (♫)

في الخرطوم - حي المطار:

في بيت خالد كان بيتكلم بال تلفون مع أبو سعد صحبو ، أو الكان صحبو! كان باين من

ملايح صوتو إنو حزين على ولدو و في نفس الوقت كان شاكّي في التهمة إتوجهت لهو

دي !

خالد: يعني يا أستاذ ، قصدي بما إنو سعد أخذ ١٠ سنين سجن ، إذا لأزم خطوبتو من

بت الناس المسكينة دي تتفركش! معقولة ح يعلقها ١٠ سنين كدا!

أبو سعد بحُزن : إنت شايف شنو يا ولدي ؟

خالد : يعني تتصل على المسؤول عنها و هو عمها سيف ، و تقول ليهو إنكم دايرين
تفركشوا الخطوبة دي ، و يا ليت لو ما تقول ليهو السبب شنو ، تمام ؟

أبو سعد : إن شاء الله أول ما ألقى لي فرصة ،

خالد و ابتسم إبتسامة حُبث : طيب يا عم ، أستأذن أنا ،

أبو سعد : طيب في أمان الله ،

قفل الخط و هو مُبتسم بنصر ، أخيراً ح يعمل الفي بالو و ريم تبقى من نصيبو !!

(♫)-----*-----•♫•-----*----- (♫)

في الخرطوم شرق - حيّ الرياض :

غيداء بحماس دخلت على هيفاء العُرفة قعدت جنبها و قالت و هي بتفكّر: يا ربي
بيعملوا في شنو الآن ؟

هيفاء بإستغراب : منو هُم ؟

غيداء : ريم و عماد ..

هيفاء : إنتي ما عندك موضوع سآي !

غيداء و إلتفتت على هيفاء : أسمعيني لأزم نعمل لهم حفلة كبيرة !

هيفاء بحماس : صح والله ، تكون حفلة فخمة و ضخمة ، و نعزم كل الناس ..

على آخر كلمة دخل يأسرو هو فرحان قال بإهتمام : سآمع لي سيرة حفلة ..

غيداء و إلتفتت عليه : يا اسر ، تعال تعال ، دايرين نعمل حفلة كبيرة لريم ..

يأسر وقعد جنهم : خلاص أسمعوني أنا بتكفل ليكُم بالأكل و الوجبات و العصاير و
الحاجات دي ،

هيفاء : طيب شغل الديكور و اللّمبات دي انا بتكفل بيها ،

غيداء : طيب أنا يبقى لي أعزم الناس ..

هيفاء بأسى : بس لو عرفوا إنو الحفلة لريم مآ ح يجوا !

غيداء وقامت من مكآنها قالت بشقاوة : مآ أكون غيداء بت سيف لو مآ خليتهم يجوا !

يأسر : طيب أسمعوني ، دايرين فنّان و لآ ؟

هيفاء : لالا ماف دآعي لفنان ، ح تكون جآيطة بس .. نعمل ميوزك هاآدية و خلاص !

غيداء : هيفاء يعني لأزم نمشي نجيب لريم فُستان ، عشان نفاجيها ..

يأسر و قام على حيلو : طيب لحدّي هنا أنا دوري إنتهى ،

هيفاء : إستنى يا ياسر ، مآ حدّدا موعدا !

غيداء : هُم ح يجوا يوم الخميس صح ؟ إذا الحفلة تكون يوم السبت بالليل ،

يأسر : أي أي حلو موعدها .. بس يا جماعة في حاجة إنتو نآسيها !

هيفاء و غيداء في وقت واحد : شنو ؟

يأسر : أبوي ! ما ح يوآفق لو عرف إنو عاملينها لريم ! إنتو عارفين أبوي ..

غيداء : لآلآ ح يوآفق لو قلنا لهُو إنو الناس ح يبدو إعجابهم بالعملو لبت أخوهو و

الكلام دا ،

يأسر و طلع من الغُرفة : خلاص تمام ، أنا أبدا أجهزو أحجز من الليلة ..

(♩)-----*-----•••-----*----- (♩)

مرّو يومين :

ريم كانت في قمة الفرحة بعد ما شافت ألمانيا وجمالها والأهم من كداا إنو عماد كأن
جنبها في أي خطوة لها ..

عماد ما كان أقل فرحة من ريم ، حسّ إنو البصر إرتدّ ليه هُو مُش ريم !
غيداء وهيفاء وياسر حجزوا كل حاجة بعد ما أستاذ سيف أداهم الضوء الأخضر ..
أبو سعد الكآن حزين على إبنو ، نسي يكلم أستاذ سيف بموضوع الخطوبة !

(♫)-----*-----•••-----*----- (♫)

مطار برلين تيجيل الدُولي - ألمانيا :

في صالة المغادرة ، ريم الكانت قاعدة في كراسي الإنتظار كانت مُستمتعة و هي بتقدر
تشوف الناس ! إبتسمت ! أخيراً قدرت تشوف ! قدرت تشوف كل حاجة حتّى عماد ،
إتخيلتو كتير ورسمتو في بالها ، إلا إنها إنصدمت لما شافتو ، ما كانت متخيلا هو كدا !
كان وسيم أكثر مما إتخيلت .. ملامحو الهادئة البتتناقض مع رحو و شخصيتو ! عيونو
العسلية البتقدر تشوف نفسها فيها بوضوح ! أنفو الواقف بشموخ زي عزّة نفسو ! شنبو
ودقن البيعكسوا رجولتو بدقّة ! رسمت على شفايفها إبتسامة خفيفة ، قطع سرحانها
عماد الكآن جآي عليها و في يدو كبايتين عصير .. قعد جنبها بهدوء و ختّ العصير
قدّامهم قال بإبتسامة : شآيفك مُندمجة شديد مع الناس !

ريم بتنهيده : عيوني كانت مُتعطّشة للمنظر دآ !

عماد : سُبحان الله ، جيتي هنا في ظلام ! و ح ترجعي و إنتي شآيفة النور ..

إلتفتت عليه بإبتسامة هادئة : عماد .. أنا بالجد ما عارفة أقول ليك شنو ، بس ربّنا
يخليك لي !

عماد و شآف الفرحة في عيونها : إتأكّدي إنولو إحتجتيني ح تلقيني جنبك !

غيداء : مُش قلناا بلاش طمّع ! خلمهو يمشي لأخوانوا !

في النّهايّة عمّاد طلع مآثي على شمبات بفرحة بعد ما ذكّرتو غيداء بموعد الحفلة ،
أما غيداء ريم كانت متوعّداها بدرس يادّيهما شوية !

(♩)-----*-----•♩•-----*----- (♩)

في بحري - شمبات :

عمّاد بعد ما سلّم على العم سعيد و ساق بيان ومآزن الكآن نايم مشوا على بيتهم ، لقي
إنو أهل شمبات إتكلّوا بإزالة الجآز من البيت عشآن ما تحصل حاجة لآسمح الله ،
دخل البيت وهو كلوشوق ليه وليبان ومآزن

بيان بفرحة : اعمل ليك شاي يا عماد ؟

عمّاد بإبتسامة : يا ليت والله ، إشتقت للشّاي من يدك !

بيان : طيب ، ثواني ويكون جاهز ..

و طلعت من الصّالة بإتجاهه المطبخ خلّت عمّاد في الصّالة برأهو إلتفتت على مآزن النّايم
طبع بوسّة على خدو وقال بإبتسامة هادئة : أصحى يلا ، جيت ليك هديّة زي ما وعدتّك
!

(♩)-----*-----•♩•-----*----- (♩)

الخرطوم شرق - حي الرّياض :

في غرفة ريم ، إلتفتت على هيفاء بإبتسامة هادئة : كدا كيف يا هيفاء ؟

هيفاء بإنهار : ما شاء الله تبارك الله ما شاء الله ، الله يحميك يا ريم ، طلع عليك رهيب
الْقُستَان والله !

ريم : جد ؟

هيفاء : جد والله ، اللون الأسود دائماً بيطلع فيك حلو!

دخلت غيداء العُرفة وأُعجبت بريم وفُستانها إلتفتت على هيفاء : أسمعيني ، في إثنين تحت جوا يادوب وقالوا دايرينك ، وإتأكدي عليك الله من الموسيقى إنو صوتها وأصل في كُل مكان .. وأمشي على أُمي قاعدة تفتّش عليك ، غايتو أول مرة أشوفها مبسوفة في بيت ريم !

هيفاء رفعت فُستانها وطلعت بسرعة عشآن تنجز كلام غيداء ،

غيداء وإلتفتت على ريم الكأنت لأبسة فُستان أسود طويل من السأتان و منطقة الكمّين كانت من الدانتيل ، كأن مأسك على منطقة الصّدر والخصر و نازل من تحت بإرتياح على جسمها ، خلّت شعرها الأسود يأخذ راحتو على ظهرها وفكّتو ، كعبها العالّي كأن أسود و من المخمل ، كسرت اللون بسلسل فضّي إشتراهو ليها عماد من ألمانيا! ومعاهاو حلقين ناعمين ، كأن شكلها بريء و في نفس الوقت مُلفت ..

غيداء مشت عليها بإبتسامة : شكك طالع حلو يا ريم ،

ريم بإبتسامة : إنتي الأحلى يا غيداء ..

غيداء : عماد مُنتظرك تحت ، من بداية الحفلة وهو بيسألني منك .. يلا سريع ما تتأخري عليهو ،

نزلت ريم ومعاها غيداء ، و على وشّهم إبتسامة و في عيونهم فرحة يتحسدوا عليها .. جذبوا الأنظار بشكلهم و كُل النَّاس عيونهم إتعلقت بهم ، ريم مُجاملة للنّاس قعدت تسلّم عليهم و تبتسم لهم ، كأنت الأجواء مليانة فرح ، الكراسي الكانت في الحوش كأنت ملبّسة قمّاش أبيض و فضّي ، اللّمبات كأنت باللون البنفسجي و الموسيقى كأنت هادية بس صوتها عالي ، و في طرف الحوش كأن في بوفيه مفتوح ، كأنت حفلة راقية و هادية بتليق بريم ،

عماد الكآن قاعد مع ياسرو أولاد عمُو في جو كلو ضحك ، رُغم إنوما بيعرفهم من زمان إلا إنو بعفوية دخل معاهم ، في وسط الضحك داا جأت غيداء من وراهو و ضربتو بخفة على كتفو ، إلتفت عليها لقاها مُبتسمة قرّبت من أذنوو همست ليهو : ريم نزلت ..

عماد و إلتفت على الشّباب قام على حيلو : عن إذنكم يا شباب ..

مشى بخطوات الواثقة على ريم ، و شلّة البنات الجنهم كانت عيونهم مُعلقة بعماد ، كان لأبس بدلة رمادية بدون أكمام ، وتحته قميص أبيض ، خُصلات شعرو كانت مرتبة بإهتمام ، و عيونو العسليّة خطفت أنفاس البنات ! و الشّباب كمان ..

مشى على ريم بإبتسامه و عيونو معلقة بيها ، قال بإبتسامه : طالعة أميرة !

ريم بخجل : تسلّم ،

عماد : إتعثّيتي ؟

ريم : لا مالي نفس ..

عماد و إلتفت على غيداء : غيداء ، عليك الله جيب ليانا صحنين عشاآ في حوش أستاذ سيف تمام ؟

غيداء بإبتسامتها المعروفة مشت عشان تنقذ كلام عماد ،

عماد إلتفت على ريم : تعالي حوش أستاذ سيف فأضي ، شأيف هنا في جوطه ..

ريم بإبتسامه : طيب يلا !

(♫)-----*-----•••-----*----- (♫)

{ بَلَقَاكَ حِلْمٌ .. }

(.الحلقة الثلاثون.)

" وأحياناً الظلام يكون أظھر! "

(♡).....*.....•••.....*.....(♡)

عماد إلتفت على ريم : تعالي حوش أستاذ سيف فاضي ، شأيف هنا في جوطة ..

ريم بإبتسامة : طيب يلا !

و من بين عيون البنات الكانت معلقة بعماد طلعت همهمات و همسات كانت ريم عارفة سببها كويس ، وعارفة كل همسة قصدهم بيها شنو ، إتألمت .. بس شأفت عماد قدامها إبتسمت و مشت معاه على حوش الأستاذ سيف ، كان فاضي .. قفلت الباب وراها و قعدت معاهو بإبتسامة في واحدة من الطرابيز الفخمة .. علقت عيونها في عيونو ، من زمان كان نفسها تشوفها ،

عماد بإبتسامة : شأيفة يا ريم الناس دي كلها جاية عشان منو!

ريم بإبتسامة حزينة : ما يغرك يا عماد ، مآفهم أي زول جآي عشاني !

عماد بإستغراب : جآيين عشان منو طيب ؟

ريم بنفس الملامح الحزينة : على حسب ، في ناس جآيين عشان يأسرو بعضهم جآي عشان غيداء و هيفاء ، و أغلهم جآيين عشان عمي سيف .. و المآ بقصروا جوا عشان أبوي ، مآفهم أي زول جآ عشاني أنا ،

عماد بملامحو الهادئة رسم إبتسامة خفيفة مطمئنة و عآين في عيونها و قال بهمس :

طيب و أنا ؟

ريم إبتسمت إبتسامة خفيفة ،

عماد و سهام عيونو إخرقت عيونها قال و هو بيتأمل فيها : أنا جاي عشانك إنت يا ريم ، و أنا دخلت الفيلا دي عشانك إنت .. أصلاً طبيعة وجودي هنا عشان خاطرِك إنت ، لو إنتي شأيفة إنوما في زول بهتم بيك ، ح تبقي غلطانة !! أعرفي إنو إنتي بتهمني أكثر من نفسي ..!

ريم بخجل : ربنا يخليك لي ،

عماد و عدل قعدتو : أمين يا رب ، و يخليك ..

دخلت غيداء بإبتسامة شقية عليهم و ختت صحنين في الطريزة : معليش يا جماعة بس كل شوية يمسوني عشان أسلم على فلان و إعلان ..

ريم : هههههههه ما مشكلة ، يلا أمشي عليهم إحتمال تجيب ليك عريس ..

غيداء بخباثة : إنتي أمسكي عريسك أول شي ، *وبخطوات سريعة طلعت من الحوش*

عماد و مبتسم إلتفت على ريم : أنا جبتك هنا يا ريم عشان نقدر نفكر بمزاج ح نعمل شنو في موضوع سعد خصوصاً و هو ناوي يعقد عليك الأسبوع دا ..

ريم نزلت رأسها بأسى : ما عارفة ، مُحترارة و الله .. ما قادرة أفكر في شي ،

عماد : أنا ما قصدي أعكر ليك مزاجك يا ريم ، بس ضروري نلاقي حل خلال الأسبوع دا ، قبل ما أمشي ،

ريم بإستغراب عقدت حواجبها : قبل ما تمشي ! تمشي وين ؟

عماد و إنتبه للكلمة الطلعت منو بدون قصد ، ما كان داير يكلمها بموضوع إنو شغلوح ينتهي ، بس هي في النهاية ح تعرف ، عدل قعدتو و شبك أصابع يدينو سوا و ختاها على الطريزة و إتحنح ، قال بتوتر : في الحقيقة يا ريم ، أنا دا ح يكون آخر أسبوع لي معاك ،

ريم بدهشة : آخر أسبوع !ليه ؟

عماد : إنت عارفة يا ريم إنو أنا جيت هنا عشانك إنتي ، عشان أكون مُرافق ليك إنتي ،
بما إنك كُنتي عميآء و ما بتشوفي ، دأ كان الهدف ، الآن يا ريم الوضع إتقلب الحمد لله
بقيتي تشوفي زي الفل و ما ح تحتآجي لي تآني ، إذا مآفي دآعي لوجودي هنا ،

ريم ودموعها غطت على عيونها ، قالت بنبرة مُتَحَشِرْجَة بتكُتُم شَهَقَاتِهَا : بَس يا عماد
، دي ح تكون أكثر فترة مُحتَاجَة ليك فيها ، أنا ما كُنت محتَاجَة ليك عشان ما بشوف
، أنا مُحتَاجَة ليك في كُل خطوة من حياتي .. في كُل حركة من حركاتي .. ما ح أقدر أواجه
كلام النَّاس و شر سَعَد و خآلد برآي ، ح أحتَاجك جنبي والله ..

عماد بأسى : ريم أسمعيني ، إنتي قويّة و صدّيقيني بتقدري توأجهي الدُنيا دي كلها براك
لو خَلّيتي ثقتك برّك كبيرة .. إنتي بتقدري تشوفي الآن ما ح تحتآجي لي جنبك !

ريم ودموعها شقت طريقها خآرج عيونها : طيب أنا ما دآيرة أشوف ، دآيرة أرجع
للظلام ، يا ليتني لو ما فتّحت ، بس إنت تكون جنبي يا عماد .. لو كُنت عارفة إنودا ح
يحصل ما كُنت وآفقت على العمليّة ..

عماد : ريم .. إستهدي بالله .. أسمعني.....

ريم مُقاطعة لعماد : إنت وعدتني يا عماد ، مُش قُلت لي ح أكون جنبك كُل ما تحتَاجيني
؟ ما تخَلّيني برآي يا عماد وسط النَّاس و الدُنيا ، ما تخَلّيني برآي وسط الثُّور ، أنا
مُحتَاجَة ليك تكون جنبي دآيما يا عماد ..

عماد الكآن ساكت و ما عارف يقول شنو ،

ريم ودموعها زادت بإنفعال : كُلّكم بتوعدوني و تكذبوا علي ! أنا عملت شنو ! ما
دايرة حَاجَة انا غير أعيش في وسطكُم و تحبُوني و أحبّكم ! أمي و أبوي و عم سيف و
خآلد ! و الآن إنت يا عماد ؟ برضوح تخَلّيني في نص الطّريق ! ح تفك يدي و تمشي مِنّي

بعد ما عودتني عليك ! و إنت عارف أنا ما بقدر أكمل الطريق برأي ، ما بقدر أقطع
الشارع برااي !

عماد و مدّ يدو يهدوء عشان يمسح دموعها : ريم أمسحي دموعك دي ، مآف حاجة
بتستاهل دموعك دي ! ريم .. مآزن و بيان مُحْتَاجيني شديد .. مُحْتَاجيني أكون معاهم في
كُل لحظة ..

ريم بإنفعال : طيب و أنا ؟ أنا لي منو ؟ مُش قلت لي أنا زي أخوك يا ريم ! ليه ح تخلييني
طيب ؟

عماد بأسى : ريمي ، إنتي مُستحيل تكوني زي أُختي .. إنتي أكبر من كدا !

ريم و غطت وشها ببدينها و بقت تبكي بقوة ، و عماد الكآن حابس دموعو ما عارف
يتصرّف كيف هو وعد سيف و أدا هو كلمة رُجال ، ما ح يقدر يتراجع عن كلمتو مع
سيف ! خصوصاً في الزّمن دا و ريم ح يعقدوا عليها يعني ح تبقى زوجة زول تآني ما
يحقّ ليهو يكون معاهما ،

ريم رفعت رأسها و سَط دموعها و كُحلها الكآن سايل على خدودها قالت بحسرة : ما
إتوقعت يجي يوم و تخلييني زي غيرك ! مَ.. ما عارفة أقول ليك شنو ، بس أنا كرهتكَ !
بكرهك يا عماد ! بكرهك..!

و قامت من مكانها بسرعة على إتجاه عُرفتها ، حتّى عماد الوقف معاهما بسرعة ما قدر
يوقّفها ، شآفها و هي بتغيب من عيونو و رأ الباب و خيالها في كُل مكان في الحوش ، ما
عارف ليه ما قدر يوقّفها ، بس عرف إنودا في مصلحتها ، إلتفت مكان الكرسي الكآنت
قاعدة فيهو شمّ عطرها الأنثوي الجميل زيها ، إبتسم بحسرة و دخل يدينو في جيوب
بنطلونو و يهدوء شديد طلع من الباب ..!

(.....•○•.....)

في عُرفة ريم :

دَخَلتْ غِيداءُ العُرْفَةِ و نَفْسِها قَائِم ، كَانتْ لَأَحْقَةَ رِيم لَمَّا شَافَتْها مَأْشَّةَ بَسْرَعَةِ و دَموعِها
المُخْتَلِطَةَ بِكُحْلِها الأَسْوَدِ نازِلَةً عَلى خَدودِها ، بِقَلْقِ مِشْتِ عَلى رِيم الكَأْنَتِ دَأْفَنَةَ
نَفْسِها فِي السَّرِيرِ و بَينَ المَخَدَّاتِ ، قَعَدتْ جَنبِها بَهدوءٍ و قَالَتِ و الخَوْفِ فِي عَيونِها : رِيم !
مالِكُ ؟ فِي شَنو ؟ عَمادُ مالو ؟

رِيم الكَأْنَتِ مَشغُولَةٌ بالبُكاءِ ما رَدَّتْ عَلِها ،

غِيداءُ و رَفَعَتِ المَخَدَّاتِ عَنها و رَفَعَتِ رِيم و عَآيَنَتِ فِي عَيونِها التَّعَبانَةَ مِنَ البُكا قَالَتِ
بِخَوْفٍ : رِيم فِي شَنو ! مالِكُ يا رِيم !

رِيم بِشَهقاتٍ مَتَقَطِّعَةً : كُلكُم بِتَكَرهُونِي ! حِ تَخَلُونِي مُشْ كِدا ؟

غِيداءُ و مَسَحَتِ لَها دَموعِها : رِيم حَبِيبَتِي ، بِرَاحَةِ بِرَاحَةِ أَحْكِ لِي ، خَوِّفَتِنِي عَليكَ يا
رِيم !

رِيم : عَماد ، حِ يَمِشِي و يَخَلِّينِي يا غِيداءُ ، لِيهِ يَعودُني عَلِها و بَعدينِ يَمِشِي و يَخَلِّينِي !
لِيهِ يا سَرَنِي بِشَهامَتو و نُبلو و طِيبِ أَخلاقو و بَعدينِ يَتَخَلَّى عَنِي !

غِيداءُ و ضَمَّتْها بِقوَّةٍ : عَمادُ مُسْتَحِيلِ يَعمَلُ كِدا ، فِي حَاجَةٍ بِتَكُونُ مَنعَتو يا رِيم ..

* و زَحَّتْ مَنا و عَآيَنَتِ فِي عَيونِها* رِيم ، أَنا دَائِرَةُ أَسالُكَ سَوال ..

رِيم مَن بَينَ دَموعِها : شَنو ؟

غِيداءُ و سَكَّتْ مَساأَفَةً ، حَرَّكَتْ شَفايِها بِإِستِفاها : إِنِتي بِتَحِبي عَماد ؟

(ل)-----*-----•••-----*(ل)

فِي الخَرطومِ - حِي المِطارِ :

فِي المَحاولَةِ الخَمسَةَ و العَشرِينَ مِنَ الإِتِصالِ ، رَدَّ أَخيراً ..

خالِدُ بِضِيقَةٍ : أَهلاً يا عَمِي ،

أبو سعد : أهلين خالد ، معلّش يا ولدي ، تلفوني كآن بعيد مّني شوية ..

خالد : لآ مآ مُشكلة ، اها كَلّمت أُستاذ سيف ؟

أبو سعد : لآ والله يا ولدي ، كآن مشغول الليلة كّل ما أتصل عليه مآ بيرُد علي ، بأُتصل عليه بُكرا إن شاء الله

خالد : خلاص مآ مُشكلة ، بس كَلّمني بألحاصل أول بأول ، طيب ؟

(♫)-----*-----•♫•-----*(♫)

في الخرطوم شرق - حي الرّياض :

ريم و عيونها مُعلّقة بغيداء بدهشة ، قالت بتلعثم و إرتباك : لآ .. هوز...زي أخوي ، غيداء : ريم ، أنا فاهمآك كويس و عآرفاك ، البيّنكُم دآ مآ أخوة .. إهتمام عجيب من الطّرفين .. إنتي مآ كُنّتي شآيفة الفرحة الكآنت في عيونو لَمآ شافك الليلة ، و مآ شُفتي كآن بيسألني عَنك بإهتمام كيف ، عآرفة كّل البنات كآنوا بيحوا عندو عشآن يتكلّموا معاهو و هو يتحجّج عشآن يقوم مَنهم ، مآ كان داير يقعد مع وحدة غيرك .. و إنتي برضو مآ لأحظتي لنفسك كُنّتي مبسوطة كيف لَمآ شفتيهو ؟ مآ لأحظتي طيب كُتلة السّعادة البتحوولي ليها لَمآ عمآد يجي ! أنا ما بفهم في الحُب كثير ، بس البعرفو إنو البيّنكُم دا مُستحيل يكون مُجرّد أخوة ! و آجهي نفسك يا ريم بحقيقة مشآعرك !

و طلعت من العُرفة مُخْلِية ريم في حيرتها !.

(♫)-----*-----•♫•-----*(♫)

صباح اليوم التّاني ، في شركة أُستاذ سيف :

دخّل عمآد المكتّب على أُستاذ سيف الكآن مشغول في اللآبتوب ، شآف عماد دخل عليه المكتب قال بإبتسامة : أهلين يا إبنّي ، منور المكتب والله ..

عمآد بإبتسامة بأهتة : تسلّم يا أُستاذ ،

قعد في الكرسي القدام مكتب أستاذ سيف بعد ما أشارليه سيف إنويقعد ، سيف
بإبتسامة رضا : والله يا عماد ، إنت زول فاهم خلاص ونجيبض نجاضة ، أنا كمية
الإطراء والمديح الجاني أمس من الناس و الليلة من الجرايد عمري كلو ما لقيت زيو .. كل
الناس بيتكلموا عن سيف خليل بأبكر و إنو عالج بنت أخوه العميا اليتيمة

عماد بنفس برودو : إن شاء الله دائماً يا رب ، ..

سيف و سند ظهرو على الكرسي براحة : عشان كدا يا إبنى ، أنا قررت أترجع عن
كلامي و أخليك تشتغل معاي فور إيفر ! في شركتي هنا ، لانو أنا ح أحتاج ليك كتير
معاي ، زول في فهمك و ذكائك دا مفترض يكون شغال معاي ..

عماد و عدل قعدتو : والله يا أستاذ انا جايبك في الموضوع دا ، يا أستاذ أنا خلاص
قررت أستقيل من الشغل قبل ما أكمل الأسبوع دا ..

سيف بدهشة : لبييه يا عماد ؟ ليه لكن !

عماد بأسى : الحقيقة يا أستاذ انا أخواني محتاجين لي شديد ، انا داير أكون جنبهم ،
سيف : خلاص ما مشكلة يا إبنى ، بشغلك في واحد من فروع في شمبات و بزيد ليك
الراتب ، بشغلك بشهادتك دي ، ولا اقول ليك بمسكك رئاسة و إدارة شركتي الفي
شمبات .. بس ما تستقيل يا خ ..

عماد : تسلم يا أستاذ ، و كتر خيرك .. بس في الحقيقة أنا إتخذت قراري وحسنت
أموري ، انا بس جيت هنا عشان أكلمك ..

و قام على حيلو : عن إذنك يا أستاذ ..

و طلع من المكتب بأسى و هو متأكد من قرارو عشان يكون بعيد من ريم ، هو عرف ريم
إتعلقت بهم و قدر شنو .. عشان كدا قرر يكون بعيد عنها بأي طريقة عشان تنسأه .. رغم
إنو الكلام دا بيوجعو بس يهمو إنوريم تكون ميسوطة ، و عارف إنها ح تكون سعيدة في
بعدو بعد ما تتعود على بعدو ، هو كمان إتعلق بيها و بيوجعو إنويكون بعيد عنها .. بس

عآرف إنو تعلقهم ببعض مآ ح يوؤي لأي مكان .. و مآ ح يعمل أي حآجة .. غير إنو في
النّاية ح يوجعهم بس !

(♫)-----*-----•••-----*----- (♫)

في الخرطوم شرق - حيّ الرّياض :

غيداء دخلت على ريم المآ شافتها من أمس ، لقتها بنفس حالتها أمس ، حتّى ملأبسها
ما غيرتها دخلت عليها بإستغراب : ريم ! من أمس مآ غيرتي ! ليه كدا لكن ؟ قومي سريع
و غيري بعدين تعآلي عشان نتفاهم !

ريم بحُزن : عمآد جا يا غيداء ؟

غيداء و حزنّت على حالة ريم : لآ و الله مآ جا ،

ريم و دموعها خنقت عيونها قالت بأسى : غيداء .. أنا .. أنا بحب عمآد يا غيداء ..

غيداء و مشت عليها ببُطء و مسحت دموعها بهدوء : هو كمآن بحبك يا ريم .. أنا مُتأكّدة
من كدا

ريم و نزلت دموعها بشدّة : طيب ليه خلّاني يا غيداء لو بحبّني ؟ لآلآ يا غيداء عمآد
بيعتبرني أختو بس !

غيداء : طيب عآيني ، أمشي غيري ملابسك بسرعة ، و تعآلي نزل تحت ليأسر و نتّصل
على عمآد و نفهم منو الموضوع ،

ريم بهدوء : طيب ..

غيداء : أنا بانتظرك تحت مع يأسر ..

(.....••.....)

في الحوش :

غيداء الكانت قاعدة مع ياسر بدون ما تحكي لهو شيء و ساكتين و كل واحد في نفسو
كلام بس ما داير يطلعو ، نزلت ريم بهدوء شديد و حزن باين في عيونها قعدت معاها في
سكوت ..

قطع السكوت دا صوت الباب الفاصل بين الحوشين وهو بينفتح بشدة كان وراهو
أستاذ سيف ، كان مُعصّب و عيونو بيطلع منها الشرر ، بخطوات قوية بتحفر في
الأرضمشى عليهم بسرعة و العصبية باينة في عيونو ، قال بصوت عالي : ريم !
ريم بخوف و سرعة وقفت على حيلها .. وصل عندها سيف و مسكها من شعرها بقوة
قال بعصبية و صُراخ : أعمل لك شنو أنا ؟ أآ ؟ قولي لي أعمل لك شنو يا حقيرة يا
واطية !

غيداء وقفت بسرعة و هي خائفة ، أما ياسر وقف و مسك يد أبوهو عشان يوقف و
يمنع بطشو من ريم قال بسرعة : أبوي في شنو ؟ براحة يا أبوي عليها براحة ..
سيف و نفس ياسر من يدو و إلتفت على ريم : من صباح الله يجيني تلفون من أبو سعد
و يقول لي إنو داير يفركش الخطوبة دي عشان ما مُرتاح معاك ! قلتي شنو للشاب دا ؟
إتكلمي قلتي لهو شنو ؟ حكيتي لهو بعمأليك و بلاويك مُش كدا ؟ عشان كدا قال داير
يفركش زفت الطين دي ! أنا جاي من الشركة ، وقفت شغلي كلو عشانك يا مُحترمة !
يعني بعد ما صدقت إنوح أتخلص منك ، تعي و تخربي كل شي ! لكن أنا بوريك .. أنا
بوريك يا بت المرحوم عادل ، بتلعي بي ، بولع فيك !

و جراها من شعرها على عُرفتها بدون ما يرحم دموعها و توسلات غيداء و صُراخ ياسر
المُستمر على أبوه ، فتح باب الغرفة برجلو و رمى ريم بدون رحمة و صرخ فيها : خليك
هنا لغاية ما تموتي !

و شال المُفتاح من الباب و قفلوا بقوة ، و إلتفت على غيداء و ياسر الكانوا جآيين
بسرعة عليها قال بتحذير : أنا بحدرك يا ياسر ، و بحدرك يا غيداء ، البخش على البت
دي .. يبقى الله غضبان عليه ! فاهمين ؟

و مشى بسرعة برًا البيت وهو مُعَصَّب ..

غيدآء وإلتفتت على يأسر بخوف و عيونها مليانة دموع : يأسر! اعمل شي !

يأسر و كأنو إندكر شي : دقيقة ، عندي نُسخة من المفاتيح !

(♫)-----*-----•♫•-----*----- (♫)

مرؤا شهرين :

عمآد الكآن بعيد كُـل البُعد عن ريم و مآ حاول يتّصل بيها أو يشوفها أو يعرف أخبارها ،
إشتغل مع العم سعيد عشآن يقدر يصرف على أخوانو ..

سُلطان رجع من المملكة مع أبوهو ، و قرّر إنو الزّواج يكون في نهاية السنّة الجاية ،
خآلد الكآن مبسوط بإنو خطوبة ريم و سعد إتلغت ، مآ كان عارف بالحصل لريم و
العملو فيها سيف ، قرّر إنو في أقرب فُرصة يتقدّم لها من عمها ..

غيدآء و يأسر و هيفاء كأنوا بيستغلّوا فترة الأستاذ سيف يكون في الشُّغل و يشيلو
النُّسخة من المفاتيح و يدخلوا عليها ، و يجيبوا لها الأكل و الموية ، إلا إنو ريم في حُزنها
مآ كانت بتأكل إلا نادراً و طيف عمآد بيمر بيها في كُـل لحظة ، حتى في أحلامها كآن
معها !

و حالتها النَّفسية و الصّحية بتسوء كُـل يوم و التّاني ، و كُـل شويّة الدّكتور المنزلي
الخاص بأبوها كآن بيوصف لها علاج إلا إنها ما كانت بتلتزم بهو ..

(♫)-----*-----•♫•-----*----- (♫)

في الخرطوم شرق - حيّ الرّياض :

في الصّبّاح و قبل مآ الشّمس تطلع بالتّمآ ، غيدآء الكآنت مآشّة على أطراف أصابعها
عشآن أبوها مآ يشوفها و في يدّها صينيّة فيها عصير و فطور لريم ، مشّت بهدوء
شديد على غُرفة ريم ، دخّلت المُفتاح في الباب و فتحتو و هي بتحاول تكتيم الصّوت ،

فتحت الباب ورسمت على وشها إبتسامة عريضة عشآن تقابل بيها ريم من الصّباح ،
دخلت الغُرفة ودارت بعيونها بتفتّش على ريم ، فجأة إتخلّعت وشهقت بصوت عالي و
الصّينية وقعت من يدها و الحآجات فيها إتكسّرت ، صرخت بصوت عالي مسموع
مليآن خوف و قلق : ريبيم !

(♫)-----*-----•♫•-----*----- (♫)

{ بلقآك حلم .. }

(.الحلقة الحادية والثلاثون.)

" يحدث أن يكون القرار الصحيح هو إقرارك بخطئك "

(♥).....*.....•♫•.....*.....(♥)

في الخرطوم شرق - حيّ الرّياض :

في الصّباح وقبل ما الشّمس تطلع بالتمام ، غيداء الكآنت مآشة على أطراف أصابعها
عشآن أبوها ما يشوفها وفي يدها صينيّة فيها عصير و فطور لريم ، مشت يهدوء
شديد على غُرفة ريم ، دخلت المفتحاح في الباب و فتحتو وهي بتحاول تكتّم الصّوت ،
فتحت الباب ورسمت على وشها إبتسامة عريضة عشآن تقابل بيها ريم من الصّباح ،
دخلت الغُرفة ودارت بعيونها بتفتّش على ريم ، فجأة إتخلّعت وشهقت بصوت عالي و
الصّينية وقعت من يدها و الحآجات فيها إتكسّرت ، صرخت بصوت عالي مسموع
مليآن خوف و قلق : ريبيم !

بدون ما تفكّر مشت على ريم الكآنت وأقعة في الأرض قعدت على رُكها جنبها و بتحاول
تصيّ فيها و تصرّخ بصوت عالي إختلط مع دموعها : ريبيم ! بسم الله .. ريم .. ريم حبيبتي
أصحي !

أما ريم ما حرّكت أي ساكن فيها ، غيداء عرفت إتها ما ح تقدر تعمل حاجة ، جرّت
بخطوات سريعة على الحوش و من هناك إتوجّهت على الغُرفة الكآنت في مدخل الفيلا ،

كأن فيها عم علي البوّاب و مُعتصم الدّكتور المنزلي ، فتحت الباب بقوة صَحَى مَنها
الدّكتور و البوّاب ، صرّخت بصوت عالي و شَهَقَات متقطّعة : دكتور .. ألحق سريع .. ريم
يا دكتور !

الدّكتور الكآن مخلوع قال بإستفسار: ريم مألها يا غيداء ؟

غيداء بخوف : مَ. ما عارفة ، لقيتها واقعة في الأرض ، ألحق يا دكتور !

الدّكتور إلتفت وراه و شأل الشّنطة الكآنت في زُكن الغُرفة طَلع بسُرعة من الغُرفة و
مشى فوق على غُرفة ريم لحقتو غيداء .. دخل الغُرفة شآف العِدّة الواقعة في الأرض نطّ
منها و مشى على ريم ، طلع سمّاعتو و جسّ نبضها إتطمّن إنو عندها نبض و إنها حيّة
، إلتفت على غيداء القأعدة جنبو بخوف ، طلع السّماعات و قال بسُرعة : سَاعديني
نرفعها على السّرير ..

غيداء : أوكي ،

و رفعوها على السّرير بحذر و هدوء ، الدكتور و قعد جنبها في السّرير أشار لغيداء إتها
تطلع من الغُرفة

(♫)-----*-----•♫•-----*----- (♫)

في بحري - شمبات :

من بعد صلاة الفجر و هو صأحي على غير العادة ، كآن قاعد في الحوش بهم و غم و في
بالو ألف فكرة و فكرة ، بس ريم في رأس القائمة ، شأغلة بالو مع إنو حاول ينسأها
كتير و يشيلها من بالو و تفكيرو ، بس في كُل لحظة هي معاه ، في كُل حركة و سكنة هي
في بالو ، و في كُل خطوة هي بتخطوها معاه ، إتنهد .. هو عارف إنو العملو دأ صأح ، و
أحسن لهم الإتنين ، لأنو التعلّق الكآن بيزداد يوم ورا التّاني ح يوصل بهم لطريق
مسدود ح يكسر إرادتهم هم الإتنين .. إستغفر بحيرة و قام على حيلو عشآن يفتح الدّكان
مع العم سعيد !

(♩)-----*-----•♩•-----*----- (♩)

في الخرطوم شرق - حيّ الرياض :

غيداء الكانت وأقفة بقلق و معاهها ياسر النادتوا غيداء من نومو وكُل واحد بالومع ريم

,

ياسر شدّ على قبضتو بعصبية : دأ كُلو من أبوي ! هو العمل فيها كداا ، ريم دي لو حصل
ليها حاجة .. أنا ما ح أسامح أبوي دأ أبداً .. والله أوصلو للمحكمة ..

غيداء بخوف : ياسر ، مآف داعي أبوي يعرف بالكلام دا ، خَلينا بدون مشاكل ،

ياسر و إلتفت على غيداء بإنفعال : يعني إنتي عاجبك البحصل لريم دا ؟ تفتكري لو
وقفنا ساكتين أبوي ح يعمل ليها شنو ! أبوي ما ح يرتاح إلا لوريم ماتت ! وصدّيني دأ
ما ح يحصل و أنا موجود ..

غيداء بقلق : ياسر .. عليك الله مآف داعي للم...

قطع كلامها صوت باب غرفة ريم وهو يينفتح طلع منو الدكتور ، إندفع عليه ياسر و
غيداء بسرعة ، سبقهم الدكتور بالكلام : إنتويا جماعة ، ريم دي البحصل ليها شنو ؟

ياسر بإستغراب : البحصل ليها شنو في شنو ؟

الدكتور : قصدي يعني ، هي بتعاني من توتر و ضغط نفسي شديدين ، الشّي البيادي
للإغماء الوعائي المبهّي ..

ياسر و غيداء كُلو واحد إلتفت في إتجاه و هم عارفين السبب ، كمل الدكتور كلامو : و
النوع دأ من الإغماء بيحصل بعد المرور بأزمة صعبة أو الشّعور بالألم *وإلتفت على
ياسر* على العموم ما تقلقوا هي ح تصحى بعد شوية ، بس برضو ريم دي عندها
إنخفاض حادّ في ضغط الدّم سببو النقص الغذائي ،

غيداء إلتفتت على الدِّكتور بسُرعة : صح يا دكتور مُعتصم ، هي الأيام الفآت دي
أكلها قلّ شديد و ما كانت بتأكل زي الناس .. لو أكلت بتأكل لُقمة لُقمتين ..

الدِّكتور و عقد حوآجبو : و إنتو بتخلّوها كدا طبيعي ؟ الكلام دآ غلط منكم ، المهم في
الموضوع أنا ح أوصف ليها كم علاج و لأزم تجرّصوا إنها تأخذهم ، و ما تعمل فيهم زي
الأدوية الوصفتها ليها المرآت الفاتت ..

يأسر : إن شاء الله بنحاول يا دكتور ،

الدِّكتور : طيب يا جماعة أستاذنكم أنا ح أدخّل على ريم إحتمال تكون صحت ..
عشان أتكلّم معاها في موضوع النقص الغدائي دا .. ح أحاول أشرح ليها المخاطر
إحتمال تفهمني ،

يأسر بحيرة : خير يا دكتور ..

غيداء إلتفتت على يأسر و كأنها إندكرت حاجة : طيب يلا نمشي قبل ما أبوي يفقدنا ،
يأسر : طيب يلا ،

و نزلوا الإثنين من السّلم ، الدِّكتور و إطمأنّ إنهم مشوا ، دخل غرفة ريم و قفل الباب
ورآهو ، كانت ريم لسّة نائمة ، مشى بخطوات بطيئة عليها ، شعرها المتناثر في المخدّة
بإهمال و شها كأن شاحب و عيونها تعبانة ، شكّلها كأن ما بيطمّن ، الدِّكتور و إندكر
المرحوم عادل و كيف كان تعاملو معاها طيب .. قعد في الأرض على ركبو جنب السّيرير
جنب رأس ريم و عيونو إغطّت بالدموع و هو بشوف ريم بالمنظر دآ ، قال بصوت مخنوق
:

سامحيني يا بت أستاذ عادل ، أبوك أداني أمانة أنا فرطت فيها عشان كنت طمّاع ..
طمّاع والله ، أنا كنت السّبب في البيحصل ليك دآ .. حتّى عمآك أنا كنت سبب فيهو ،
بس عشان أبوك كان زول صالح الله بيحفظك في غيابو ، رسّل ليك ابن الحلال العلي
يدو شفّتي النور .. بس بسببي برضو مشى و خلّاك .. أعفي لي يا ريم يا بت عادل ، أعفي

لي عليك الله ، أنا ندمانا والله ندمان على العملتو ويا ريتني لو ما سمعت كلام
الشيطان ، ما بتستاهلي البيحصل ليك دا كلو!

وخت رأسو على السرير و بصوت عالي بدأ يبكي ! كان صراخ أكثر من إنو بكاء ، فجأة
رفع رأسو بسرعة وقال بانفعال : بس صدقيني أنا ما ح أخلي الموضوع دأ يمر كدأ ، ح
أصلح غلطي .. ح أصلحوا وأرجع ليك حياتك السلبتها منك بسبب طمعي ، ح أصلحوا
مهما كلّفني !

فكر ، في زول واحد بس ح يقدر يساعدو في تصليح الغلط دأ ، أقرب زول لريم ! عماد
، عماد زول متفهم ح يقدر يساعدو في الحكاية دي لأنو أكثر واحد بيهتم لريم ، في الفترة
الكان عماد قاعد معاها كان شأيف ريم و راحتها معاها في الكلام و عماد كيف كان
مستمع بكلامها ، بس هو الآن مشى ! طلع من الغرفة بسرعة نزل الحوش لقي ياسر
واقف مع غيداء و بيتكلم معاها ، مشى عليهم بثقة قال بنبرة هادئة لياسر : ياسر ،
عندك رقم عماد .. المرافق الكان مع ريم !

ياسر باستغراب : أيوة عندي ، ليه ؟

غيداء بسرعة : داير تكلموا بالحصل لريم ؟

ياسر : مآف دا عي تكلموا ، ح يقلق كدأ ..

الدكتور : لآ أنا ما داير أكلموا ، بس عشان رقمو كان عندي و ما عارف إنمسخ ليه ،
بس عندي معاها موضوع كدأ داير أكملو ،

ياسر : أيواا* وطلع تلفونو وفتحو وبدأ يفتش في الأرقام ، رفع رأسو على الدكتور* طيب
أكتب معاي ..

الدكتور وطلع تلفونو : أهاا ..

(♫)-----*-----•••-----*----- (♫)

في بحري - شمبات :

.....: أنا دكتور مُعتصِم ،

عماد بإستغراب : دكتور مُعتصِم ؟

دكتور مُعتصِم : أيوا ، أنا الدِّكتور المنزلي الخاصُّ بأستاذ عادل سابقاً و حالياً الخاصُّ
بريم ،

عماد و إندكرو : أيوا صح ، دكتور معتصم ، خيراً دكتور في حاجة ؟

دكتور مُعتصِم : في الحقيقة ، في أكثر من حاجة ، و أناا كُنت دأير الأقيك عشآن أقعد و
أتكلّم معاك في موضوع مُهم ، نقدر نتلاقي الآن ؟

عماد و قطّب حواجبو : ما عارف والله يا دكتور .. مشغول أناا ..

دكتور مُعتصِم : والله يا عماد أناا ذاتي مشغول ، بس أناا لو ما أهمية الموضوع ما كُنت
إتصلت عليك ، خصوصاً و إنو الموضوع بيخُص ريم ،

عماد بسُرعة : ريم ؟ خيراً دكتور في شنو ؟

دكتور مُعتصِم : كلام كثير يا عماد ما بيتقال بالتلفون ، نتلاقي أحسن ..

عماد بلهفة : جدّاً نتلاقي ، إنت وين ؟

دكتور مُعتصِم : خَلينا نتلاقي في مطعم الأمل الفي بحري شمبات .. مُش إنت ساكن هناك
؟

عماد : مطعم الأمل ؟ خلاص خير يا دكتور دقأيق و بكون هناك ..

دكتور مُعتصِم : طيب يلاً أناا ماأبّي عليه ..

عماد : طيب سَلام ،

وقفل الخَط و مشى على العم سعيد و سُلطان قال للعم سعيد : معليش يا عم ، عندي
موعد مُهم الآن ، ح أتغيّب لفترة و برجع ليك إن شاء الله ،

العم سعيد برضا : خيراً يا إبنى ، الله معاك ،

عماد : الله يخليك يا عم * وإلتفت على سلطان* قول لبيان أنا ماشي مشوار قريب و
راجع تمام ؟ خليها تأمن أسطوانة الغاز..

سلطان يا بتسامة : أبشر ما طلبت شي ،

عماد : وخلي بالك منها تمام ؟ يلا مع السلامة ..

ومشى بسرعة بدون ما ينتظر ردهم ..

(♫)-----*-----•♫•-----*----- (♫)

في بحري - شمبات "مطعم الأمل":

الدكتور الوصل قبل عماد وقعد في واحد من الكراسي بتوتر ، شاف عماد داخل من
باب المطعم رفع ليه يدو.. عماد إنتبه ليه و جا قعد معاهو يا بتسامة ، ذكرو بريم الما
غابت عن بالو ، الدكتور يا بتسامة : تجب تشرب شنو ؟

عماد : لا كتر خيرك موية بس ..

الدكتور و طقق بأصابعو للجرسون الجاهو بسرعة : عليك الله كبايتين موية بأردة ،
الجرسون : طيب ..

مشى عتهم وإلتفت الدكتور على عماد الكان باين من ملامحو القلق والخوف قال
يا بتسامة : أستاذ عماد .. يا هلا فيك والله ليك وحشة ..

عماد يا بتسامة مُصطنعة : ما يوحشك غالي ، * وحول ملامحو للجديّة* خيراً دكتور في
شنو؟ ريم مألها ؟

الدكتور وعدل قعدتو: في الحقيقة ريم الليلة الصّباح كآن مُغى عليها بسبب توترو
ضغط نفسي شديد ، وكمآن لقيت عندها هبوط حاد في ضغط الدّم سببو النّقص
الغذائي ..

عماد عرف إنودا كُلو بسببو ، إلتفت بعيد بحسرة و حُزن ،

الدكتور كمل كلامو: بس إطمّن ح تكون كويسة إن شاء الله ، بس يا أستاذ عماد ،
أنا ما جيتك عشان كدا ،

عماد وإلتفت عليهو بإستغراب : خير ؟

الدكتور و شبك أصابع يدينو ببعض ورفعها فوق الطريزة : يا أستاذ بما إنك أقرب زول
لريم ، و أكثر زول بيهتمّ بيها ، أنا جيت أحكي ليك قصّة بتوجعني أنا شخصياً .. وأنا
والله ندمان عليها ، بس أنا دأيرك تسمعني وتفهم قدر شنو أنا ندمان و ما جيت أحكي
ليك إلا عشان دأيرك تشوف معأي حل وتساعدني ..

عماد عدل قعدتو وقال بإهتمام : و الموضوع ليه علاقة بريم ؟

الدكتور بإبتسامة سُخرية : ليه علاقة بريم ؟ ريم هي أساس الموضوع دا ..

عماد بإهتمام : طيب يا دكتور ، أحكي ..

في اللحظة دي جا الجرسون و خت قدامهم كُبايتين موية ..

الدكتور و شرب مّها عشان يبيل ريقو النَّاشف و قال بتوترو: طيب أحكي ليك ، أنا يا
عماد كُنت شغّال مع أستاذ عادل المرحوم ، أبوريم .. شغّال معاهو في البيت ، لأنو كان
عندو سكري و ضغط و أمراض مُزمنة كثيرة ، فكان لازم يكون معاه دكتور في البيت ، و
ريم كان عندها علاقة مع واحد إسمو خالد برضو أبوهو رجل أعمال كبير .. كانوا بحبوا
بعض ..

عماد الكآن عارف الكلام دا هزّ رأسو بتفهمّ ،،

كَمَلِ الدِّكْتور: يَلا يا أُستادِ يومِ من الأَيامِ ، خالِدَ دأَ إِتَّصلَ عَلَيَّ وَقَالَ لي دأَيرِ يَلا قَيني ،
مَعَ إِنوَأنا ما بَعرفو شَديد ، بس مَشيت لِهوَ وَقابَلتو في وَأحدِ مِنَ المَطاعِمِ الفِخمةِ وَ
الفأخِرةِ ، قَالَ لي إِنورِيمِ قَرَّرتِ إِنها تَنفِصلُ عَنو عِشانَ كَلامِ النَّاسِ ما يَصلُ لأَبوهاً وَ
تَضَرُّو ..

عَماد: أَها ،

الدِّكْتور: يَلا يا أُستادِ ...

(.....•○•.....)

قَبلِ سَنَةِ - في وَأحدِ مِنَ المَطاعِمِ الفِخمةِ وَ الفأخِرةِ :

خالِدَ الكانِ قاعِدِ وَ معاهو دِكْتورِ مَعتصِمِ الدِكْتورِ الخَاصِ بأُستادِ عادِلِ ،

خالِدَ : بس بَعَدَ ما إِنفِصلنا بِدونِ رِضايِ وَ أَنا مُتَقَطِّعٌ مِنَ فُراقِها ، إِكتَشَفتِ إِنها

إِرتَبَطتِ بِياسِرِ وَلدِ عَمِّها سِيفِ !

دِكْتورِ مُعْتَصِمِ الكانِ ما عارَفَ عَلاقَتو شَنو بِالكَلامِ دا : أَها ،

خالِدَ وَ ضَرَبَ الطَّرِيزَةَ بِقَبِضَةِ يَدُو: بس أَنا ما حَ أَسَكَّتِ عَلَيَّ كِدا ، حَ أَعملِ المُستَحِيلِ

عِشانَ رِيمِ تَرجِعِ لي ! لأنو ما بِقَدَرِ أَعيشِ مِنَ دُونِها ، عُمَرُكَ يا دِكْتورِ سَمِعَتِ بِزولِ يَقدِرِ

يَعيشِ بِدونِ قَلبِو ؟!

دِكْتورِ مُعْتَصِمِ : لا ..

خالِدَ وَ رَسَمَ إِبتِسامَةَ خَبيثَةَ عَلَيَّ شَفايفو: عِشانَ كِدا أَنا دايرِ مُساعِدَتِكَ ، خَصوصاً وَ

إِنتِ دِكْتورِ ..

دِكْتورِ مُعْتَصِمِ بِإِستِغرابِ : أَنا !

خالِدَ : أَيوا إِنتِ ، أَنا دايرِ مَنِّكَ خَدَمَتِينِ ،

الدكتور بحيرة و عدل قعدتو : الي هم ؟

خالد بخبث : الأولى تديني إسم مادة بتسبب آلام في المعدة ..

دكتور معتصم و بلع ريقو بتوتر : والتانية ؟

خالد : التانية بتعرفها بعدين .. ههههه

(.....•○•.....)

دكتور معتصم لعماد : أديتويأ أستاذ مادة فيها فيروس إسمو الرُوتافروس ، طبعاً

بسبب إلتهابات في المعدة ، دي كانت الحاجة الوحيدة القدرت أساعدو بيها ..

عماد و مأسك أعصابو : و إنت إستفدت شنو من الكلام دا ؟

الدكتور و عاين بعيد بخجل : مبلغ مالي ضخم ..

عماد : طيب كمّل ..

الدكتور : المهم بعد يومين جآني و قال لي إنو عزم ريم على عشا ، أقنعها إنو دا ح يكون آخر عشا لهم مع بعض و هو نفسو يوّدعها ، ريم البريئة إقتنعت بكلامو و مشت معاها و إتعشت .. بس ما كانت عآرفة إنو العشا حقها كان فهو الفيروس الأنا أديتو لخالد ، و على كدا إنتهى اليوم دآ .. قال لي إنو ريم ح تشتكي من آلام في المعدة ، و شي طبيعي إنو أستاذ عادل ينآديني انا عشان أكشف عليها ،

عماد بإهتمام : طيب ..

الدكتور : و هنا طلب مّي الخدمة التانية ، إنو اقول لأستاذ عادل إنو ريم بنتو حآمل !

عماد و شدّ على قبضة يده و بقوة اكبر وهو بحآول يكتّم عصبيتو : و عملت كدا طبعاً

عشان المبلغ المالي الأضخم الدّفعلوك مُش كدا ؟

الدكتور بخجل أكبر: أيوا ، فعلاً ريم إشتكت من ألم في بطنها .. وأستاذ عادل بخوف ناداني ، مشيت عليها ودخلت الغرفة ، وبعد كم دقيقة طلعت لأستاذ عادل وقلت لهو إنوريم حامل .. في اللحظة الأستاذ جأتو ذبحة صدرية ، حاولنا نسعفو إلا إنو مات ربنا يرحمو ،

عماد الكاتم عصبيتو: طيب أنا عرفت بعد كذا إنوريم مشت تآني لدكتور عشان تتأكد من صحّة الكلام الإتلقق ليها دا ..

الدكتور: أيوا ، برضو خالد إتفق معاهو عشان يقول لهم إنو فعلاً كان حامل وهي سقطتو ، ريم بقت تحلف لعّمها إنو الكلام دا ما حاصل ، بس للأسف مآف زول صدّقها ، ومآف زول كان عآرف الحقيقة غيري أنا و خالد !

عماد وفأض بهو الكيل وقف على حيلو وضرب الطرييزة بقوة : كيف جآتك الجُراة تعمل كدا ! إنت إنسان ؟ عندك قلب إنت ولآ عندك رحمة ! شآيف حصل ليها شنو ؟ أبوها مات وإتحرمت من النُور ، وعمّها ظلمها و حرمها من ميرآتها والأهم من كدا الناس القاعدين يطعنوا فيها وفي أبوها وفي شرفها !

الدكتور ووقف مع عماد يهدّيهو: أناا عشان عآرف حجم الغلطة دي جيتك عشان تلاق لي حل عشان أصلح الغلط دا ..

عماد وضغط على شفآيفو إلتفت بعيد وهو بحآول يهدّي أعصابو ورجع إلتفت على الدكتور بأعصاب هآدئة : تمشي معآي لأستاذ سيف .. نحكي لهو الحقيقة ..

الدكتور بخوف : سيف ! لآ لآ سيف لا !

عماد : مُش قُلت دآير تريّج ضميرك ؟ ضميرك ما ح يرتآح إلا لما ريم تعيش مُرتاحة و ترتآح من الجحيم العآشتو بسببك إنت و خالد .. وأستاذ سيف لو عرف الحقيقة ح يرحمها و ح يرمي خالد في السّجن ..

الدكتور بعد تفكير قال بأسى : للأسف كلامك صح ، *ورفع رأسو على عماد* مع إنو أنا
برضوح اترمي في السجّن بس برضو أرحم لي من عذاب الضمير دا ..

عماد : طيب يلا نمشي لأستاذ سيف !

(♫)-----*-----•♫•-----*(♫)

في الخرطوم شرق - حيّ الرياض :

في شركة أستاذ سيف :

سيف الكآن قاعد بتوتّر و ما مُصدّق الكلام البيسمعوا من الدكتور دا ، رفع رأسو وقال
بإهتمام : طيب أنا أعرف كيف إذا إنت كنت صادق ولا لا ؟

الدكتور و طلع ورقة ومدّاها لهو: دي يا أستاذ نتيجة الفحص الصحيحة الأنا عملتو
لها في المستشفى ، ح تلاقي تحت مكتوب إلتهاب في المعدة سببو فيروس الرُوتافروس ،
ومدّ لهو ورقة ثانية و دي نتيجة الفحص المكذوبة بس ح تلاقي تحت مكتوب حمل
صحيح !

أستاذ سيف بعصبية و رمى الأوراق في وشّ الدكتور : أنا ما ح أرحمك ! الموضوع دا
بيمسني أنا شخصياً .. عارف كمية الإساءات الوصلتني فهو! عارف الخسائر الكآن سببها
كلامك دا !

الدكتور بخوف بلع ريقو ..

عماد و إتدخّل : بس يا أستاذ اول شي نلّم الموضوع من أطرافو و نبدأ بخالد في البداية ..

أستاذ سيف بتوتّر مسح وشو و قال بقلق : بتفكر في شنو إنت يا عماد ؟

عماد و عدّل قعدتو: إتصل على خالد يا أستاذ و خليه يجي في الفيلا هناك ،

أستاذ سيف و طلع تلفونو : طيب !

(♫)-----*-----•♫•-----*(♫)

عماد : هو صح مُمكن ينكر.. بس في كم حاجة بتثبت الكلام دا ، مثلاً الشيك الفهيو
المبلغ المالي الضخم الوقع فيهو للدكتور عشان ينقد كلامو ، كمان دكتور مُعتصم لما
جأب الفيروس دا من المعمل عشان يقدر يطلعو من المعمل لأزم ورقة رسمية ..

دكتور مُعتصم : و طبعاً خالد وقع فيها بحجة إنو داير يعمل كم تجربة ..

سيف ورجع ظهرو على الكرسي : خالد دا طلع غبي عدل كدا ، يعني جريمة زي دي
يوقع فيها بتوقيعو الشخصي !

عماد بإبتسامة : هو ما غبي ، هو بالعكس ذكي من النوع الشيرير ، بس غلط غلطة ما
مُنْتبه لها ، عشان سُبحان الله ينكشف !

دكتور مُعتصم : بس يا أخوانا ، في حاجة فأيتة عليكم ، إنتو عارفين الزول دا عندو
ظهر وظهر قوي شديد ، يعني حتى لو دخل السجن ح يطلع بعد كم يوم برآة ..

سيف بإبتسامة : لا الموضوع دا خلمو علي أنا .. إذا هو عندو ظهر ، أنا ذاتي ظهر!
بنفسي ح أقيف على القضية دي و أضمن إنو يأخذ جزأهو بالتمام ،

عماد بإبتسامة رضا : فعلاً يُمهّل ولا يُمهّل ،

سيف و جدع مُفتاح العربية لعماد : أمسك يا عمدة دا مُفتاح العربية ، أنزل تحت
سختها ، لغاية ما أكلم ياسر بالشرطة ، و أتصل على الكلب خالد دا ..

عماد مسك المُفتاح و إلتفت على الدكتور : يلا يا دكتور ..

و طلّعوا من المكتب بسرعة ، أما سيف سَنَد ظهرو على الكرسي و عيونو مُلاحقة عماد
لغاية ما طلع إتنهد و قال بحيرة : أنا ما عارف الشهامة دي جآيها من وين ! أنا ما
عارف هو نفسو جآي من وين ! يا ربّي في زيوتآني ؟ و لا دا آخر حبة !

إتنهد و طلّع تلفونو يتصل على ياسر و خالد ..

(♫)-----*-----•••-----*----- (♫)

في الخرطوم شرق - حيّ الرياض :

في فيلاً الأستاذ سيف :

قعد الأستاذ سيف في واحد من الكراسي ومنتظر خالد ، أما عماد و الدكتور دخلوا جوا
الصالة عشان خالد يأخذ راحتو ، ويأسر مشى على قسم الشرطة عشان يجيب
الشريطي ، كانت الفيلاً فاضية .. هيفاء في جامعتها أما ريم فكانت في غرفتها ، إلا غيداء
الكانت قاعدة مع ريم ، أستاذ سيف الكان قاعد بتوتر على الكرسي و يدينو على
الطريزة إبتسم وهو شأيف عربية سوداء بتقيف قدام الباب ، قام على حيلو و عدل
عمتو و مشى على بوابة الفيلاً ، خالد و عاين للفيلاً إبتسم و طلع نظارتو و مشى على
داخلها .. إستقبلو أستاذ سيف بالأحضان قال بإبتسامة مفتعلة : أهلين ولد همّام ، ولا
اقول ليك أبو النسب !

خالد بفرحة : هههههههه أبو النسب طبعاً ..

أستاذ سيف و مسكّو من يدو : هههههههه ، طيب زي ما تحب ، إفضل !

و دخلوا جوا على الحوش و قعدوا على الطريزة الكان قاعد فيها أستاذ سيف ، كانوا
تحت مراقبة عيون عماد و الدكتور عصام ..

أستاذ سيف بإبتسامة : والله الصراحة يآبني أنا لو لقيت الدنيا دي كُلهما ما ح الأقي زيك
لريم .. زول و آعي و فاهم و متحضّر و مسؤول ..

خالد بفرحة : والله يآ أستاذ أنا كمان لي الشرف بنسبك .. *وقطّب حواجبو* بس يآ
أستاذ في مشكلة ..

أستاذ سيف بإستغراب : مشكلة ؟ الله لا جآب المشاكل ، مشكلة شنو ؟

خالد : إنت عارف أبوي و عدأوتو للمرحوم أستاذ عادل ، عشان كدا أنا داير طلب
وآجد بس ..

أستاذ سيف : أمريآ ولدي ..

خالد بغرور إنقطع الخيط بينو وبين الثقة : أنا طبعاً ما بيتسئل عن أصلي ولا فصلي .. و
عارفني إنت و عارف سيرتي السمحة ، الحمد لله .. أنا بس دأير زواجنا يكون في السر ،

سيف و رجّ ظهره على الكرسي و إصطنع الحيرة : أيوا .. بس لك..

قأطعوا خالد بإبتسامه : و أوعدك ريم ح تكون في عيوني ،

على كلمتو الأخيرة سمع صوت من وراهو إلتفت كأن عماد و معاهو الدكتور ، عماد
الكان مآبّي بخطوات واثقة عليه : طبعاً ح تختّها في عيونك يا خالد ، زي ما ختّتها في
عيونك زمان مُش كدا ؟

خالد بدهشة وقف على حيلوما شاف عماد مآبّي مع الدكتور قال بإنفعال : إنت تآني ؟
ياخي أنا مُش حدّرتك تبعد من ريم !

عماد وصل عندهم : أنا ببعد مّها ، بس بعد ما أضمن إنك زحيت من طريقها ..

خالد و مسك عماد من ياقة قميصو و قال بإنفعال : ريم دي حقّي أنا ، و إنت المتطّقل

..

عماد بإبتسامه ثقة زح خالد منو بهدوء شديد : أنا متطّقل ؟ على الأقل أنا ما قتلت
ليها أبوها و عميتها ، و الغريب في الحكاية دي إنك بتحّها ، طيب لو كنت بتكرهها
كُنت ح تعمل ليها شنو !

خالد والدّهشة بآنت في عيونو عآين في الدكتور بإندهاش و مفاجأة ،

عماد و حسّ بالنّصرو هو شآيف خالد في الحالة دي ، إبتسم و قال : أنا سمعت مقولة
" و من الحُبّ ما قتل " ، بس صدّقني أول مرّة أشوفو ..

خالد و إستوعب كلام عماد قال بدهشة : إ...إنت بتقول في شنو ؟

سيف ووقف على حيلو: لو ما فهمت من عماد ، أفهم مني أنا ، موضوعك إتكشف يا خالد ، وبنيت أخوي اللّفقت لهما التّهمة دي وإتهمتها إتهام باطل ، أنا بأخذ حقّها منك !

خالد بعد ما فهم إنو مافي مجال للكذب قال بإنفعال : أي عملت كدا ، وبعترف بكدا ،
ح تعملوا لي شنو؟

إلتفت وهو بيسمع صوت رجولي عسكري ورأهو كانوا شرطين و معاهم ياسر قال بثقة :
ما هم البيعملوا يا خالد ، نحن البنعمل ، و العدالة بتعمل و الحق بيعمل و القانون
بيعمل !

خالد بخوف و إرتباك : مافي حاجة بتثبت الكلام دا ! ما عندكم دليل وأضح غير شهادة
الدكتور دا ..

دكتور معتصم ورمى الأوراق الفي يدو على الطريزة : فأكر الوراق دا يا خالد ؟ فأكر
الشيكات و الأوراق حقت المعمل ؟ أنا طول الفترة دي ما كنت عارف ليه إحتفظت بيها
، بس الليلة عرفت الإجابة ..

الشرطي و مسك يدين خالد الكان مُندهش من الكلام البيسمعو دا ، رجّع يدينولورا و
كبلها و قال بثقة : خالد همّام ! Game Over!

الشرطي التاني و شال الوراق الكان على الطريزة عاين فهو بإهتمام و رفع رأسو على
الدكتور : دكتور معتصم ، إتفضّل معانا القسم ، بصفتك شاهد و مُشترك في الجريمة
..

أستاذ سيف و ختّ يدو على كتف الشرطي : الدكتور دا ساعدناا كتير عشان نكتشف
الحكاية دي ، إتوصى بيهو ، تمام ؟

الشرطي : لا هو أصلاً عقوبتو ح تكون أقل و أخف ، لأنو إترف و لأنو مُشترك في الجريمة
بس ..

غيداء وقرّيت من عماد : عماد ، أنا دآيرة أسألك سؤال واحد بس ..

عماد بإستغراب : جدّاً إتفضّلي ،

غيداء : إنت مآ بتجس يا عماد ؟

عماد بإندهاش : كيف ؟

غيداء وكمّلت : ريم دي من يوم مآ مشيت وهي في حالة مآ بتنحسد عليها ، أبت الأكل و الموية و أبت النوم وأبت كل شي ، في بُعدك رفضت الحياة ، عأرف ليه ؟ لأتّها كآنت مُوقنة إنو مآ في حياة إلا في قُربك .. بس إنت مآ كُنت فآهم الحكاية دي ، مشيت عتّها بكل سهولة و خلتّها عآيشة في جحيم إنت مآ حآسّي بيهو ! *وسكتت مسآفة ورجعت كمّلت * ريم حبّتك يا عماد ، حبّتك جد والله !

عماد و كل كلمة من كلمات غيداء كآنت خنجر مآ بيرحم صدره ووقف على حيلو : هي وين الآن ؟

غيداء بإبتسامة : في عُرفتها ..

عماد و إتقدّم على غيداء و طبع بوسّة حنينة في رأسها و قال بإبتسامة : أنا عُمري مآ أنسى ليك جميلك دآ !

و بدون مآ ينتظر ردّها مشى بسُرعة على عُرفة ريم .. فتح الباب بهدوء بدون مآ يدقّو و دخل عليها ، كآنت قأعدة في السرير و غرقانة في دموعها ، بدون مآ يجس مشى عليها و قعد قدامها ، ريم الكآنت مآ حآسة بحآجة حولها ، رفعت رأسها ، إندهشت لمآ شافت عماد قال بحشجة : ع...عماد !

عماد ألمو منظر دموعها ، بحنآن مدّ أصابع يدّو على خدّها و مسح دموعها قال بإبتسامة هادئة : آخر مرّة شُفتك فيها كُنتي بتبكي ، ولما أرجع برضو ألقاك بتبكي .. أنا مآ بستأهل دموعك دي كُلتها ،

ريم و عيونها مُعلّقة بعماد قالت ونبرة بُكاها زادت : ليه خَلّيتني يا عماد وسط الدُّنيا و
النّاس و إنت عارف إنو أنا إتعودت عليك ؟

عماد و أصابع يدُو بتتحسّس في خدّها : لأنّي كنت غبي !

ريم على نفس حالها : طيب ليه رجعت تآني ؟

عماد بإبتسامه : عشّان جيت أسألك سُؤال واحد ، آخر مرّة شُفتك فيها قُلّتي لي كلمة
أوجعتني بشدّة .. *سكت مسافة و كَمَل بإستفهام* بتكرهيني يا ريم ؟

ريم : أ..أنا قصّدت

عماد و ختّ اصبع يدُو على شفّآيفها بهدوء و قال بإبتسامه : أششش ، دأ ما سُؤالي ..
أنا عارف إنك بتحبّيني ، بس سُؤالي هو .. إنت بتحبّيني قدر ما أنا بحبّك ؟

ريم و الدهشة كَمّمها و منعتها من الكلام ..

عماد و بمرّر أصابعو في خدّها بهدوء و دفع قال بإبتسامه : أنا بحبّك يا ريم !

(♫)-----*-----•♫-----*----- (♫)

بعد سنة :

صّحى من نومو غسّل و شُو و إتوضّى وصلّى الفجر و بخطوات الهادئة مشى على المطبخ ،
كأن عارف إنوح يلقأها هناك كألعادة ، دخل المطبخ كانت مُدياهو ظهرها و شغّالة
بتقطّع في سلّطة ، بهدوء و بُطء مشى عليها عشّان ما تحس بيهو .. وصلّ عندها ومدّ
يدينو بخفّة و مسكها من خصرها و إتصّق بيها ، قرّب من أذنها و همس لها : صباح
حبيبتى الجميلة !

بيان بإبتسامه : صباح زوجي الأهل ..

سُلطان و قرّب من أذنها أكثر همس لها : إنهبَلت فيك يَ روجي ،

بيان براءة : وين ؟

قطع كلامهم مآزن الكآن جآري بسرعة و هو حآفي دخل المطبخ و قآل بلهفة : بيان ، تعآلي
سآعديني آجل الوآجب ، مآفهمت الدرّس أمس !

بيان إلتفتت عليه و هي في قبضة سُلطان قآلت بإبتسامة : درّس شنويآ مآزن ؟

مآزن : مآ عارف إسمو شنو ، بس حق الرياضيات ..

سُلطان كعادتو حبّ يقهر مآزن و يغيظو قآل بإنفعال مُصطنع : هيبه ، مآ تشوف بيان
مشغولة ؟ رُح حل الوآجب لحآلك يلا ..

مآزن وإتخصّر قآل بعصبية طفولية : إنت مآلك إنت ؟ بيان دي أُختي !..

سُلطان : أقول حليلك يآ ورع ، أُخته يقول .. ترآها زوجتي !

مآزن كبرّ عقلو و طنّش سُلطان إلتفت على بيان : بيان يلا سريع تعآلي حلّي معاي الوآجب
عشان أمشي ألعب مع مُصطفى ..

سُلطان الكآن على نفس حآلو : مآ تفهم إنت ؟ إنقلع يلا .. بيان مي فآضية دحين ،

مآزن و دموعو بدت تنزل بكّي و طلع براّ المطبخ بسرعة ..

بيان إلتفتت على سُلطان و قآلت بعتآب : سُلطان !ليه كدا ؟

سُلطان : أحسن خله ينقلع ، عشان مرّة ثانية مآ يحآول يآخذك منيّ !

بيان : سُلطان حرآم عليك هو في التّهاية شآفع ، كبرّ عقلك !

سُلطان : بكبرّ عقلي في كُ شّي ، إلا أحد يحآول يآخذك منيّ ..

بيان بإبتسامة : بتغير علي من مآزن ؟

سُلطان بإبتسامة عذبة همس لهما : أغار عليك من نفسك حتّي ..

بيآن على نفس حالها : مجنون ! طيب يلا زح مني عشآن أمشي على مآزن دا ..

سُلطان و شداها لحضنو : طيب بخليك ، بس عطيني بوسة !

بيآن ببراءة وقفت على أطراف أصابعها عشآن تلحق رأسو و طبعت بوسة في جبينو و

إبتسمت لهو : يلا زح ..

سُلطان بخُبت : هذي البوسة خليها لهذآك الورع ، أنا ما بي هذي ،

بيآن عقدت حوآجها بإستغراب ،

سُلطان ما أذاها فُرصة تجآوب ختّ يدو على خدّها و همس لها : أَحَبِّك !

و مآل برأسو عليها و جمع بين شفآيفو و شفآيفها ، غمّضت عيونها في هدوء و حرّكت

يدّها اليمين و حاوطت رقبتو و لمست أصابعها خُصلات شعرو ، أما يدّها اليسار

إستقرّت على صدرو بشموخ !

(♫)-----*-----•••-----*----- (♫)

في بيت عماد :

صحي و هو حآبّي بحركة على صدرو إلتفت يمينو لقي ريم مُبتسمة لهو و يدّها على

صدرو قالت بهدوء : صباح الخير ،

عمآد بإستغراب قام على حيلو : صباح النور ، السّاعة كم يا ريم ؟

ريم و عآينت للسّاعة الجنها : السّاعة ٩ و نص ..

عمآد و إلتفت عليها بإستغراب : و ما صحيتيني بدري ليه ؟ الدّوام يا ريم !

ريم و عقدت حوآجها : مُش قلت لي الليلة ماثّي لصحبك في المطآر ؟

عمآد و إتذكّر : صح صح نسيت ،

ريم و قامت من السّرير : طيب يلا أخذ ليك دُش و ألحقني برآ جهزت ليك الفطور ..

عماد بإستغراب : صأحية من متين إنتِ ؟

ريم بإبتسامة : من السّاعة ٧ ، يلاً عماد مآ تتأخر ..

و طلعت برآ بخطوات مُغتَجِجة خلّت عماد وأقف مكانه و مأسور بيها ، إبتسم و قام على
حيلو ..

(♫)-----*-----•♫•-----*----- (♫)

في دُكّان العم سعيد :

سُلطان و عماد بعد مآ مشوا المطّار و جابوا وليد الكآن رآجع من السّفر لأول مرّة سآفر
فيها ، وقفوا قدام دُكّان العم سعيد حسب طلب وليد عشآن يسلمّ عليه ، نزل وليد
من العربيّة بلهفة و سلمّ على العم سعيد و قعدوا معاهو ،

قعدوا القعدة دي قبل فترة ، بس كآنت فترة هادية .. أرواحهم مآ كانت مشغولة ! مآ
كانت كبيرة كدا ، فترة بسيطة قدرت تغيّر في شخصيّة كُُل واحد فيهم ، قدرت تسلب
مّمهم حآجات جميلة و تدبّهم حآجات أجمل ، الحياة كدآ لمآ ترضى عنك ؟ ح تكون
أسعد إنسان في الدُنيا

وليد أخذ نفس عميق و إتهدّ قال بإبتسامة : يا سلام ياخ ! حتّى نيم شمبات إشتقت
ليهو !

العم سعيد : حمدا لله على سلامتك يا وليد ، والله الليلة شمبات منوّرة ،

عماد بإبتسامة : أهأا يا وليد بترجع متين ؟

وليد : أرجع ؟ أرجع وين تآني أنا .؟ أنا تآني كآن قالوا لي الغُربة دي فيها ذهب مجان مآ
بمشي ، الغُربة مرّة ياخ و مآ بتنطأق .. !

سُلطان : إيه شُفت هذا آخر الهياط ، شي "ن" مآ تقدر عليه لآ تسوّيه ..

عماد إبتسم : تتذكرو يا شباب لما سألتكم تفتكروا ح يجي يوم ونفقد لمتنا دي ؟ أنا
كُنت بتكلم ليكم عن اليوم دا !

وليد : صح كلامك والله ، أنا برضو إتذكّرت كلامك في الغُربة ، حتّى اللّمة دي فقدتها !

سُلطان : وإنت الصّادق ، الحين مع إننا ساكنين في نفس الحي والشّارع إلّا إننا ما
نتقابل ، من يوم إنك توظّفت في ذيك الشّركة !

عماد بتنهيده : السّنوات بتكبر يا سُلطان ، والأعمار بتكبر ، والأرواح بتكبر والمسؤوليّة
بتكبر ، ماف حاجة بتبقى زي ما هي !

سُلطان قام على حيلو : صح لسأنتك يا أبو منصور ، يلا يا عيال سريناً ..

العم سعيد وقِف معاهم : يلا الله يحفظكم ..

وركبوا عربيّة عماد الإشترهاها بعد ما ريم سجّلت كل ورثتها بإسم عماد منصور !

(.....•○•.....)

في بيت عماد :

ريم الكانت قاعده جنب غيداء ويأسر الجوّأ عشان يزورهم ، كانت بتضحك مع غيداء

..

سمعوا دقّ الباب ، يأسر قام على حيلو بسرّعة وفتح الباب ، لقي عماد في وشو قال

يابتسامة : أووه أبو النّسب ! وين ياخ ؟ مُختفي كدا مالك ؟

عماد : تقول شنوبس ، كبرناً ، ههههههههههه ..

سَلّم على سُلطان ووليد ودخلوا جوّ البيت وسَلّموا على بعض وقعدوا في السّراير

الكانت في الحوش ، بيان قامت وجابت لهم العصير .. قعدوا في جو ضحك وونسة ،

وليد الكآن قاعد جنب ياسرو بيحكي ليهو: والله عماد دآ لما إنطعن! أنا قلبي وقع ، قُلت
خلاص الزول شكلو مات! جرينا عليه أنا و سُلطان سريع ،

ريم الكانت قاعده جنب عماد و بتسمع في كلام وليد ، مرّرت يدّها على المنطقة
الإنطعن فيها عماد تتحسّس في الجُرح ، عماد و حسّ بهما مسك يدّها بإبتسامه و طبع
بوسة دافية عليها ،

قال بهمس : ما تخافي ، أنا ما طبت إلا بشوفتك !

أما ريم إكتفت بإبتسامه ..

سُلطان الكآن رآقد في السرير و خآتي رأسو على رجلين بيان قال و هو بيتكلّم مع ياسر:
والله اليوم اللي إنطعن فيه كان أسعد يوم بحياتي ،
كلّهم إلتفتوا عليه في لحظة وحده و الدهشة كآسياهم ،

سُلطان و حسّ بزلة لسانو: عشآن حتى أنا إنطعنت و محد داواني غير قلبي* وإلتفت
على بيان*.. تذكرين ذاك اليوم !

بيان بإبتسامه : كان أول مرة أعرف فيها إنو سُلطان عندو هيموفوبيا اللي هو رهاب الدّم
!..

غيدآء : كدي يا سُلطان فسّرلي السّبب البخليّك رآقد في رجلين بيان !

سُلطان بإبتسامه : زوجتي و أنا حُر!

غيدآء : آي زوجتك ما قلنا شي ، بس برضو ما سبب يخليّك تقعد كدآ قدّامنا خصوصاً
وفي عزّابة هنا !

سُلطان و كشر وشو: أقول لك في بيتي معاي هذاك البزر الغثيث و الحين إنت ،

غيدآء بخُلعة : منو الغثيث دآ ما يكون مآزن بس !

عمّاد و مسكهاا من خصرهاا و غرس عيونو في عيونهاا إبتسم لهماا : عآرفة إنو كان حُب
من أول نظرة ؟

ريم بإبتسامة : عآرفة ، كم مرّة قُلت لي ؟

عمّاد : طيب عآرفة إنو كُنت بعشَق قُربِك ؟ و عآرفة كُنت بغير عليك من خالد و ياسر ؟

ريم بإبتسامة : أيوا عآرفة ..

و نزلت حُصلة متمرّدة على عينهاا بهدوء رجّعهاا ورا أذنهاا و همس لهماا : طيب أناا بحبِك
يا ريم ! و بحب عيونك و صوتك و همسك و ضحكك و قلبك و روحك و كُلك !

ريم زحّت منو بخجل : أناا ماشّة ألحق الشّاي ..

حضنهاا بقوة و همس لهماا : أناا مادآير شاي ، اناا دآيرك إنتي !

(♩)-----*-----•••-----*----- (♩)

النهاية

الخاتمة

مهماً كانت أحلامك بعيدة وصعبة ، خليك وراها ، أوعى تتنازل عنها ، ثبتت نفسك بقوة وتابعها ، لأنوما في حاجة صعبة ومُستحيلة ، المُستحيل هو حيلة بنسند عليها لما طيف أحلامنا يكون بعيد عننا وأشباح اليأس بتسحبنا عليها في لحظة بنكون فيها عالقين في وحل الواقع المرير، وما تقول أحلامك سراب في أرض الواقع القاحلة !! أمشي عليها .. مُمكن السراب يكون حقيقة ، ومنو القال الأحلام هروب من الواقع ؟ .. ليه ما يكون الواقع هو هروب من الأحلام !!

-الحياة يا شباب ما بترحم ، ما بتعرف الصغير والكبير .. الحياة زي الشافع الفي يدو لعبة ، لو حاولت تقلعها منها ، ح تزيد في عنادها ، بس لو جارتها وإتقربت منها ح تضحك ليك وترضى إتها تديك لعبتها ، بس إنتبه ! إحتمال تقلعها منك في أي لحظة !!

#عماد ،

ما تخاف من التغيير ، التغيير سنة الحياة ، لأنوما في حاجة بتدوم . غريبين نحن ! بنتعلق بحاجات بنحيمها ونتمنى إنها تكون دأيمة ! في حين إنو الدنيا نفسها زائلة ! وما تخاف لو كنت في وسط العتمة براك ، أو كانت خيوط الظلمة محتوياتك ، لأنوما دأم في نور .. إنت ح تلقأه ووح يضمك ليهو أكثر من الظلام ! بس لو مسكت يد الزول الصّاح !

#ريم ،

-لكل زول عينو جات على النص دأ ؟ أعرف إنو عشان عيونك دي أنا وصلت لنهاية الرواية دي ، أسعدني جداً أكملها لخاطر عيونك :) ربنا يسعدك ويوفقك ويديك الفي مُرادك ، ساكت ليه ؟ ما تقول أمين إنت وهو !

مَهْمَا كَانَتْ أَحْلَامُكَ بَعِيدَةً وَصَعْبَةً ، خَلِيكَ وَرَأَهَا ،
أَوْعَى تَتَنَازَلُ عَنْهَا ، ثَبَّتْ نَفْسَكَ بِقُوَّةٍ وَتَابِعَهَا ، لِأَنَّهُ
مَا فِي حَاجَةٍ صَعْبَةٍ وَ مُسْتَحِيلَةٍ ، الْمُسْتَحِيلُ هُوَ حَيْطَةٌ
بِنَسْتَدُّ عَلَيْهَا لَمَّا طَيفَ أَحْلَامُنَا يَكُونُ بَعِيدَةً عَنَّا وَ
أَشْبَاحُ الْيَأْسِ بِتَسْحَبِنَا عَلَيْهَا فِي لِحْظَةٍ بِنَكُونُ فِيهَا عَالِقِينَ
فِي وَحْلِ الْوَاقِعِ الْمُرِيرِ ، وَ مَا تَقُولُ أَحْلَامُكَ سَرَابٌ فِي
أَرْضِ الْوَاقِعِ الْقَاحِلَةِ !! أَمْشِي - عَلَيْهَا .. مُمَكِنُ السَّرَابِ
يَكُونُ حَقِيقَةً ، وَ مِنْهُ الْقَالَ الْأَحْلَامُ هُرُوبٌ مِنَ الْوَاقِعِ ؟
.. لِيَهْ مَا يَكُونُ الْوَاقِعُ هُوَ هُرُوبٌ مِنَ الْأَحْلَامِ !!

[#إيلاف_الطاهر](#)